

詠物詩選

標點精校普及本



上海中央書店
印行

最新校印
咏物詩選
魏塘俞琰輯



1936

上海中央書店印行

咏物詩選序

零都孫子奮揚爲余庚寅典試所得士比公車來京余已視學使楚未獲晤歎論文以伸相知之雅友人黃君詠霓令於雲函通憶惻兼及孫子英年嗜學深羨爲余門翹楚余蓋心儀久之癸巳秋孫子與其友易雲紀同註詠物詩選書成郵相就質并求有以益之者公餘披覽琳瑯觸目其徵引採輯該核詳慎令卅角英流開卷洞豁此殆以名山大業襄熙朝之文教其心可謂盛矣而僻壤窮鄉莫不求工聲律以趨功令願詩有列才非迂滯者能兼通亦非儉腹者得所而襲取初學無由問津則莫不從工於賦物始是詠物一編其嘉惠士林誠非淺也夫詩裁異於帖括漁獵事類羅四庫而遍二酉資鈍則未能強記英敏之士又或限於力難購貸即案列陳編而因一端之疑義常苦獮祭紛紛識此漏彼至不免望洋而歎以餒其志者有之則是書之註釋有以補名流著述所未逮其功曷既原書八閩月而註成吾知是書得是註而鑄金錯玉炳炳烺烺誠藝林勝事也孫子之所學如是他日拔幘天府鼓吹揚休以襄國家之盛當

咏物詩選序

更有偉於此者予將拭目俟之是為敘時
乾隆癸巳仲冬吳趨黃應超撰



咏物詩選原序

詩能體物每以物而興懷物可引詩亦因詩而覩態周南篇首托興睢鳩楚客詞中寄情蘭茝崔氏鴛鴦之什擅美三唐謝家蝴蝶之篇著名兩宋聿緣情之有作唯咏物之為多然而佳製連篇散分麟閣新文滿篋雜寄鴻編非藉集狐島窺全豹吾友長仁才同繡虎藻並雕龍閉戶殫思探簡鑰於二酉下帷攻苦學文史於三冬拂紙則銀管千言揮毫而瑤詞滿幅薰香摘鮑既妙解夫文章戛玉敲金尤精研乎詩律爰搜秘笈復襲雲箋遍採歌詩獨編咏物觀其牢籠百態會集羣英分類標題發凡起例上窮蒼昊不難鏤月裁雲下括神臯真是模山範水長門永巷時屬新詞紺宇梵宮每題佳句思公子而不見宛轉傳神望美人兮未來娉婷現影以至徵伶選藝緯武經文錯落珠璣不遺布帛之作輝煌黼黻仍留冠冕之篇入大官之庖珍饈備列遊五都之市器用雜陳拾香草於詞間燦新花於紙上珍禽奇獸俱著品題春蚓秋蛇曲萃形象將天地間殊形詭狀盡入奚囊為古今來才子詞人留充武庫加以刪繁就簡領異標新

有要有倫亦精亦博採崑山之尺璧微玷皆捐探合浦之寸珠羣瑱悉棄秘諸玉枕可爲學海之珍船列在牙籤不啻文河之寶筏乃若征途旅館寂寞多閒雪案螢窗優游少託春花秋月動其妍思鳥語蟲吟引其芳緒方當開茲細帙對此芸編喜萬象之畢陳任供採拾觀衆形之悉具足備歛嗽真堪作我清供添人藻句鑒居同里閉學附淵源回思立雪之年曾陪問難今值截蒲之際聊助校讎樂觀厥成佇卜金輿夫呂氏家藏斯集行看紙貴於洛陽亦曰賞奇敢云弁首同里世弟錢鑒拜題

凡詩之作所以言志也志之動由於物也感於物而動故形於言言不足故發爲詩詩也者發於志而實感於物者也詩感於物而其體物者不可以不工狀物者不可以不切於是有詠物一體以窮物之情盡物之態而詩學之要莫先於詠物矣古之詠物者其見於經則灼灼寫桃李之鮮依依極楊柳之貌是果爲出日之容瀟瀟擬雨雪之狀此詠物之祖也而其體猶未全至六朝而始以一物命題唐人繼之著作益工兩宋元明承之篇什愈廣故詠物一體三百導其源六朝備其製唐人擅其美兩宋元明沿其傳其佳者往往擬諸形容象其物宜不即不離

而繪聲繪影學者讀之可以恢擴性靈發揮才調顧巨帙鴻編難於卒讀一朝專棄桂漏寶多
從游沈子堯封偕弟廣虞欲得一簡而該者以供記誦請業於余余不獲辭爰取名家諸集及
選本而手錄之斷自六朝至於明季集分八卷詩逾千篇名曰咏物詩選聊便初學用塞其請
或曰鵬蟲篆刻壯夫不爲月露風雲古人所賤則是書之輯余滋愧焉或曰傳有之多識於草
木鳥獸之名又曰不學博依不能安詩則是書也亦未必非學詩之一助云爾
雍正甲辰十月朔俞琰序





咏物詩選凡例

一詩有古風近體之不同而是集所選專於近體卽長律亦止錄十二韻以內者以集隘難於盡登且咏物體製正宜穩順聲律不蔓不支累句蕪詞亦無足取

一是彙選自六朝止於明世若國朝人文蔚起佳作如林琰孤陋寡聞無由徧識惟就古人所缺與同里諸子詩略附一二故加附字以別之明非備錄

一咏物之詩多者莫如李巨山下謝瞿廣至百首專門名家之業選錄宜多更有以一篇之
工擅名千載者如雀鴛鴦鄭鷗謝翊蠅楊春草哀白燕之類無不畢採以備詩林佳話且
使學者有所感興

一唐人以詩取士故其詩獨工是集所載居其大半明所尚也然在唐以前者豈無觀止之什唐以後者亦有居上之篇心思所至風會難拘惟擇其佳者而錄之亦不必定存唐作也

一歲時非物也然是集本為初學而設良辰美景存之可以備取材證遵佩文咏物詩選之例

亦爲編入

一集中所載如山部之有諸山水部之有諸水居處與寺觀等亦然例得附入若概爲刪去未免聞見寂寥然必欲備採即汗牛充棟亦有所遺故略存其要如五嶽四瀆之類或題非緊要而詩則甚佳者亦得與焉識者鑒之

一是集雖名咏物而衆體兼全歲時之內不乏感興地部之中亦多憑弔游覽即存乎山水間情已備於麗人言懷酬贈附見諸詩學者讀之正不必廣覽旁搜而運用有餘矣

一一題之詩多者不過六首少者僅存一首蓋既欲其約又欲其該第取備物不能備詩也

一是書部分三十其先後次序略以天地人物爲綱首天部而歲時者天之運行也故歲時次之次地部而山水者地之屬也居處寺觀則附於地者也故山水與居處寺觀次之次人部人有麗人而文武者人之所能樂藝者人之所習器用襟玩所以奉人玉帛冠服所以資人飲食所以養人巢也穀也蔬也皆飲食之品故諸部次之下此則爲物矣百花草木植物也禽獸鱗介水族昆蟲動物也或無情或有情而統歸之於物故以獸者終焉

一每部之中其敘次必先靈而後蠢先巨而後細先有用而後無用無奪倫也然其中更有以名附者如秋海棠之附於海棠珠蘭之附於蘭是也有以類附者如煙火之附於香炭箭之附於竹是也

一每咏一物以單名總咏者居先而後及於分咏又次及於襟咏分咏者如天部日後之繼以蚤日日午夕陽返照之類是也雜咏者如天部中秋月後之繼以鶴林寺中秋夜玩月地部郊墅後繼以初夏郊行之類是也餘可類推

一序詩之法或以體序或以世序此大較也是集專為咏物故惟以物序若一物而數詩者仍以體分物同而體亦同者仍以世次

一古人題目多為後人所增刪殊失本來面目是集各從舊本不敢妄更惟題上有咏字者概為削去蓋既以咏物名書則咏字無庸復贅讀者幸勿致訝

一數詩共題者後止書又字一人叠見者後不書人一覽自明省文可也

一書彙經屢易劇費苦心共商確之任者為余友錢辰御助校閱之勞者為及門沈堯封及

廣虞始事之勤所不敢泯然而識非蕭嗣博愧邊生燕石自珍驪珠難探高明君子尚其有以教我

俞琰長仁氏識

咏物詩選總目

卷一

天部九十一首

歲時部一百二十二首

歲時部附錄十二首

卷二

地部六十首

山部四十九首

卷三

水部六十六首

居處部九十八首

寺觀部二十九首

卷四

人部三十九首

麗人部七十首

文部二十七首

武部二十六首

卷五

樂部五十一首

樂部附錄三首

巧藝部三十一首

器用部一百一首

雜玩部十一首

卷六

玉帛部十六首

冠服部二十六首

飲食部三十四首

菓部三十三首

穀部八首

蔬部十二首

卷七

花部一百三十首

花部附錄五首

木部四十一首

木部附錄八首

草部二十二首

卷八

禽部七十五首

獸部三十二首

鱗介部十六首

昆蟲部四十一首

咏物詩選目錄

卷一

天部

日

曉日

望蚤日

日午

夕陽

又

返照

賦得秋日懸清光

月

又

新月

又

又

月圓

皓月

秋月

月夜

八月十五夜月

中秋月

鶴林寺中秋夜玩月

中秋待月

湖中玩月

十五夜望月

海上生明月

府試殘月如新月

華州試月中桂

星

牛女星

壽星見

天河

風

又

又

賦得風不鳴條

雲

又

春雲

夏雲

孤雲

慶雲

晚霞

雨

又

細雨

微雨

春雨

連雨漲江

對雨

又

夜窗聽雨

聞雨

春夜喜雨

久旱喜雨

旅館遇雨

芒種過後經旬無日不

雨

監試夜雨滴空階

夏夜雨

大雨

晴

雨晴

又

初晴

又

春晴
春霽
途中晴
霧
水邨霧
曉行遇霧
露
又
又
霜
霜花
雪

又
又
對雪
春雪
又
江雪
和王員外晴雪早朝
雪後書北臺壁
韓舍人書齋殘雪
雪中偶題
雪行
霰

雷
電
虹
暮虹
歲時部
立春
又
元日立春感歎有作
人日立春
迎春東郊
歲旦
元旦試筆

己酉元旦

元日觀朝

元日早朝

人日

正月十五夜

十五夜游

長安元夜

元夜

元宵

十五夜御前口號踏歌詞

又

花朝

社日

又

寒食前有懷

寒日

鄜州寒食

又

又

清明登城春望寄王使

君

長安清明

清明日對酒

清明即事

清明日賜百官新火

清明

上巳

上巳日花下閒看

上巳

上巳看花次韻

晚春

暮春即事

和人暮春書事寄崔秀

才

春暮有感

暮春陰

春盡日
春日
又
春日宴起
春日書院
春日閑居
春歌
春曉
春夜
又
春色滿皇州
春行

春景
山中立夏即事
盛夏
初夏閑居即事
初夏
又
貞谿初夏
午日庭宴
許長卿水亭五日
揚州端午呈趙帥
大暑
暑中閑咏

消暑
橋南納涼
六七月之交山中涼甚
奉和夏日應令
夏日
夏日偶成
夏夜
夏景
立秋
立秋日
又
新秋

又

新秋示盛伯宣

七夕

又

又

又

池塘七夕

中秋

又

九日藍田崔氏莊

九日齊山登高

重陽日訪元秀上人

九日

九日宴

重九

暮秋感興

江亭晚秋

秋晚高樓

秋日

又

又

長安卧病秋夜言懷

西齋秋夜

長安秋夜

山間秋夜

江館秋夕

感秋

秋興

秋懷

秋色

秋景

立冬

初冬

小至

至節即事

南至日太史登臺書雲

物

寒夜

臘月下旬偶作

臘日

除夜

除夜作

守歲侍宴應制

冬日

冬夜

冬景

歲時部附錄

曉

曉色

商山蚤行

秋日蚤行

江上蚤行

晚步

夜

夜景

夜景又作

夜半

夜坐

閏月定四時

卷二

地部

城

長城

登故洛陽城

城上

登杭州城

出郭

市

天街

道

洛陽道

長安道

大道曲

蜀道難

穆陵路

西郊

春郊

郊墅

初夏郊行

白花原

春村

山村

春日江村

暮過山村

游山西村

村居書喜

江村即事

鄉村即事

稻田

野田

野望

又

又

吳興新堤

堤上行

又

秋岸

橋

出關

題盤頭驛水館後軒

題黃花驛

烏衣巷

塞上

塞上曲

塞下曲

邊上

古戰場

金陵

過秦始皇陵

燕昭王墓

題蘇小小墓

和人題貞孃墓

題朱買臣妻墓

過亡友墓

漂母墳

蔡中郎墓

邙塚

青塚

焚書坑

塵

山部

山

遠山

秋山極天淨

山居即事

題友人山居

山行

又

又

又

登泰山

華山

又

送友人遊嵩山

遊鍾山

登石鍾山望廬山

金山

終南山

茅山

茅山道中

望天門山

送齊山人歸長白山

宿石邑山中

高景山夜歸

早發定山

經麻姑山

天平山寺

虎邱咏

巫山高

峽中

登發天台中巖寺度關嶺

次天姥岑

登石門最高頂

中岑

雲際中峯

度大庾嶺

登嶺望

西巖

夏日登鶴巖

題合谿乾洞

駱谷晚望

登江中孤嶼

假山

又

和人假山

太湖石

省試昆明池織女石

望夫石

西施石

醒酒石

石灰

卷三

水部

水

流水

新安道中玩流水

水檻遺心

遠水	水紋	海望	九月二十日夜渡海	海上雜歌	長江	凌朝浮江旅思	江行	宿巴江	漢江	漢江臨泛	富春
----	----	----	----------	------	----	--------	----	-----	----	------	----

曲江春望	河流	黃河	自華洛舟行入黃河即	事寄府縣寮友	渡淮	中元夜泊淮口	洛水	渡湘水	臨洞庭湖	洞庭	秋晚過洞庭
------	----	----	-----------	--------	----	--------	----	-----	------	----	-------

鄱陽湖	太湖秋望	九鯉湖	南湖	西湖	湖上	湖景	過女兒浦	溪上	利州南渡	過蠻溪渡	廬山桑落洲
-----	------	-----	----	----	----	----	------	----	------	------	-------

龍潭

滁州西澗

嚴陵灘

山下泉

憶山泉

泉

瀑布

和尚書咏泉山瀑布十二

韻

題雙瀑

廬山瀑布

江湖

錢塘觀湖

看濤

小池

秋池

和韋承慶過義陽公主

山池

又

又

從岐王夜宴衛家山池

應教

興慶池侍宴應制

又

池上

元處士池上

御溝

和崔校書新穿井

府試水始冰

冰花

居處部

宮中行樂詞

又

又

敕借岐王九成宮避暑

應教

和賈至舍人早朝大明宮

之作

又

古行宮

經古行宮

隋宮

長信宮

宮詞

又

又

又

又

又

紫宸殿退朝口號

門

晚出左掖

春宿左省

中秋禁直

翰林齋宿

入直

漢苑行

樓

登兗州城樓

黃鶴樓

登樓

鵲雀樓

岳陽樓晚望

南樓

煙雨樓

江樓

單同年求德興俞氏聚

遠樓詩

亭臺

司天臺

草閣

題宣義池亭

春日宴送主簿山亭得寒

字

蔡起居山亭

謝公亭

溪亭

懷真珠亭

夏日題老將林亭

遊朱坡故少保杜公林亭

山亭夏日

宋氏林亭

題隱霧亭

深院

東堂新成

孟秋過龍武李將軍書

齋

錢塘青山李隱居西齋

書齋漫興

南軒

題碧藻軒

題李處士幽居

題盧處士居

經李徵君故居

次韻二守許過新居

宅

侍宴安樂公主新宅應

制

題田將軍宅

廢宅

育溪江令公宅

公子家

又

尋山家

張谷田舍

南溪別業

蘇氏別業

題友人別業

寄題戴氏別墅

城西訪友人別業

奉和辛韋嗣立山莊應制

同李舍人冬日宴安樂公

主山莊

陸渾山莊

過故人莊

陳使君山莊

園

小園

春日芙蓉園侍宴應制

石季倫金谷故園

新開小園

又

暢春園即景

又

春園家宴

秋園

邨園

遊東湖黃處士園林

積芳園

鹿柴

竹里館

山館

又

江館

宿江店

浴室

寺觀部

題杭州靈隱寺

過香積寺

山寺

題重居寺

澠湖山寺

涪城縣香積寺官閣

酬錢起秋夜宿靈臺寺

見寄

開聖寺

宿山寺

遊法興寺

題解空寺

題義公禪房

破山寺後禪院

題崇福寺禪院

題興善寺寂上人院

僧院

生公講堂

宿無可上人房

翠峯卷即事

登總持塔

題慈恩塔

終南山白鶴觀

題仙遊觀

春日鎮陽柳谿道院

禹廟

周瑒廟

野廟

荒祠

重過聖女祠

卷四

人部

田家

又

農謠

宿漁家

西江上送漁父

釣翁

淮上漁者

樵子

樵者

牧童

僧

送靈澈上人還越

送無可上人遊觀

贈日本鑒禪師

贈道士

贈楊鍊師

貴公子

長安少年行

又

又

少年行

情

母

春思

又

秋思

又

春宮怨

宮怨

又

春怨

又

西宮春怨

西宮秋怨

恨

閒

影

夢

春夢

麗人部

岐王席上咏美人

天津橋上美人

杜丞相筵上美人

贈美人

又

美人

又

又

又

陌上美人

題贈美人

又

開府席上賦得佳人名解

愁

貧女

邨女

春女

採蓮女

採薪女

東鄰美女

宮女

又

閨婦

繡婦

王家少婦

夜觀妓

五日觀妓

贈妓

席上贈妓

贈歌妓

別妓

老妓

王郎中席上歌妓

送妓人出家

美人繡障

美人刺繡

美人雙陸

美人垂釣

美人騎馬

美人插花

美人對月

美人燒香
美人忍笑
佳人半睡
內人晝眠
美人卧
又
美人早起
行
浴
初日看婚
新婚曉
新婚夕

新嫁孃
新粧
新上頭
花燭詞
又
又
雲鬢
欲曉看粧面
耳
肩
乳
臂

手
又
紅指甲
足
小尼師
還俗尼
文部
經
史
又
詩
又

論詩

覽楊校書文卷

飛白雲書

禁直觀御書

內狀

紙

尚書新造花箋

酬惠箋紙

謝靜遠惠紙

謝吳宗師惠墨

筆

又

宣州筆

鼠鬚筆

遠山筆架

水晶筆架

硯

古石硯

謝惠紫石硯

尚書命題瓦硯

硯池

詩瓢

武部

弓

又

箭

弩

彈

刀

劍

和周侍御買劍

觀淬龍泉劍

贈劍客

戈

矛

旌

旗

夕烽

宿温城望軍營

蕪州行營作

從軍行

又

又

封大夫破播仙凱歌

觀獵

又

觀浙西府相畋遊

射雕騎

射柳

卷五

樂部

歌

又

和人聽歌

舞

又

應合咏舞

周員外席上觀柘枝

數陪李梓州泛江有女

樂在諸舫戲為詠曲

二首贈李。

又

與牛家妓樂雨夜合宴

鐘

遠寺鐘

鼓

琴

又

聽趙秀才彈琴

夢遊洛中聞琴

風琴

聽胡琴

瑤琴

錦瑟

湘靈鼓瑟

箏

觀搗箏

聞鄰家理箏

夜箏

琵琶

又

又

夜聽琵琶

聽彈箏樣

笙

銀河吹笙

聽鄰家吹笙

聞吹簫

吹笛

宿巴陵聞笛

春夜洛城聞笛

秋夜聞笛

胡笳曲

邊上胡笳

聽曉角

晚泊潤州聞角

江宿聞蘆管

木魚

拍板

方響

聞方響

風箏

又

檐馬

樂部附錄

宿堽公禪房聞梵

秋夜北山精舍觀體如

師梵

府試中元節觀道流步虛

巧藝部

題王右丞山水障子

又

題千里山水長幅

題可老所藏徐明叔畫卷

題畫

千里江山圖

題山水卷

嚴公廳宴共咏蜀道畫圖

襄陽圖

金陵圖

片雲圖

水墨松石

畫松

題喬夫人墨竹

題畫蘭

扇上畫牡丹

題扇面荷花

寫真

題唐六如紅拂妓

門神

畫鶴

西洋畫

觀棋

觀奕

官莊池觀競渡

鞦韆

又

蹴鞠

踢球

傀儡吟

影戲

器用部

銅儀

寒漏

尚書郎上直聞春漏

謝許鍊師惠圖書

題印囊

車

和李秋谷平章小車詩

舟

採蓮舟

放舟

秋夜泛舟

秋夜船行

夜泛

夜船

小舫

憶釣舟

帆

江帆

使風

賦桴送人

中和節詔賜公卿尺

畫屏

寒林石屏風

帷

簾

又

又

琉璃簾

獲周豐鼎見博古圖第

三卷銘六字

香鴨

別春爐

手爐

燈

又

又

又

書燈
書舍寒燈
蓮燈
水燈
走馬燈
閨雛燈
鞋燈
燈花
又
挑燈杖
燭
蠟燭

燭剪
錄香
魏城馬南瑞以異香見
遺為賦
香桌
木炭
煙
遠煙
南至日隔仗望含元殿
爐烟
烟火戲
鏡

古鏡
又
對鏡
扇
又
摺疊扇
牀
白角簾
席
決明甘菊枕
蒲團
龍杖

紅藤杖

湘竹杖寄無任

水晶念珠

竹夫人

錫婆

織錦機

熨衣斗

擣衣石

聞砧

剪刀

又

茶鐺

題真上人竹茶爐

貢餘秘色茶盞

咏柳夢府山櫻木樽

螺杯

夜光杯

酒旗

藥鼎

花瓶

象牙梳

眼鏡

水晶環

碧鈿指環

玉指環

斧

鋸子

釣絲

青

胭脂

烟筒

雜玩部

鰲山

觀鰲山

骰子

爆竹

卷六

玉帛奇

玉

珠

奉試明堂火珠

雙陸

紙鳶

又

泥孩兒

戲咏不倒翁

繭花

珊瑚

水精

琉璃

琥珀

金

銀

錢

錦

繡

綾

羅

高氏姊惠素羅

布

冠服部

山友贈薜花冠

酬贈葛巾

華陽巾

白油帽

窮笠

答友人惠牙簪

包頭

賀盧員外賜緋

賜錦袍

謝賜衣

端午日賜衣

新製綾襖成感而有咏

竹衫

漁蓑

半臂

襪

賦得履

梭鞋

繡鞋

睡鞋

複裙

被

虎皮褥

紙帳

尚書筵中咏紅手帕

鮫綃帕

飲食部

謝青餽飯

酬寄賜粥

粉丸

茶

嘗茶

啖中嘗茶

嘗雲芝茶

對茶

尚書惠蠟面茶

雪煎茶

茶烟

酒

屠蘇酒

菖蒲酒

泗州除夜雪中黃師是

送酥酒

對酒

看壓新醅

又

河南府試鄉飲酒

侍宴甘泉殿

廣達樓下夜侍哺宴應制

秋夜宴臨津鄭明府宅

前塘夜宴留別郡守

陪金陵府相中堂夜宴

長安春舍敘卽陵舊宴懷

永門蕭使君

又

糟魚

糖霜

豆腐

梅醬

雲母散

人參

病中宜扶苓寄李諫議

烟

果部

李

食梅

梅

桃

勅賜百官櫻桃

白櫻桃

楊梅

謝紹興師郎宗卿惠楊

梅

枇杷

榴火

棗

栗熟

梨

奉和揀貢橘

謝惠春橘

佛手柑

金柑

柿

銀杏

荔枝

又

龍眼

橄欖

葡萄

又

又

蓮實

蓮

觀貢藕

賜藕

菱

食西瓜

紅瓢瓜

穀部

觀稻

茆堂檢枝刈稻

挿秧

米

麥

麥浪

蚕豆

豇豆

蔬部

題菜

櫛菜

諸葛菜

紫芥

蓴菜

蘆菹

嘗山藥

謝姜寬送芋子

王瓜

絲瓜

薑

花椒

卷七

花部

梅花

又

又

又

冬梅

紅梅

又

綠萼梅

鴛鴦梅

岸上梅

鹽梅

桃花

又

又

又

白桃花

李花

又

杏花

又

梨花

又

次韻梨花

又

在掖梨花

山石榴花十二韻

海榴

水林擒花

桂

木犀

又

紅木犀	又	牡丹
玉蘭	又	又
木蘭花	西府海棠	又
辛夷花	垂絲海棠	追和白舍人咏白牡丹
木筆花	秋海棠	白牡丹
山茶	又	應制粉紅雙頭牡丹
白山茶	又	芍藥
玉蕊花	白秋海棠	又
紫薇花	繡球花	瑞香
又	夜合花	夾竹桃
紫藤花	槿花	茉莉花
海棠	楊花	又

又
香薇
又
又
玫瑰花
司直巡官無諸移到玫瑰
花
月季花
醖醖
又
凌霄花
素馨花

芳蘭
蘭
並蒂蘭
珠蘭
桂蘭
菊
又
又
和魯望白菊
紅菊
西施菊
秋菊有佳色

僧鞋菊
芙蓉
木芙蓉
又
紅芙蓉
賦得芙蓉出水
蜀葵
又
又
秋葵
使院黃葵花
杜鵑花

虞美人

又

剪春羅

金燈花

玉燭花

螢花

又

石竹花

洛陽花

金錢花

玉簪花

又

蛺蝶花

麗春花

紫竹花

鳳仙花

金鳳花

鷄冠花

蓮花

竝頭蓮花

池蓮

白荷花

新荷

水仙花

蓼花

朱蓼

又

白蘋花

花部附錄

賦得花影

嘆落花

落花

惜花

殘花

木部

松

題子姪書院雙松

貢院樓北新栽小松

小松

羅漢松

古柏

檜樹

題中峯杉徑

榆錢

又

槐

又

桐

孤桐

高桶

石楠

楸樹

冬青樹

桑

櫻樹

梔子

木瓜

柳

又

又

又

又

又

楊柳枝詞

又

柳邊

竹

又

又

庭竹

新竹

又

長竹

斑竹

筍

謝劉仲行惠筍

本部附錄

紅樹

枯樹

賦得江邊樹

河邊枯草

紅葉

落葉

葉落

綠陰

草部

春草

曲江春草

芳草

庭草

吉祥草

鳳尾草

寄生草

書庭蕉

蕉葉

菖蒲

老少年

鴈來紅

蘆

蘆花

蒲

萍

苔

又

苔錢

春苔

垣衣

卷八

禽部

鳳

孔雀

鶴

又

又

獨鶴

病鶴

鴈

新鴈

聖鴈

白鴈

孤鴈

又

鴈字

又

京兆府試出籠鵲

白海青

鷹

又

雉

鳥

歸鴉

鷓鴣

又

子規

又

鵲

鸚鵡

又

白鸚鵡

畫眉

又

又

鶯	又	黃鶯	聽宮鶯	燕	又	白燕	又	駐燕	新燕	歸燕	燕雛
百舌	又	春鳩	白鴿	雀	又	花上白頭翁	戴勝	啄木	桐花鳥	鴛鴦	又
又	鷗	白鷗	池上雙兔	雙白鷺	鷺	又	鷗鷺	鷗鷺	翡翠	水鳥	鷄

聞雞

鷄鳴

雞雛

花鴨

鵝

舟前小鵝兒

歌部

麟

獅

象

虎

豹

熊

紫騮馬

又

驄馬

觀內廐焉

房兵曹胡馬

病馬

案駝

天馬詞

代牛言

牛

羊

老牛

題犬

金絲犬

猿

白鹿

猿

夜猿

白兔

又

乞猫

黑兔

猫兒

懶猫

銀鼠

碩鼠

鱗介部

龍

雷雨起龍

鯉魚

黃魚

金魚

又

比目魚

白小

燕窩

小魚

龜

放龜

賦得蟹送人之官

酬寄海蟹

蛤蜊

海蜇

昆蟲部

蠶

蟬

又

又

又

夜蟬

聞蟬

蜂

又

又

又

蝴蝶

又

又

又

又 黃蝶 白蝶 蛙 蝌蚪 紅蜻蜓 螢 又 又 又 又 聞登 促織

又 戲題聞促織 絡緯 紡織婆 蒼蠅 蚊 蝶子 浮塵子 巴蛇 蜘蛛 蛛網 壁魚

蟻 蝸牛

[illegible]

咏物詩選卷一

魏塘俞 琰長仁輯

天部

日

旦出扶桑路。遙升若木枝。雲間五色滿。霞際九光披。東陸蒼龍駕。南郊赤羽遲。傾心比葵藿。朝夕奉光曦。

曉日

天際霞光入水中。水中天際一時紅。直須日觀三更後。首送金烏上碧空。

望蚤日

唐朱慶餘

窗下聞雞後。蒼茫映遠林。纔分天地色。便禁虎狼心。是處程途遠。何山洞府深。此時堪野望。萬象豁塵襟。



(南)

唐李嶠

唐韓偓

日午

唐虞世南

高天淨秋色。長漢轉義車。玉樹陰初正。桐圭影未斜。翠蓋悉圓彩。明鏡發輕花。再中良表瑞。共仰璧暉賒。

夕陽

唐鄭谷

夕陽秋更好。潋潋蕙蘭中。極浦明殘雨。長天急遠鴻。僧窗留半榻。漁舸透疎篷。莫恨清光盡。寒蟾即照空。

又

唐韓偓

花前洒淚臨寒食。醉裏回頭問夕陽。不管相思人老盡。朝朝容易下西牆。

返照

唐杜甫

返照開巫峽。寒空半有無。已低魚復暗。不盡白鹽孤。荻岸如秋水。松門似畫圖。牛羊識重徼。阮夕應傳呼。

賦得秋日懸清光

唐王維

寥廓涼天淨。晶明白日秋。圓光含萬象。碎影入間流。迴與青冥合。遙同江甸浮。晝陰殊衆木。斜影下危樓。宋玉登高怨。張衡望遠愁。餘暉如可托。雲路豈悠悠。

月

梁沈約

月華臨靜夜。夜靜滅氛埃。方暉竟戶入。圓影隙中來。高樓切思婦。西園遊上才。網軒映朱綴。應門照綠苔。洞房殊未曉。清光信悠哉。

又

唐杜甫

四更山吐月。殘夜水明樓。塵匣元開鏡。風簾自上鉤。兔應疑鶴髮。蟾亦戀貂裘。斟酌嫦娥寡。天寒耐九秋。

新月

唐方干

入夜天西見。娥眉冷素光。潭魚驚釣落。雲鴈怯弓張。隱隱臨珠箔。微微上粉牆。更憐三五夕。仙桂滿輪芳。

又

唐徐寅

雲際嬋娟出。又藏。美人腸斷拜金方。嫦娥一隻眉光掃。織女三分鏡未先。珠箔寄鉤懸香露。白龍遺爪印穹蒼。更期十五圓明夜。與破陰靈照八荒。

又

唐羅隱

禁鼓初聞第一敲。卧看新月出林梢。誰家寶鏡初磨出。匣小參差蓋不交。

月圓

唐杜甫

孤月當樓滿。寒江動夜扉。委波金不定。照席綺逾依。未缺空山靜。高懸列宿稀。故園松桂發。萬里共清輝。

皓月

明祝允明

玉田金界夜如年。大地人間事幾千。萬籟蕭蕭微不辨。露繁霜重月盈天。

秋月

唐戎昱

秋宵月色勝春宵。萬里天涯淨寂寥。近來數夜飛霜重。只畏娑婆樹葉凋。

月夜

唐杜甫

今夜鄜州月。閨中只獨看。遙憐小兒女。未解憶長安。香霧雲鬟濕。清輝玉臂寒。何時倚虛幌。雙照淚痕乾。

八月十五夜月

唐僧棲白

尋常三五夜。豈是不婁娟。及至中秋半。還勝別夜圓。清光疑有露。皓色爽無烟。自古人皆望。年來復一年。

中秋月

宋蘇軾

暮雲收盡溢清寒。銀漢無聲轉玉盤。此生此夜不長好。明月明年何處看。

鶴林寺中秋夜玩月

唐許渾

待月東林月正圓。廣庭無樹復無烟。初更雲淨出滄海。半夜露寒當碧天。輪影漸移金殿外。鏡光猶挂玉樓前。莫辭達曙殷勤望。一墮西巖又隔年。

中秋待月

唐陸龜蒙

轉缺冰輪上轉遲。好風偏似送佳期。簾斜樹隔情無限。燭暗香殘坐不辭。最愛笙調聞北里。漸

看星淡失南箕。何人爲校清涼力。欲減初圓及午時。

湖中玩月

明張紳

銀波千頃照神州。此夕人間別是秋。地與樓臺相上下。天隨星斗共沉浮。一塵不向空中住。萬象都於物外求。醉吸清華遊碧落。更從何處覓瀛洲。

十五夜望月

唐王建

中庭地白樹棲鴉。冷露無聲濕桂花。今夜月明人盡望。不知秋思在誰家。

海上生明月

唐宋華

皎皎秋中月。團團海上生。影開金鏡滿。輪抱玉壺清。漸出三山上。將凌一漢橫。素娥嘗藥去。烏鵲繞枝驚。照水光偏白。浮雲色最明。此時堯砌下。蓂莢正敷榮。

府試殘月如新月

唐鄭谷

榮落何相似。初終却一般。猶疑和夕照。誰信墮朝寒。水國輝華別。詩家比象難。佳人應誤拜。樓鳥反求安。屈指期輪滿。何心謂影殘。庾樓精賞處。吟徹曙鐘看。

華州試月中桂

唐張喬

與月轉鴻濛。扶疎萬古同。根非生下土。葉不墜秋風。結蕊圓時足。低枝缺處空。影超羣木外。香滿一輪中。未種丹霄日。應虛白兔宮。如何同片玉。散植在堂東。

星

明許穀

麗天疑有質。連貝各星輝。森布標分野。羣來捧太微。宵占賢士聚。曉覺故人稀。獨喜旄頭落。天南奏凱歸。

牛女星

唐宋之問

粉席秋期緩。針樓別怨多。奔龍爭渡月。飛鵲亂填河。失喜先臨鏡。含羞未解羅。誰能留夜色。來夕倍還梭。

壽星見

唐盧渥

元象今何應。時和政亦平。祥爲一人壽。色映九霄明。皎潔垂銀漢。光芒近斗城。含規同月滿。表瑞得天清。甘露盈條降。非烟向日生。無如此嘉祉。率土荷秋成。

詩有寄
記

天河

唐杜甫

常時任顯晦。秋至最分明。銀浦微雲掩。終能永夜清。含星動雙闕。伴月落邊城。年年渡何曾風浪生。

風

唐太宗

蕭條起關塞。搖颺下蓬瀛。拂林花亂彩。響谷鳥分聲。披雲羅影散。泛水織文生。勞歌大風曲。威加四海清。

又

唐李山甫

詩有寄
記

香惹寒暄直不勻。終無形狀始無因。能將塵土平欺客。愛把波瀾枉陷人。飄藥遞香隨日在。綻花開柳逐年新。深知造化由君力。誠為吹噓借與春。

又

唐李嶠

解落三秋葉。能開二月花。過江千尺浪。入竹萬竿斜。

賦得風不鳴條

唐舒元興

五緯起祥飈。無聲識聖朝。稍開含露蕊。纔轉惹煙條。密葉應潛長。低枝且暗搖。林間鶯自囀。花下蝶微飄。但偃綠堤草。能扶出水苗。太平無一事。天外奏虞韶。

雲

唐董思恭

帝鄉白雲起。飛蓋上天衢。帶月綺羅映。從風枝葉敷。參差過層閣。倏忽下蒼梧。因風望既遠。安得久踟躕。

又

唐鄭一準

片片飛來靜又閒。樓頭江上後山前。飄零盡日不歸去。賸破清光萬里天。

春雲

唐鄧倚

搖曳日西東。依林又逐風。勢移青道裏。影泛綠波中。夕霽方明日。朝陰復蔽空。度關隨去馬。出塞引飛鴻。色任寒暄變。光將遠近同。爲霖如見用。還得助成功。

夏雲

唐曹松

勢能成穢仞。頃刻長崔嵬。暝鳥飛不到。野風吹得開。一天分萬態。立地看忘回。欲結暑宵雨。先

聞江上雷。

孤雲

唐于鄴

南北各萬里。有雲心更閒。因風離海上。伴月到人間。洛浦少高樹。長安無舊山。徘徊不可駐。漠漠更東還。

慶雲見

唐李紳

禮成中岳陳金冊。祥報慶雲冠玉峯。輕未透林疑待鳳。細非行雨詎從龍。卷風變彩霏微薄。照日籠光映隱重。還入九霄成沆瀣。夕嵐生處鶴歸松。

晚霞

宋朱子

日落西南第幾峯。斷霞千里抹殘紅。上方傑閣憑欄處。欲盡餘暉怯晚風。

雨

唐李嶠

西北雲膚起。東南雨足來。靈童出海見。神女向臺迴。斜影風前合。圓紋水上開。十旬無破塊。九土信康哉。

又

唐杜牧

連雲接塞添迢遞。灑幕侵燈送寂寥。一夜不眠孤客耳。主人牕外有芭蕉。

細雨

李商隱

滿庭滌傍迴汀。依微過短亭。氣涼先動竹。點細未開萍。促高稍高燕。微疎的的螢。故園煙草色。仍近五門青。

微雨

唐吳融

天青濕未遍。風急舞難成。粉重低飛蝶。黃沉不語鶯。自隨春靄亂。還放夕陽明。惆悵池塘上。荷珠點點傾。

春雨

霏霏漠漠暗和春。翠幕凝紅色更新。寒入膩裘濃曉睡。細隨油壁靜香塵。連雲似織休迷雁。帶柳如啼好贈人。別有空堦寂寥事。綠苔狼籍落花頻。

連雨漲江

宋蘇軾

急雨瀟瀟作晚涼。卧聞檐葉響長廊。微明燈火耿殘夢。半濕簾帷泥舊香。高浪隱牀吹甕盎。暗風驚樹擺琳琅。先生不出晴無用。留向空堦滴夜長。

對雨

唐李 白

卷簾聊舉目。露濕草綿綿。古岫披雲毳。空庭織碎烟。水紋愁不起。風線重難牽。盡日扶犁叟。往來江樹前。

又

唐劉 兼

幽庭凝碧亦連漪。簷雷聲聒聒夢歸。半岫金烏纔委照。一川石燕又交飛。濯枝露霽榴花發。吹渚飄銀暑氣微。因憶故園垂釣處。蒼苔班駁滿漁磯。

夜窗聽雨

明李東陽

瀟瀟殘雨入深更。半濕疎窗半拂楹。芳草池塘應有夢。落花庭院不勝情。聽疑野寺昏鐘遠。望憶江船夜火明。明日曉晴須出郭。葛衣藜杖一時輕。

聞雨

唐韓 偓

香侵蔽膝夜寒輕。聞雨傷春夢不成。羅帳四垂紅燭背。玉釵敲著枕函聲。

春夜喜雨

唐杜甫

好雨知時節。當春乃發生。隨風潛入夜。潤物細無聲。野徑雲俱黑。江船火獨明。曉看紅濕處。花重錦官城。

久旱喜雨

明羅珵

烈旱猶非久。甘霖賸足誇。密雲藏玉兔。飛電掣金蛇。豆熟豐隆莢。林分潤透花。農人忘帝力。但說好年華。

旅館遇雨

唐杜荀鶴

月華星采坐來收。嶽色江聲暗結愁。半夜燈前十年事。一時隨雨到心頭。

芒種過後經旬無日不雨

宋陸游

芒種初過雨及時。紗幮睡起角巾欹。痴雲不散常遮塔。野水無聲自入池。綠樹晚涼鳩語鬧。畫梁晝寂燕歸遲。閒身自喜渾無事。衣覆熏籠獨誦詩。

監試夜雨滴空階

唐喻 龜

雲雲復淒淒。飄松又灑槐。氣濛蛛網室。聲疊薛花階。古壁青燈暗。深庭濕葉埋。徐垂舊簷瓦。競澁小茅齋。冷與陰蟲間。清將玉漏偕。病身惟展轉。誰見此時懷。

夏夜雨

唐韓 偓

猛風飄電黑雲生。雲雲高林簇雨聲。夜久雨休風又定。斷雲流月却殘明。

大雨

宋蘇 軾

黑雲翻墨未遮山。白雨跳珠亂入船。卷地風來忽吹散。望湖樓下水如天。

晴

宋梅 聖俞

風掃天如鑑。雲開日如萍。苑花猶帶濕。蔬甲已微青。蝶翅粉應薄。塘澹波更渟。尋春不惜醉。莫笑髮星星。

雨晴

唐杜 甫

天際秋雲薄。從西萬里風。今朝好晴景。久雨不妨農。寒柳行疎翠。山梨結小紅。胡笳樓上發。一

雁入高空。

又

元兒 贊

江上白蘋風起波。冷紋縈碧暮煙和。織成一幅鴛鴦錦。零落紅衣遠恨多。

初晴

宋陸 游

睡起東窗照眼明。朝陽爛熳作新晴。已聞雨斷空階滴。更喜風從細葛生。蛺蝶飛來停酒榼。石榴飄落耀棋枰。四時好處閒方覺。不枉今年住錦城。

又

宋王安石

幅巾慵整露光華。度隴深尋一徑斜。小雨初晴天氣好。晚花殘照幾人家。

春晴

唐王 駕

雨前初見花間蕊。雨後全無葉底花。蜂蝶紛紛過牆去。却疑春色在鄰家。

春霽

宋秦 觀

一夕輕雷落萬絲。霽光浮瓦碧參差。有情芍藥含晴淚。無力薔薇臥曉枝。

途中晴

唐孟浩然

已失巴陵雨。猶逢蜀坂泥。天開斜景遍。山出晚雲低。餘濕猶沾草。殘流尚入溪。今宵有明月。鄉思遠淒淒。

霧

唐蘇味道

氤氲起洞壑。搖曳匝平疇。乍似龍合劍。還疑蜃映樓。拂林隨雨密。度徑帶煙浮。方謝公超步。終從彥輔遊。

水邨霧

宋葛長庚

淡處還濃綠。處青江風吹作雨毛腥。起從水面縈層嶂。恍似簾中見畫屏。

曉行過霧

雨餘花滴滿紅橋。柳絮沾泥夜不消。曉露忽無還忽有。春山如近復如遙。

露

唐李嶠

滴瀝明花苑。葳蕤泣竹叢。玉垂丹棘上。珠湛綠荷中。夜警千年鶴。朝零七月風。願凝仙掌內。長

奉未央宮。

又

唐韓琮

長隨聖澤墮堯天。濯遍幽蘭葉葉鮮。纔喜輕塵銷陌上。已愁新月到階前。文鵬要地成非久。珠綴秋荷偶得圓。幾處花枝抱離恨。曉風殘月淚泫然。

又

唐徐寅

鶴鳴先警雁來天。洗竹沾花處處鮮。散彩幾當蟬飲際。凝光宜對蚌胎前。朝垂苑草烟猶重。夜滴宮槐月正圓。怵惕與霜同降日。蘋蘩思薦獨凄然。

霜

應節誰窮造化端。菊黃豺祭問應難。紅窗透出鴛衾冷。白草飛時雁塞寒。露結芝蘭瓊屑厚。日乾葵蘂粉痕殘。世間無此摧搖落。松竹何人肯便看。

霜花

元謝宗可

粲粲瓊英借露浮。日高還付水東流。剪裁應費金神巧。開落從教玉女愁。有艷淡粧宮瓦曉。無

香寒壓板橋秋。五更不怕樓頭角。吹到梅花特地稠。

雪

唐聶夷中

雲容四野合。日色斂光華。一夜寒生骨。滿天風散花。遠山銀鶴聚。老樹玉龍斜。豫報豐年兆。甌
窰定滿家。

又

唐吳融

灑密蔽璇宮。霏霏杳莫窮。遲於雨到地。疾甚絮隨風。四野蒼茫際。千山晃朗中。夜迷三遠鵲。晝
斷一行鴻。結片飛瓊樹。栽花照蕊宮。壅應邊盡北。填合海無東。高愛危峯積。低愁暖氣融。月交
都浩渺。日射更玲瓏。送臘辭寒律。迎春入舊叢。自憐曾未至。聊復賦元功。

又

元黃庚

片片隨風整復斜。飄來老鬢覺添華。江山不夜月千里。天地無私玉萬家。遠岸未春飛柳絮。前
村破曉壓梅花。羔羊金帳應粗俗。目掬冰泉煮石茶。

對雪

唐李商隱

旋撲珠簾過粉牆。輕於柳絮重於霜。已隨江令誇瓊樹。又入盧家妬玉堂。侵夜可能爭桂魄。忍寒應欲試梅粧。關河凍合東西路。腸斷斑驂送陸郎。

春雪

宋元德明

幾日韶華雪更侵。龍公試手本無心。寒留整整斜斜態。暖入融融洩洩陰。著柳直疑香絮重。攔堦何似落花深。前頭桃李應無恙。賸破相如賣賦金。

又

唐韓愈

新年都未有芳華。二月初驚見草芽。白雪却嫌春色晚。故穿庭樹作飛花。

江雪

唐柳宗元

千山鳥飛絕。萬徑人踪滅。孤舟蓑笠翁。獨釣寒江雪。

和王員外晴雪早朝

唐錢起

紫微晴雪帶恩光。繞仗偏隨鷺鷥行。長信月留寧避曉。宜春花滿不飛香。獨看積素凝清禁。已覺輕寒讓太陽。題柱盛名兼絕唱。風流誰繼漢田郎。

雪後書北臺壁

宋蘇軾

城頭初日始翻鵝。陌上晴泥已沒車。凍合玉樓寒起粟。光搖銀海眩生花。遺蝗入地應千尺。宿麥連雲有幾家。老去自嗟詩力退。空吟冰柱憶劉叉。

韓舍人畫齋殘雪

唐戎昱

風捲黃雲暮雪晴。江烟沈盡柳條輕。檐前數片無人掃。又得書牕一夜明。

雪中偶題

唐鄭谷

亂飄僧舍茶烟濕。密灑歌樓酒力微。江上晚來堪畫處。漁人披得一蓑歸。

雪行

宋元德明

五更驢背滿靴霜。殘雪離離草樹荒。身在景中無句寫。却教人比孟襄陽。

霰

宋楊萬里

雪花遣霰作前鋒。勢破張皇欲暗空。篩瓦巧尋疎處漏。跳階誤到暖邊融。寒聲帶雨山難白。冷氣侵人火失紅。方訝一冬暄較甚。今宵敢嘆卧如弓。

雷

唐杜甫

巫峽中宵動。滄江十月雷。龍蛇不成蟄。天地劃爭迴。却碾空山過。深蟠絕壁來。何須妬雲雨。霹靂楚王臺。

電

俞琰

造物神奇豈有涯。雲端閃爍掣金蛇。一痕急逗狂雷信。萬焰紛隨暴雨撾。散去星輝疊復見。掀開月色瞥還遮。幽窗降鑒頻三四。照盡人心正與邪。

虹

王杜

誰向長空駕彩橋。輕紅淺綠共迢迢。現時忽傍疏林挂。斷處旋隨薄暝銷。乍訝龍光晴貫目。還疑寶氣夜冲霄。雲情雨意知多少。總付江郎賦裏描。

暮虹

元黃庚

浮雲開合晚風輕。白鳥飛邊落照明。一曲彩虹橫界斷。南山雷雨北山晴。

立春

唐韋莊

青帝東來日。馭遲。暖煙輕逐曉風吹。闕袍公子樽前覺。錦帳佳人夢裏知。雪圖作開紅菜甲。綠
櫺新剪綠楊絲。殷勤爲作宜春曲。題向華牋貼繡楣。

又

宋張栻

律回歲晚水霜少。春到人閒草木知。便覺眼前生意滿。東風吹水綠參差。

元日立春感歎有作

宋范成大

元日兼春日。霜寒又雪寒。併煩傳菜手。同捧頌椒盤。疊膝稀穿履。扶頭懶整冠。五年如此度。寧
得諱衰殘。

人日立春

唐盧仝

春度春歸無限春。今朝方始覺成人。從今克己應猶及。願與梅花俱自新。

東郊迎春

唐皇甫冉

曉見蒼龍駕。東郊春已迎。綠雲仗天合。元象泰階平。佳氣山川秀。和風政令行。鈞陳霜騎肅。御
道雨師清。律向韶陽變。人隨草木榮。遙瞻上林苑。今日遇遷鶯。

歲旦

宋 宋伯仁

居間無賀客。早起只如常。桃版隨人換。梅花隔歲香。春風回笑語。雲氣卜豐穰。柏酒何勞勸。心平壽自長。

元日試筆

明 陳憲章

天上風雲慶會期。廟謨爭遣草茅知。鄰牆旋打娛賓酒。稚子齊歌樂歲詩。老去又逢新歲月。春來更有好花枝。晚風何處江樓笛。吹到東溟月上時。

己酉元日

宋 陸游

夜雨解殘雪。朝陽開積陰。桃符呵筆寫。椒酒過花斟。岸柳搖風蚤。街泥濺馬深。行宮放朝賀。共識慕堯心。

元日觀朝

唐 厲元

玉座臨新歲。朝盈萬國人。火連雙闕曉。仗列五門春。瑞雪銷鴛瓦。祥光在日輪。天顏不敢視。稱賀拜空頻。

元日早朝

唐耿 漳

九陌朝臣滿。三朝侯鼓賒。遠珂時接輿。攢炬偶成花。紫貝爲高闕。黃龍建大牙。參差萬戟合。左右八貂斜。羽扇紛朱檻。金爐隔翠華。微風傳曉漏。曉日上春霞。環珮聲重疊。臺吏服等差。樂和天易感。山固壽無涯。渥澤千年聖。車書四海家。盛明多在此。誰得守蓬麻。

人日

唐杜 甫

此日此時人共得。一談一笑俗相看。樽前柏葉休隨酒。勝裏金花巧耐寒。佩劍銜星聊暫拔。匣琴流水自須彈。蚤春重引江湖興。直到無憂行路難。

正月十五夜

唐蘇味道

火樹銀花合。星橋鐵鎖開。暗塵隨馬去。明月逐人來。遊妓皆穠李。行歌盡落梅。金吾不禁夜。玉漏莫相催。

十五夜遊

參夕重門啓。遊春得夜芳。月華連晝色。燈影耀星光。南陌青絲騎。東鄰紅粉粧。管絃遙弄曲。羅

綺暗聞香。入擁行路歌。車攢聞舞場。經過猶未已。鐘鼓出長楊。

長安元夜

唐袁不約

鳳城連夜九門通。帝女皇妃出漢宮。千乘寶車珠箔捲。萬條銀燭碧紗籠。歌聲緩過青樓月。香氣潛來紫陌風。長樂曉鐘歸騎後。遺簪落翠滿街中。

元夜

宋朱淑真

月滿今宵霽色澄。深沉簾幙管絃清。誇毫闥彩連仙館。墜翠遺珠滿帝城。一派笑聲和鼓吹。六街燈火樂昇平。歸來禁漏餘三四。窗上梅花瘦影橫。

元宵

明唐寅

有燈無月不娛人。有月無燈不算春。春到人間人似玉。燈燒月下月如銀。滿街珠翠遊村女。沸地笙歌賽社神。不展芳尊開口笑。如何消得此良辰。

十五夜御前口號踏歌詞

唐張說

花萼樓前雨露新。長安城裏太平人。龍銜火樹千燈豔。雞踏蓮花萬樹春。

又

帝宮三五歲春臺。行雨流風莫妬來。西域燈輪千影亂。東華金闕萬重開。

花朝

明湯顯祖

妬花風雨怕難銷。偶逐晴光撲蝶遙。一半春隨殘夜醉。却言明日是花朝。

社日

明甘瑾

楓樹林邊雨脚斜。兒童祈賽競喧譁。雞豚上戌家家酒。鶯燕東風處處花。野徑歸時扶醉客。叢祠祭罷集神鴉。瀕湖生意愁多潦。豫祝汗邪載滿車。

又

唐張演

鵝湖山下稻粱肥。豚糲雞樓對掩扉。桑柘影斜春社散。家家扶得醉人歸。

寒食前有感

唐溫庭筠

萬物鮮華雨乍晴。春寒寂歷近清明。殘芳荏苒雙飛蝶。曉睡朦朧百轉鶯。舊侶不歸成獨酌。故園雖在有誰耕。悠然更起嚴灘恨。一宿東風惹草生。

寒食

唐韓翃

春城無處不飛花。寒食東風御柳斜。日暮漢宮傳蠟燭。輕烟散入五侯家。

鄜州寒食

唐韋莊

滿街楊柳綠絲烟。畫出清明二月天。好是隔簾花樹動。女郎撩亂送鞦韆。

又

雨絲烟柳欲清明。金屋人間暖鳳笙。永晝迢迢無一事。隔牆聞築氣毬聲。

又

雕陰寒食足遊人。金鳳羅衣濕麝熏。腸斷入城芳草路。澹紅香白一羣羣。

清明登城春望寄王使君

唐王表

春城閒望愛晴天。何處風光不眼前。寒食花開千樹雪。清明日出萬家烟。興來促席惟同舍。醉後狂歌盡少年。聞說鶯啼却惆悵。詩成不見謝臨川。

長安清明

唐韋莊

蚤是傷春夢。雨天可堪芳草更芊芊。內官初賜清明火。上相閒分白打錢。紫陌亂嘶紅叱撥。綠楊高映畫鞦韆。遊人記得承平事。暗喜風光似昔年。

清明日對酒

宋高翥

南北山頭多墓田。清明祭掃各紛然。紙灰飛作白蝴蝶。血淚染成紅杜鹃。落日狐狸眠塚上。夜歸兒女笑燈前。人生有酒須當醉。一滴何曾到九泉。

清明卽事

明瞿佑

風落梨花雪滿庭。今年又是一清明。遊絲到地終無意。芳草連天若有情。滿院晚烟聞燕語。半牕晴日照蠶生。鞦韆一架名園裏。人隔垂楊聽笑聲。

清明日賜百官新火

唐鄭轅

改火清明候。優恩賜近臣。漏殘丹禁曉。燧發白榆新。瑞彩來雙闕。神光煥四鄰。氣回侯第暖。烟散帝城春。利用調羹鼎。餘輝燭綈紳。皇明如照隱。願及聚螢人。

清明

宋王禹偁

無花無酒過清明。興味蕭然似野僧。昨日鄰家乞新火。曉牕分與讀書燈。

上巳

明楊基

暖日風雩好。晴江被袂過。徑穿花底窄。春向水邊多。穠艷羞桃李。輕軀稱綺羅。髻搖金婀娜。鞍覆錦盤陀。曲浪留紋羽。峨峯進紫駝。遊人傾巷陌。啼鳥避笙歌。坐障陰園柳。行茵軟藉莎。淑酣香泛渚。滌器膩浮波。富貴唐天寶。風流晉永和。暮歸車馬鬧。珠翠落平坡。

上巳日花下閒看

唐吳融

十里香塵撲馬飛。碧蓮峯下踏青時。雲鬟照水和花重。羅袖擡風惹絮遲。可使無心邀武媚。還應有淚憶袁熙。如烟如夢爭尋得。溪柳回頭萬萬絲。

上巳

宋韓琦

遠道今逢被袂辰。雨餘風物一番新。等閒臨水還思舊。取次看花便當春。絮雪暖迷西苑路。車雷晴起曲江塵。臺英正約尋芳會。誰是山陰作序人。

上巳看花次韻

明楊基

東湖東畔柳絲長。滿苑飛花亂夕陽。何處被除兒女散。來過流水鬱金香。

晚春

隋煬帝

洛陽花稍晚。四望滿青暉。楊葉行將暗。桃花落未稀。窺簷燕爭入。穿林鳥亂飛。唯當關塞者。潯露方沾衣。

暮春卽事

唐魚元機

深巷窮門少侶儔。阮郎惟有夢中留。香飄羅綺誰家席。風送歌聲何處樓。街近鼓聲喧曉睡。庭間鶯語亂春愁。安能近逐人間事。萬里身同不繫舟。

和人暮春書事寄崔秀才

唐韋莊

半掩朱門白日長。晚風輕墮落梅粧。不知芳草情何限。只怪遊人思易傷。纔見早春鶯出谷。已驚新夏燕巢梁。相逢只願如滬酒。一曲狂歌入醉鄉。

春暮有感

明楊基

春色鮮明不稱貧。越羅川錦照烏巾。斜陽芳草遲遲晚。流水桃花去去春。萬里歸心漚送客。片

時聞夢鳥催人。五湖風雨煙波闊。便著青蓑採白蘋。

暮春吟

宋邵雍

林下居常睡起遲。那堪車馬近來稀。春深晝永簾垂地。庭院無風花自飛。

春盡日

唐韓偓

樹頭初日照西簷。樹底鶯花夜雨沾。外院池亭聞動鎖。後堂欄檻見垂簾。柳腰入戶風斜倚。榆莢堆牆水半淹。把酒送春惆悵在。年年三月病懨懨。

春日

梁元帝

新鶯隱葉轉。新燕向窗飛。柳絮時依酒。梅花乍入衣。玉珂隨風度。金鞍照日輝。無令春色晚。獨望行人歸。

又

唐韋莊

忽覺東風景漸遲。野梅山杏暗芳菲。落星樓上吹殘角。偃月營中掛夕暉。旅夢亂隨蝴蝶散。離魂潛逐杜鵑飛。紅塵望斷長安陌。芳草王孫暮不歸。

春日晏起

近來中酒起常遲。卧看南山改舊詩。開戶日高春寂寞。數聲啼鳥上花枝。

春日書院

明魯鐸

門巷青苔隔路谿。小桃開滿碧池西。枕書眠著無人喚。花裏東風百舌啼。

春日閒居

明王虞鳳

濃陰柳色罩輕紗。風送爐烟一縷斜。庭草黃昏隨意綠。子規啼上木蘭花。

春歌

晉女子

春林花多媚。春鳥意多哀。春風復多情。吹我羅裳開。

春曉

唐孟浩然

春眠不覺曉。處處聞啼鳥。夜來風雨聲。花落知多少。

春夜

宋王安石

金爐香燼漏聲殘。剪剪輕風陣陣寒。春色惱人眠不得。月移花影上闌干。

又

金呂中孚

柳塘漠漠暗啼鴉。一鏡晴飛玉有華。好是夜闌人不寐。半庭疎影在梨花。

春色滿皇州

唐沈亞之

何處春暉好。偏宜在雍州。花明夾城道。柳暗曲江頭。風軟游絲重。光融瑞氣浮。聞雞憐短草。乳燕傍高樓。繡轂盈香陌。新泉溢御溝。行看日欲暮。迴騎似川流。

春行

宋真山民

短帽輕衫步履遲。微暄天氣乍晴時。池融嫩碧銷殘凍。春剪新紅綴舊枝。嵐氣滴衣堪入畫。禽聲到耳足供詩。東風苦欲招人醉。頻掉橋西賣酒旗。

春景

明宣宗

水影虛涵一鏡中。晴光搖蕩暖雲紅。小桃花重初經雨。弱柳絲柔屢舞風。

山中立夏卽事

明蔡汝南

一樽開首夏。獨對落花飛。幽僻還聞鳥。清和未換衣。綠帷槐影合。香飯藥苗肥。盡日柴門啓。蠶

家過客稀。

蚤夏

唐胡宿

井轄投多思不禁。密垂珠箔晝沈沈。睡驚燕語頻移枕。病起蛛絲半在琴。雨徑亂花埋宿甕。月軒修竹轉涼陰。一春酒費知多少。探盡囊中換賦金。

初夏閒居卽事

宋陸游

中脫冠欹入尺牀。竹陰槐影有餘涼。隨風花墮殘棋上。引睡書拋倦枕傍。水漲沙鷗向人熟。雨餘巢燕哺雛忙。尚嫌未愜幽情在。又喚漁舟渡野塘。

初夏

曲徑泥新晚照明。小軒纔受一牀橫。翩翩乳燕穿簾影。簌簌新篁解箨聲。藥物屏除知病減。夢魂安穩覺心平。深居不恨無來客。時有山禽自贊名。

又

宋曾鞏

雨過橫塘水滿堤。亂山高下路東西。一番桃李花開後。惟有青青草色齊。

貞谿初夏

明郭亨貞

迴簷燕子掠晴絲。隔水茶烟出院遲。草色入簾人不到。午風吹暖夢回時。

午日庭宴

明唐順之

南薰應律轉朱旗。火帝乘離錦席披。榴吐千花承羽蓋。葵開五葉拂瑤墀。水盤錯出仙人掌。金縷遙分織女絲。復道龍舟方競渡。銜恩更許向昆池。

許長卿水亭五日

明顧起元

久緣起晚倦登樓。喜向高陽得勝遊。為有蒲葵開令曆。况逢蕭鼓沸中流。千峯忽送珠簾雨。一水先回碧樹秋。坐惜主人投轄意。夜深燈火下滄洲。

揚州端午呈趙師

宋戴復古

榴花角黍鬪時新。今日誰家不酒樽。堪笑江湖阻風客。却隨蒿艾上柴門。

大暑

金趙元

旱雲飛火燎長空。白日潭如坐甑中。不到廣寒冰雪窖。扇頭能有幾多風。

暑中閒咏

宋蘇舜欽

嘉果浮沉酒半醺。牀頭書冊亂紛紛。北軒涼吹開疎竹。卧看青天行白雲。

消暑

唐白居易

何以消煩暑。端居一院中。眼前無長物。窗下有清風。熱散由心靜。涼生爲室空。此時身自得。難更與人同。

橋南納涼

宋陸游

携杖來追柳外涼。畫橋南畔倚胡牀。月明船笛參差起。風定池蓮自在香。半落星河知夜久。無窮草樹覺城荒。碧筒莫惜頻然醉。人事還隨日出忙。

六七月之交山中涼甚

城市方炎熱。村墟乃爾涼。拂窗桐葉下。繞舍稻花香。獨鶴警秋露。雙螢明屋梁。卧聞機婦織。感歎夜初長。

奉和夏日應令

北周庾信

朱簾捲麗日。翠幕蔽重陽。五日炎蒸氣。三時刻漏長。麥隨風裏熟。梅逐雨中黃。開冰帶井水。和粉雜生香。衫含蕉葉氣。扇動竹花涼。蚤菱生軟角。初蓮開細房。願陪仙鶴舉。洛浦聽笙簧。

夏日

宋張耒

長夏江村風日清。簷牙燕雀已生成。蠲衣晒粉花枝午。蛛網添絲屋角晴。落落疎簾邀月影。嘈嘈虛枕納溪聲。久拌兩鬢如霜雪。直欲樵漁過此生。

夏日偶成

明黃氏

深院塵消散午炎。篆烟如夢畫淹淹。輕風似與荷花約。為送香來目捲簾。

夏夜

宋方岳

河漢微明星乍稀。碧蓮香濕襲人衣。夜涼如水琉璃滑。日起開窗放月歸。

夏景

明宣宗

暑雨初過爽氣清。玉波蕩漾畫橋平。穿簾小燕雙雙好。泛水閒鷗箇箇輕。

立秋

陳周宏讓

茲辰飛流火。商飈早已驚。雲天改夏色。木葉動秋聲。

立秋日

唐司空曙

律變新秋至。蕭條自此初。花酣蓮報謝。葉在柳呈疎。淡日非雲映。清風似雨餘。捲簾涼暗度。迎扇暑先除。立靜多翻燕。波澄乍露魚。今朝散騎省。作賦興何如。

又

宋劉武子

乳鴉啼散玉屏空。一枕新涼一扇風。睡起秋聲無覓處。滿階梧葉月明中。

新秋

唐元稹

旦暮已淒涼。離入遠思忙。夏衣臨曉薄。秋影入簷長。前事風隨扇。歸心燕在梁。殷勤寄牛女。河漢正相望。

又

唐杜甫

火雲猶未斂奇峯。欹枕初驚一葉風。幾處園林蕭瑟裏。誰家砧杵寂寥中。蟬聲斷續悲殘月。螢焰高低照暮空。賦就金門期再獻。夜深搔首歎飛蓬。

新秋示盛伯宣

明 鎬 泰

暑退涼生透碧紗。砧聲不斷是誰家。酒醒小立殘陽裏。閒數籬邊紫豈花。

七夕

隋 王 睿

天河橫欲曉。鳳駕儼應飛。落日移絃鏡。浮雲動別衣。惟逐今宵盡。愁隨還路歸。猶將宿昔淚。更
上去年機。

又

祖 咏

閨女求天女。更闌意未闌。玉庭開粉席。羅袖捧金盤。向月穿針易。臨風整線難。不知誰得巧。明
旦試尋看。

又

元 孫 淑

乞巧樓前雨乍晴。寥寥新月伴雙星。鄰家小女都相學。聞取金盆看化生。

又

明 馮 琦

天空露下夜如何。漫道雙星已渡河。見說人間方恤緯。可認天上不停梭。

池塘七夕

唐溫庭筠

月出西南露氣秋。綺寮河漢在斜樓。楊家繡作鴛鴦幃。張氏金為翡翠鉤。香燭有光妨宿燕。曉屏無睡待牽牛。萬家砧杵三篙水。一夕橫塘是舊遊。

中秋

明曹鼎

風捲浮雲散九區。海天澄徹月輪孤。三秋爽氣凌空碧。一點寒光照太虛。狂客醉酣歌白紵。素娥起舞擊蒼梧。何須更覓神仙術。我已藏身白玉壺。

又

宋汪洙

秋景今宵半。天高月倍明。南樓誰宴賞。綠竹奏清聲。

九日藍田崔氏莊

唐杜甫

老去悲秋強自寬。興來今日盡君歡。羞將短髮還吹帽。笑倩旁人為整冠。藍水遠從千澗落。玉山高並兩峯寒。明年此會知誰健。醉把茱萸仔細看。

九日齊山登高

唐杜牧

江涵秋影雁初飛。與客攜壺上翠微。人世難逢開口笑。菊花須插滿頭歸。但將酩酊酬佳節。不用登臨歎落暉。古往今來只如此。牛山何必淚沾衣。

重陽日訪元秀上人

唐鄭谷

紅葉黃花秋景寬。醉吟朝夕在樊川。却嫌今日登山俗。且共高僧對榻眠。別畫長懷吳寺壁。宜茶偏賞雲溪泉。歸來童穉爭相笑。何事無人與酒船。

九日

元張養浩

一行作吏廢懷遊。九日登臨擬盡酬。詩有少陵難著語。菊無元亮不成秋。雲山目笑頭將鶴。瀛海誰知我亦鷗。幸遇佳辰莫辭醉。浮雲今古劇悠悠。

九日宴

唐張諤

秋葉風吹黃珮珮。晴雲日照白鱗鱗。歸來得問茱萸女。今日登高醉幾人。

重九

朝鮮鄭道傳

故園歸路渺無窮。水遠山園第幾重。望欲遠時愁更遠。登高莫上最高峯。

暮秋感興

宋寇準

苒苒前期遠。窮途亦可傷。有時聞落葉。不語立殘陽。塞草秋先白。溪沙晚更光。那堪望天末。燕雁又成行。

江亭晚秋

唐李郢

碧天涼冷雁來疎。開看江亭思有餘。秋館池潭荷葉歇。野人簾落豆花初。無愁目得仙翁術。多病能忘太史書。聞說故園香稻熟。片帆歸去就鱸魚。

秋晚高樓

唐唐彥謙

松映疎窗竹映欄。素琴幽怨不成彈。清霄霽極雲離岫。紫禁風高露滿盤。晚蝶飄零經宿雨。暮鴉零亂報秋寒。高樓瞪目歸鴻遠。姑信橋康欲畫難。

秋日

唐耿湣

返照入閭巷。愛來誰共語。古道少人行。秋風動禾黍。

又

唐韓偓

雨後碧苔院。霜來紅葉樓。閒階上斜日。鸚鵡伴人愁。

又

宋朱子

一雨生涼村若洲。月波微漾綠溪流。茅檐歸去無塵土。淡薄閒花遶舍秋。

長安卧病秋夜言懷

唐陳羽

九重門鎖禁城秋。月過南宮漸映樓。紫陌夜深槐露滴。碧天雲盡火星流。風清刻漏傳三殿。甲第歌鐘樂五侯。楚客病來鄉思苦。寂寥燈下不勝愁。

西齋秋夜

元僧善住

晚雨過江城。西齋秋氣清。夢回孤枕上。無處不蟲聲。

長安秋夜

唐李德裕

內宮傳詔問戎機。載筆金鑾夜始歸。萬戶千門皆寂寂。月中清露點朝衣。

山間秋夜

宋真山民

夜色秋光共一闌。飽收風露入脾肝。虛簷立盡梧桐影。絡緯數聲山月寒。

江館秋色

唐諱用之

耿耿銀河雁半橫。夢歎金碧轆轤輕。滿窗謝練江風白。一枕齊紈海月明。楊柳敗梢飛葉響。菱荷香柄折秋鳴。誰人更唱陽關曲。牢落烟霞夢不成。

感秋

唐姚倫

試向疎林望。方知節候殊。亂聲千葉下。寒影一巢孤。不蔽秋天雁。驚聞月夜烏。霜風與秋日。幾度遣榮枯。

秋興

唐杜甫

玉露凋傷楓樹林。巫山巫峽氣蕭森。江間波浪兼天湧。塞上風雲接地陰。叢菊兩開他日淚。孤舟一繫故園心。寒衣處處催刀尺。白帝城高急暮砧。

秋懷

唐雍陶

古槐烟薄晚鴉愁。獨向黃昏立御溝。南國望中生遠思。一行新雁過汀洲。

秋色

唐吳融

染不成乾畫未消。霏霏拂拂又迢迢。曾從建業城邊過。蔓草寒烟鎖六朝。

秋景

明宣宗

新秋涼露濕荷叢。不斷清香逐曉風。滿目濃華春意在。晚霞澄錦照芙蓉。

立冬

明王穉登

秋風吹盡舊庭柯。黃葉丹楓客裏過。一點禪燈半輪月。今宵寒較昨宵多。

初冬

宋劉克莊

晴窗蚤覺愛朝曦。竹外秋聲漸作威。命僕安排新暖閣。呼童熨帖舊寒衣。葉浮嫩綠酒初熟。橙切香黃蟹正肥。荻菊滿園皆可羨。賞心從此莫相違。

小至

唐杜甫

天時人事日相催。冬至陽生春又來。刺繡五紋添弱綠。吹葭六管動飛灰。岸容待臘將舒柳。山意衝寒欲放梅。雲物不殊鄉國異。教兒且覆掌中杯。

至節卽事

元馬臻

天街曉色瑞烟濃。名紙相傳盡賀冬。繡幕家家渾不捲。呼盧笑語自從容。

南至日太史登臺書雲物

唐于尹躬

至日行時令。登臺約禮文。官稱伯趙氏。色辨五方雲。晝漏聽初發。陽光望漸分。司天爲歲備。持簡出人羣。惠愛周微物。生靈荷聖君。長當有嘉瑞。郁郁復紛紛。

寒夜

宋杜小山

寒夜客來茶當酒。竹爐湯沸火初紅。尋常一樣窗前月。纔有梅花便不同。

臘月下旬偶作

宋張耒

歲暮煙霜澤國寒。曉鴉鳴處是柯山。地爐有火尊餘酒。自起焚香深掩關。

臘日

明李先芳

臘日煙光薄。郊園曉望空。歲登通蜡祭。酒熟驟村翁。積雪連長陌。枯桑起大風。村村聞賽鼓。又了一年中。

除夜

唐王綬

今歲今宵盡。明年明日催。寒隨一夜去。春逐五更來。氣色空中改。容顏暗裏回。風光人不覺。已入後園梅。

除夜作

唐高適

旅館寒燈獨不眠。客心何事轉淒然。故鄉今夜思千里。霜鬢明朝又一年。

守歲侍宴應制

唐杜審言

季冬除夜接新年。帝子王臣捧御筵。官闕星河低拂樹。殿庭燈燭上熏天。彈琴奏節梅風入。對局探鈎柏酒傳。欲向正元歌萬壽。暫留歡賞寄春前。

冬日

唐韓偓

蕭條古木銜斜日。威蕩寒雲滯早梅。愁處雪烟連野起。靜時風竹過牆來。故人每憶心先見。新酒偷嘗手自開。景狀入詩兼入畫。言情不盡恨無才。

冬夜

明毛文貞

玉井無聲戶已扃。一庭霜月冷如凝。誰憐寂寞書窗下。凍影梅花伴夜燈。

冬景

明宣宗

池頭六出花飛遍。池水無波凍欲平。一望玻璃三百頃。好山西北玉為屏。

歲時部 附錄

曉

唐徐寅

水盡銅龍滴漸微。景陽鐘動夢魂飛。潼關雞唱促歸騎。金殿燭殘求御衣。窗下寒機猶目織。梁間棲燕欲雙飛。羲和晴聳扶桑轡。借與宸瀛看蚤暉。

曉色

元謝宗元

遠似烟霞近又空。非明非夜兩朦朧。一天清露洗難退。幾抹曙雲遮不窮。斷角樓臺濃淡裏。殘燈院落有無中。蒼茫半逐雞聲散。又被朝陽染作紅。

商山蚤行

唐溫庭筠

晨起動征鐸。客行悲故鄉。雞聲茅店月。人跡板橋霜。樹葉落山路。枳花明驛牆。因思杜陵夢。鳥雁滿迴塘。

秋日蚤行

唐韋莊

上馬蕭蕭襟袖涼。路穿禾黍繞官牆。半山殘月露華冷。一岸野風蓮萼香。烟外驛樓紅隱隱。清邊雲樹暗蒼蒼。行人自是心如火。兔走烏飛不覺長。

江上蚤行

明楊士奇

漢陽磯上鼓初稀。烟柳隴隴一鵲飛。乘月不認行處遠。滿江風露濕人衣。

晚步

元葉顥

偶隨芳草踏斜暉。石徑雲深翠滴衣。兩袖天風明月上。杖頭挑得樹陰歸。

夜

明徐寅

日墮虞淵燭影開。沉沉烟霧壓浮埃。剡溪雪滿子猷去。漢殿月生王母來。簷掛蛛絲應漸織。風吹螢火不成灰。愁人莫道何時旦。自有鐘鳴漏滴催。

夜景

唐韋莊

滿庭松桂雨餘天。宋玉秋聲韻蜀絃。烏兔不知多事世。星辰依舊太平年。誰家一笛吹殘暑。何

處雙砧擣暮烟。欲把傷心問明月。素娥無語淚涓涓。

夜景又作

唐鄭畋

鈴條無響閉珠宮。小閣涼添玉蕊風。珍簟滿床明月到。自疑身在五雲中。

夜半

唐李商隱

五更三點萬家眠。露欲為霜月墮烟。聞鼠上堂蝙蝠出。玉琴時動綺窗絃。

夜坐

明文徵明

洞闌客散小堂空。旋捲珠簾受晚風。坐久忽驚涼影動。一痕新月在梧桐。

閏月定四時

唐許稷

玉律窮三紀。推為積閏期。月餘因妙算。歲徧自成時。乍覺年華改。翻憐物候遲。六旬知不忒。四氣本無欺。月桂戲還正。階蓂落復滋。從茲分曆象。共仰定毫釐。

咏物詩選卷二

地部

魏塘俞 琰長仁韓

城

唐李 嶠

四塞稱天府。三河建洛都。飛雲謁層闕。白日麗南隅。獨下仙人鶴。羣驚御史烏。何辭一萬里。邊徼擇匈奴。

長城

唐汪 遵

秦築長城比鐵牢。蕃戎不教過臨洮。雖然萬里連雲際。爭及堯階三尺高。

登故洛陽城

唐許 渾

禾黍離離半野蒿。昔人城此豈知勞。水聲東去市朝變。山勢非來宮殿高。鴉噪暮雲歸故堞。雁迷寒雨下空濠。可憐綢繡登仙子。猶自火笙醉碧桃。

城上

唐杜甫

草滿巴西綠。空城白日長。風吹花片片。春動水茫茫。八駿隨天子。羣臣從武皇。遙聞出巡狩。蚤晚遍遐荒。

登杭州城

唐鄭谷

漠漠江天外。登臨返照間。潮來無別浦。木落見他山。沙鳥晴飛遠。漁人夜唱閒。歲窮歸未得。心逐片帆還。

出郭

唐杜甫

霜露晚淒淒。高天逐望低。遠烟鹽井上。斜景雪峯西。故國猶兵馬。他鄉亦鼓鼙。江城今夜客。還與舊烏啼。

市

唐李嶠

闌闌開三市。旗亭起百尋。漸離初擊筑。司馬正彈琴。細柳龍鱗映。長槐兔月陰。徒知觀衛玉。詎肯挂秦金。

天街

唐秦韜玉

九衢風景盡成新。獨占天下近紫宸。寶馬競隨朝暮客。香車爭碾古今塵。烟光正入南山色。氣勢遙連北闕春。莫見繁華祇如此。暗中時換往來人。

道

唐李嶠

銅駝分華洛。劍閣抵臨邛。紫微三千里。青樓十二重。玉闌塵似雪。金埒馬如龍。金日中衢上。堯樽更可逢。

洛陽道

唐丁鄴

浮世若浮雲。千回故復新。旋添青草塚。更有白頭人。歲暮客將老。雲晴山欲春。行行車與馬。不盡洛陽城。

長安道

明商輅

層城迢遞入雲賒。處處春風面杏花。長樂鐘聲催漏箭。新豐樹色擁行車。歌姬舞榭留明月。主柱樓終綺霞。日暮香塵連九陌。鑾輿傳幸五侯家。

大道曲

晉謝尚

青陽二三月。柳青桃復紅。車馬不相識。音落黃埃中。

蜀道難

唐張文琮

梁山鎮地險。積石阻雲端。深谷下寥廓。層岩鬱盤盤。飛梁架絕巔。棧道接危巒。攬轡獨長息。方知斯路難。

穆陵路

唐陳存

西遊匝長劍。日暮湘楚間。馬上悲秋草。逢人問故關。孤村綠塘水。曠野白雲山。方念此中去。何時此路還。

西郊

唐杜甫

時出碧雞坊。西郊近草堂。市橋官柳細。江路野梅香。傍架齊書帙。看題檢藥囊。無人覺來往。疎懶意何長。

春郊

唐錢起

水遶冰渠漸有聲。氣融烟塢晚來明。東風好作陽和使。逢草逢花報發生。

郊野

唐鄭谷

絮水蒨籬邊。新晴有亂蟬。秋光終寂寞。晚醉自流連。野濕禾中露。村間社後天。題詩滿紅葉。何必浣花箋。

郊墅

韋曲樊川雨半晴。竹莊花院遍題名。畫成烟景垂楊色。滴破春愁壓酒聲。滿野紅塵誰得路。連天紫閣獨關情。漢陵水色澄於鏡。何必滄浪始濯纓。

初夏郊行

宋陸游

小硯孤吟恐作愁。長堤曳杖且閒遊。破雲山湧千螺翠。經雨波涵一鏡秋。鉅款青紅村步市。欄杆高下寺家樓。去年今日君知否。十丈京塵沒馬頭。

白草原

唐李頎

白草原頭望京師。黃河水流無已時。秋天曠野行人絕。馬首西來知是誰。

春村

唐白居易

二月村園暖。桑間戴勝飛。農夫春舊穀。蠶妾擣新衣。牛馬因風遠。雞豚過社稀。黃昏林下路。笛鼓賽神歸。

山村

宋蘇軾

竹籬茅屋趁溪斜。春入山村處處花。無象太平還有象。孤煙起處是人家。

春日江村

唐杜甫

農務村村急。春流岸岸深。乾坤萬里眼。時序百年心。茅屋還堪賦。桃源自可尋。艱難味生理。飄泊到如今。

暮過山村

唐賈島

數里聞寒水。山家少四隣。怪禽啼曠野。落日恐行人。初月未終夕。邊烽不過秦。蕭條桑柘外。烟火漸相親。

遊山西村

宋陸游

莫笑農家臘酒渾。豐年留客足雞豚。山重水複疑無路。柳暗花明又一村。簫鼓追隨春社近。衣冠簡朴古風存。從今若許閒乘月。拄杖無時夜叩門。

村居書喜

紅橋梅市曉山橫。白塔樊釭春水生。花氣襲人知驟煖。鵲聲穿樹喜新晴。坊場酒賤貧猶醉。原野泥深老亦耕。最喜先期官賦足。經年無吏叩柴荆。

江村即事

唐司空曙

釣罷歸來不繫船。江村月落正堪眠。縱然一夜風吹去。只在蘆花淺水邊。

鄉村即事

宋范成大

綠遍山原白滿川。子規聲裏雨如烟。鄉村四月閒人少。纔了蠶桑又插田。

稻田

唐韋莊

綠波春浪滿前陂。極目連雲耀稻肥。更被鶯鶯千點雪。破烟來入畫屏飛。

野田

唐張籍

漠漠野田草。草中牛羊道。古墓無子孫。白楊不得老。

野望

隋王 績

東皋薄暮望。徙倚欲何依。樹樹皆秋色。山山惟落暉。牧人驅犢返。獵馬帶禽歸。相顧無相識。長歌懷采薇。

又

唐杜 甫

清秋望不極。迢遞起層陰。遠水兼天淨。孤城隱霧深。葉稀風更落。山迥日初沉。獨鶴歸何晚。昏鴉已滿林。

又

西山白雪三城戍。南浦清江萬里橋。海內風塵諸弟隔。天涯涕淚一身遙。唯將遲暮供多病。未
有涓埃答聖朝。跨馬出郊時極目。不堪人事日蕭條。

吳新興堤

唐朱慶餘

春堤一望思無涯。樹勢還同水勢斜。深映菰蒲三十里。晴分城郭幾千家。謀成既不勞人力。境

遠偏宜隔浪花。若與青山常作對。汀洲青恨柳絲遮。

堤上行

唐張籍

酒旗相望大堤頭。堤下連樁堤上樓。日暮行人爭渡急。槳聲幽輒滿中流。

又

江南江北望煙波。夜行人相應歌。紅葉傳情竹枝怨。水流無限月明多。

秋岸

唐杜牧

河岸微退落。柳影微凋疎。船上聽呼聲。堤南趁漉魚。數帆旗去疾。一艇箭回初。曾入相思夢。因憑附遠書。

橋

唐杜甫

高鵲瑱應滿。黃公去不歸。勢疑虹始見。形似雁初飛。妙應七星制。高分半月輝。秦王空搆石。仙島遠難依。

出關

唐韋莊

馬嘶烟岸柳陰斜。回首關山路轉賒。到處因循緣嗜酒。一生惆悵為看花。危時祇合身無着。白日那堪事有涯。正是灞陵春草綠。仲宣何事獨辭家。

題盤豆驛水館後軒

極目晴川展畫屏。地從桃塞接蒲城。灘頭驚占晴波立。原上人侵落照耕。去雁數行天際沒。孤雲一點碛中生。恐軒盡日不回首。楚水吳山無限情。

題黃花驛

唐薛逢

孤戍迢迢蜀路長。鳥鳴山館客思鄉。更看絕頂烟霞外。數樹巖花照夕陽。

烏衣巷

唐劉禹錫

朱雀橋邊野草花。烏衣巷口夕陽斜。舊時王謝堂前燕。飛入尋常百姓家。

塞上

唐司空圖

萬里隋城在三邊。虜氣衰。沙填孤嶂角。燒斷故關碑。鳥色經寒慘。鵑聲帶晚悲。將軍正閒散。留客換歌辭。

塞上曲

唐王烈

孤城夕對戍樓間。廻合青冥萬仞山。明鏡不須生白髮。風霜自解老紅顏。

塞下曲

唐常建

五帝朝回望帝鄉。烏孫歸去不稱王。天涯靜處無征戰。兵氣銷為日月光。

邊上

唐張籍

戍樓吹角起征鴻。獵獵寒旌背晚風。千里暮烟愁不盡。一川秋草恨無窮。山河慘淡開城闕。人物蕭條市井空。只此旅魂招未得。更堪回首夕陽中。

古戰場

唐竇庠

山斷塞初平。人言古戰場。冰泉聲更咽。陰火燄偏青。月落雲沙黑。風回草木腥。不知秦與漢。徒欲弔英靈。

金陵

唐許渾

玉樹歌殘王氣終。景陽兵合戍樓空。松楸遠近千官塚。禾黍高低六代宮。石燕拂雲晴亦雨。江

狔吹浪夜還風。英雄一去豪華盡。惟有青山似洛中。

過秦始皇陵

龍盤虎踞樹層層。勢入浮雲亦是崩。一種青山秋草裏。路人惟拜漢文陵。

燕昭王墓

唐羅隱

戰國蒼茫難重尋。此中踪跡想知音。強停別騎山花晚。欲弔遺墟野草深。浮世近來輕駿骨。高臺何處有黃金。思量郭隗生平事。不殉昭王是負恩。

題蘇小小墓

唐張祐

漠漠窮塵地。蕭蕭古樹林。臉濃花自發。眉恨柳長深。夜月人何待。春風鳥自吟。不知誰共穴。徒願結同心。

和人題真孃墓

唐李商隱

虎邱山下劍池邊。長遣遊人歎逝川。聖樹斷絲悲舞席。出雲清梵想歌筵。柳眉空止攸翠葉。榆莢還飛買笑錢。一自香魂招不得。祇應江上獨嬋娟。

嘯物詩選卷二

題朱買臣妻墓

明方孝孺

青草池邊土一邱。千年埋骨不埋羞。丁寧嚙向人間婦。自古含糟據到頭。

過亡友墓

唐馬戴

昨憶送君葬。今看墳樹高。尋思後期者。只是益生勞。

漂母墳

唐羅隱

寂寂荒墳一水濱。蘆洲絕島自相親。青蛾已落淮邊月。白骨甘為泉下塵。原上荻花飄素髮。道旁荻葉碎羅巾。雖然寂寞千秋魄。猶是韓侯舊主人。

蔡中郎墳

唐溫庭筠

古墳零落野花春。聞說中郎有後身。今日愛才非昔日。莫拋心力作詞人。

邙塚

唐沈佺期

北邙山上列墳塋。萬古千秋對洛城。城中日夕歌鐘起。山上惟聞松柏聲。

青塚

唐杜牧

青塚前頭隴水流。燕山山上暮雲秋。蛾眉一墮窮泉路。夜夜孤魂月下愁。

焚書坑

唐韋 碣

竹帛烟消帝業虛。關河空鎮祖龍居。坑灰未冷山東亂。劉項原來不讀書。

塵

唐張 說

仙浦生羅襪。神京染素衣。裨山期益峻。照日應增輝。夕伴龍媒合。朝隨鳳輦歸。獨憐范甑下。思繞畫梁飛。

山部

山

唐李 嶠

地鎮標神秀。峨峨上翠氛。衆飛一道帶。峰出半天雲。古壁丹青色。新花綺繡紋。已開封禪所。希謁聖明君。

遠山

元張泰 娥

秋山極天淨

秋水一抹碧。殘霞幾縷紅。水窮雲盡處。隱隱兩三峰。

秋山極天淨

唐朱延齡

雨洗高秋淨。天臨大野間。慈龍清萬象。綠繞出層山。日落千峯上。雲消萬壑間。綠蘿霜後翠。紅葉雨來殷。散彩輝吳甸。分形壓楚關。欲尋霄漢路。翹首願登攀。

山居即事

唐王維

山居即事

寂寞掩柴扉。蒼茫對落暉。鶴巢松樹遍。人訪華門稀。綠竹含新粉。紅蓮落故衣。渡頭烟火起。處處採菱歸。

題友人山居

唐戴叔倫

四郭青山處處同。客懷無計答秋風。數家茅屋青溪上。千樹蟬聲落日中。

山行

山行分曙色。一路見人稀。野鳥啼還歇。林花墮不飛。雲迹栖鶴寺。水濕釣魚磯。回首天將暝。逢僧語未歸。

又

青樾深林亦有人。一渠流水數家分。山當日午回峰影。草帶泥痕過鹿羣。蒸茗氣從茅舍出。盤絲聲隔竹籬聞。行逢賣藥歸來客。不惜相隨入鳥雲。

唐項斯

又

登登山路何時盡。泱泱溪流到處聞。風動葉聲山犬吠。幾家松火隔秋雲。

唐盧綸

又

遠上寒山石逕斜。白雲深處有人家。停車坐愛楓林晚。霜葉紅於二月花。

唐杜牧

登泰山

風雲一舉到天關。快意生平有此觀。萬古齊州烟九點。五更滄海日三年。向來井處方知隘。今後巢居亦覺寬。笑拍洪崖咏新句。滿空笙鶴下高寒。

元張養浩

華山

唐鄭谷

峭仞聳巍巍。晴嵐染近畿。孤高不可狀。圖寫盡應非。絕頂神仙會。半空鸞鶴歸。靈臺分瑞霽。谷

氣象雄渾

樹隱斜暉。雲對蕪花落。泉橫露掌飛。乳懸須磴合。樵唱上方稀。

又

宋冠準

只有天在上。更無山與齊。舉頭紅日近。回首白雲低。

送友人遊嵩山

宋陳羽

嵩山歸路繞天壇。雲影松聲滿谷寒。君見九龍潭上月。莫辭清夜水中看。

遊鐘山

宋王安石

兩山松櫟暗朱藤。一水中間勝武陵。午梵隔雲知有寺。陽歸去不逢僧。

登石鐘山望廬山

明張治

廬岳亭亭翠萬重。懸泉百尺掛飛龍。石鐘山下江如鏡。映出青天五老峯。

金山

明王永叔

鼇宅龍宮紫氣驕。壯遊南北倚青霄。蜀江萬里來春水。吳興千尋帶暮潮。夾岸帆檣揚子渡。隔天雲樹廣陵橋。臨流無限風塵思。濁酒淋漓劍影搖。

終南山

唐王維

太乙近天都。連山到海隅。白雲回望合。青霭入看無。分野中峯變。陰晴衆壑殊。欲投人處宿。隔水問樵夫。

茅山

唐杜荀鶴

步步入山門。仙家鳥徑分。漁樵不到處。麋鹿自成羣。石面迸流水。松頭穿亂雲。道人星月下。相次禮茅君。

茅山道中

唐趙嘏

烟樹重重水亂流。馬嘶殘雨晚程秋。門前便是仙山路。目送歸鴻不得遊。

望天門山

唐李白

天門中斷楚江開。碧水東流至北回。兩岸青山相對出。孤帆一片日邊來。

送齊山人歸長白山

唐韓翃

舊事仙人白兔公。掉頭歸去又乘風。柴門流水依然在。一路寒山萬木中。

宿石邑山中

浮雲不共此山齊。山靄蒼蒼望轉迷。曉月暫飛千樹裏。秋河隔在數峯西。

高景山夜歸

宋范成大

伊軋藍輿草露間。夜涼月暗走孱顏。忽逢陂水明如鏡。照見沉沉倒景山。

早發定山

梁沈約

夙齡愛遠壑。晚淮見奇山。標峰綠虹外。置嶺白雲間。傾壁忽斜豎。絕頂復孤圓。歸海流漫漫。出浦水瀼瀼。野棠開未落。山櫻發欲然。忘歸屬蘭杜。懷祿寄芳荃。眷言採三秀。徘徊望九仙。

經麻姑仙

唐劉滄

麻姑此地鍊神丹。寂寞烟霞古竈殘。一自仙娥歸碧落。幾年春雨洗紅蘭。帆飛震澤秋江遠。雨過陵陽晚樹寒。山嶺白雲千萬片。時聞鷺鶴下仙壇。

天平山中

明楊基

細雨茸茸濕楝花。南風樹樹熟枇杷。徐行不記山深淺。一路鶯啼送到家。

虎邱詠

明黃省曾

芙蓉近倚闔閭城。眺閣觴樓逐勢成。珠寺翻為歌舞地。青山盡是綺羅情。巖花學紅粧吐麗。谷鳥啼兼鳳管聲。十里垂楊芳草岸。四時常映綵舟行。

巫山高

唐李端

巫山十二峰。皆在碧虛中。迴合雲藏日。霏微雨帶風。猿聲寒過水。樹色暮連空。愁向高唐宿。清秋見楚宮。

峽中

唐盧象

高唐幾百里。樹色接陽臺。晚見江山霽。宵聞風雨來。雲從三峽起。天向數峰開。靈境信難見。輕舟那可回。

早發天台中巖寺度關嶺次天姥岑

唐許渾

來往天台天姥間。欲求真訣駐衰顏。星河半落巖前寺。雲霧初開嶺上關。丹壑樹多風浩浩。碧溪苔淺水潺潺。可知劉阮逢人處。行盡深山又是山。

登石門最高頂

宋謝靈運

晨策尋絕壁。夕息在山棲。疏峯抗高館。對嶺臨廻溪。長林羅戶穴。積石擁堦基。連岩覺路塞。密竹使徑迷。來人忘新術。去子惡故蹊。活活夕流駛。噉噉夜猿啼。沈冥豈別理。守道自不攜。心契九秋幹。目玩三春萸。居常以待終。處順故安排。惜無同懷客。共登青雲梯。

中峯

宋林逋

中峰一徑分。盤折上幽雲。夕照前邨見。秋濤隔嶺聞。長松含古翠。仙藥動微薰。自愛蘇門嘯。懷賢事不羣。

雲際中峯

唐李端

自得中峰住。深林亦閉關。經秋無客到。入夜有僧還。暗澗泉聲小。荒岡樹影閒。高亭不可望。星月滿空山。

度大庾嶺

唐宋之問

度嶺方辭國。停輶一望家。魂隨西嶺鳥。淚盡北枝花。山雨初含霽。江雲欲變霞。但令歸有日。不

敢怨長沙

登嶺望

唐許鼎

森森三江水。悠悠五嶺關。雁飛猶不度。人去若為還。

西巖

宋余靖

萬壑千巖闢物華。桴筇閒訪道生涯。一壇星斗修真館。數里雲霞劇藥家。魚戲竹溪寒影碎。路穿松塢翠陰斜。桃源自有神仙窟。未信明河八月槎。

夏日登鶴巖

唐戴叔倫

天風吹我上層岡。露洒長松六月涼。願借老僧雙白鶴。碧雲深處共翱翔。

題合溪乾洞

唐于鵠

渡水傍山尋絕壁。白雲飛處洞天開。仙人來往行無跡。石逕春風長綠苔。

駱谷晚望

唐韓琬

秦川如畫渭如絳。去國懷家一望時。公子王孫莫來好。嶺花多是斷腸枝。

登江中孤嶼

宋謝靈運

江南倦歷覽。江北曠周旋。懷新道轉廻。尋異景不延。亂流趨正絕。孤嶼媚中川。雲日相輝映。空水共澄鮮。表靈物莫賞。蘊真誰爲傳。想像崑山姿。緬邈區中緣。始信安期術。得盡養生年。

假山

唐杜甫

一簣切盈尺。三舉意出羣。望中疑在野。幽處欲生雲。慈竹春陰覆。香爐曉勢分。淮南將試壽。佳氣日氤氲。

又

唐鄭谷

小巧功成雨。鮮斑。軒車日日扣松關。峨嵋咫尺無人去。却向僧窗看假山。

和人假山

宋蘇軾

上黨碧巖天玉環。絕河千里抱商顏。試觀烟雨三峰外。都在靈仙一掌間。造物何如童子戲。寫真聊發使君閒。何當挈取西征去。畫作圍牀六曲山。

太湖石

唐白居易

烟翠三秋色。波濤萬古痕。削成青玉片。截斷碧雲根。風氣通巖穴。苔文護洞門。三峰具體小。應是華山孫。

省試昆明池織女石

唐董漢卿

一片昆明石。千秋織女名。象星何皓皎。臨水更盈盈。苔作湔裙色。波為促杼聲。岸雲連翼濕。沙月對眉生。有臉蓮同笑。無心鳥不驚。還如明鏡裏。形影自分明。

望夫石

唐李白

彷彿古容儀。含愁帶曙輝。露如今日淚。苔似昔年衣。有恨同湘女。無言類楚妃。寂然芳靄內。猶若侍夫歸。

西施石

唐樓穎

西施昔日浣紗津。石上青苔愁殺人。一去姑蘇不復返。岸旁桃李為誰春。

醒酒石

元謝宗可

子孫猶自問監軍。醒籍千年跡已陳。蒼骨冷侵酣枕夢。苔痕清逼醉鄉春。西風別墅啼山鬼。落

石灰

日朱崖泣海神。牛李相傾果何得。太湖甲乙更誰人。

石灰

千鎚萬擊出深山。
火焚燒若等閒。
粉骨碎身全不顧。
要留清白在人間。

明于謙

咏物詩選卷二 山部

咏物詩選卷三

魏塘俞 琰長仁輯

水部

水

唐鄭 谷

竹院松廊分數派。晴空清泚亦逶迤。落花相逐去何處。幽鶯獨來無限時。洗鉢老僧臨岸久。釣魚閒客捲綸遲。晚晴一片連莎綠。悔與滄浪有舊期。

流水

唐羅 鄴

人間莫謾惜花落。花落明年依舊開。却最堪悲是流水。使同人事去無迴。

新安道中玩流水

唐吳 融

一渠春水弄潺湲。密竹繁花掩映間。看處便須終日住。算來寧得此身閒。榮紆似接迷人洞。清冷應連有雪山。上却征車更回首。了然塵土不相關。

水檻遣心

唐杜甫

去郭軒楹敞。無村眺望賒。澄江平少岸。幽樹晚多花。細雨魚兒出。微風燕子斜。城中十萬戶。此地兩三家。

遠水

唐馬戴

蕩漾空沙際。虛明入遠天。秋光照不極。鳥影去無邊。勢引長雲斷。波輕片雪連。汀洲杳難到。萬古覆蒼烟。

水紋

元謝宗可

新綠粼粼深淺漪。織成春色上苔衣。一池碧暈雨初落。千疊翠鱗風更微。淨澱光搖湘女鏡。輕羅影動水仙機。何如袖取并刀去。快剪吳淞半幅歸。

海望

唐周繇

蒼茫空泛日。四顧絕人烟。半浸中華岸。傍通異域船。島間知有國。波外恐無天。欲作乘槎客。惟愁去隔年。

九月二十日夜渡海

宋蘇軾

參橫斗轉欲三更。苦雨終風也解晴。雲散月明誰點綴。天容海色本澄清。空餘魯叟乘槎意。粗識軒轅奏樂聲。九死南荒吾不恨。茲遊奇絕冠平生。

海上雜歌

明薛蕙

天雞啼處夜生潮。東望蓬萊翠霧消。紫貝高爲雲外闕。青龍盤作日邊橋。

長江

唐杜甫

浩浩終不息。乃知東極臨。衆流歸海意。萬國奉君心。色借瀟湘闊。聲驅滬瀨深。未辭添霧雨。接上遇衣襟。

凌朝浮江旅思

唐韋承慶

晴天初日。春水送孤舟。山遠疑無樹。湖平似不流。岸花開且落。江鳥沒還浮。羈望傷千里。長歌遣四愁。

江行

唐江為

越信隔年稀。孤舟幾夢歸。月寒花露重。江晚水烟微。峯直帆相望。沙空鳥自飛。何時洞庭上。春雨滿蓑衣。

宿巴江

唐僧棲蟾

江聲五千里。瀉碧急於絃。不覺日又夜。爭教人少年。一汀巫峽月。兩岸子規天。山影似相伴。濃遮到客船。

漢江

唐杜牧

溶溶漾漾白鷗飛。綠淨春深好染衣。南去北來人自老。夕陽長送釣船歸。

漢江臨泛

唐王維

楚塞三湘接。荊門九派通。江流天地外。山色有無中。郡邑浮前浦。波瀾動遠空。襄陽好風日。留醉與山翁。

富春

唐吳融

水送山迎入富春。一川如畫晚晴新。雲低遠渡帆來重。潮落寒沙鳥下頻。未必柳間無謝客。也

應花裏有秦人。嚴光萬古清風在。不敢停橈更問津。

曲江春望

唐盧綸

菖蒲翻葉柳交枝。暗上蓮舟鳥不知。更到梅花最深處。玉樓金殿影參差。

河流

唐徐寅

洪流盤砥柱。淮濟不同波。莫訝清時少。都緣曲處多。遠能通玉塞。高復接銀河。大禹成門嶮。為龍始得過。

黃河

唐羅隱

莫把阿膠向此傾。此中天意固難明。解通銀漢應須曲。才出崑崙便不清。高祖誓功衣帶小。仙人占斗客槎輕。三千年後知誰在。何必勞君報太平。

自鞏洛舟行入黃河卽事寄府縣寮友

唐韋應物

夾水蒼山路向東。東南山豁大河通。寒樹依微遠塞外。夕陽明滅亂流中。孤村幾歲臨伊岸。一雁初晴下朔風。為報洛橋遊宦侶。扁舟不繫與心同。

渡淮

唐白居易

淮水東南闊。無風渡亦難。孤烟生半直。遠樹望多圓。春浪棹聲急。夕陽帆影殘。清流宜映月。今夜重陰看。

中元夜泊淮口

唐羅隱

木葉迎飄水面平。偶停孤棹已三更。秋涼霧露侵燈下。夜靜魚龍逼岸行。欹枕正牽題柱思。隔樓誰轉遶梁聲。錦帆天子狂魂魄。應過揚州看月明。

洛水

唐羅鄴

一道潺湲漲暖莎。年年惆悵是春過。莫言行路聽如此。流入深宮恨轉多。橋畔月明清見底。柳邊風去綠生波。縱然滿眼添歸思。未把漁竿奈爾何。

渡湘水

唐杜審言

遲日園林悲昔遊。今春花鳥作邊愁。獨連京國人難寘。不似湘江水北流。

臨洞庭湖

唐孟浩然

八月湖水平。涵虛混太清。氣蒸雲夢澤。波撼岳陽城。欲濟無舟楫。端居取聖明。坐觀垂釣者。徒有羨魚情。

洞庭

唐許崇

驚波常不測。半日鬢堪斑。四顧疑無地。中流忽有山。鳥飛應畏墜。帆遠却如閒。漁父時相引。行歌浩渺間。

秋晚過洞庭

唐張泌

征帆高挂酒初酣。暮景離情兩不堪。千里晚霞雲夢北。一洲霜橘洞庭南。溪風送雨過秋寺。峒石驚龍落夜潭。莫把羈魂弔湘魄。九疑愁絕鎖烟嵐。

鄱陽湖

明吳國綸

欲向匡廬卧白雲。宮亭水色畫氤氳。千山日射魚龍窟。萬里霜寒雁鴛羣。浪擁帆樯天際下。星瞻吳楚鏡中分。東南歲暮仍鼙鼓。莫遣孤舟逐客聞。

太湖徐望

元僧久默

翠微浮水面。白浪浴峯頭。秋韻飛高葦。眉痕畫遠舟。半天人字雁。幾個夕陽鷗。漁醉狂歌送。猶勝萬戶侯。

九鯉湖

唐徐寅

到來峭壁白雲齊。載酒春遊渡九溪。鐵嶂有樓靈欲墮。石門無鎖路還迷。湖頭鯉去轟雷在。樹杪猿吟落日低。回首浮生真幻夢。何如此地傍幽棲。

南湖

唐溫庭筠

湖上微風入檻涼。翻翻菱荇滿廻塘。野船著岸偎春草。水鳥帶波飛夕陽。葢葉有聲疑霧雨。浪花無際似瀟湘。飄然蓬艇東遊客。盡日相看憶楚鄉。

西湖

附俞琰

妙境何年劈巨靈。眼前風景畫難形。一泓碧水開明鏡。三面青山列翠屏。逕曲綠迷高下樹。橋迴紅簇短長亭。數椽安得容留住。柳岸鶯聲好細聽。

湖上

宋方岳

綠波如畫雨初晴。一岸烟蕪極望平。日暮落花風欲定。小樓絃管壓新聲。

湖景

宋徐元杰

花開紅樹亂鶯啼。草長平湖白鷺飛。風日晴和人意好。夕陽蕭鼓幾船歸。

過女兒浦

元鄭韶

浦口寒烟生白波。蘋花風急棹舟過。人家一路青山下。只有秋田落雁多。

溪上

唐杜甫

峽內淹留客。溪邊四五家。古苔生迤地。秋竹隱疎花。塞俗人無井。山田飯有沙。西江使船至。時復問京華。

利州南渡

唐溫庭筠

淡然空水對斜暉。曲島蒼茫接翠微。波上馬嘶看棹去。柳邊人歇待船歸。數叢沙草羣鷗散。萬頃江田一鷺飛。誰解乘舟尋范蠡。五湖烟水獨忘機。

過蠻溪渡

唐崔魯

綠楊如髮雨如烟。立馬危橋獨喚船。山口斷雲迷舊路。波頭芳草憶前身。身隨遠道徒悲梗。詩賣明時不值錢。歸去楚臺還有計。釣船春雨日高眠。

廬山桑落洲

唐胡玢

莫問桑田事。但看桑落洲。數家新住處。昔日大江流。古岸奔欲盡。平沙長未休。想因百年後。人世更悠悠。

龍潭

唐僧應物

石激懸流雪滿灣。五龍潛處野雲閒。暫收雷電九峯下。且飲溪潭一水間。浪引浮槎依北岸。波分曉日浸東山。回瞻四面如看畫。須信遊人不欲還。

滁州西澗

唐韋應物

獨憐幽草澗邊生。上有黃鸝深樹鳴。春潮帶雨晚來急。野渡無人舟自橫。

嚴陵灘

唐羅隱

中都九鼎動英髦。漁釣牛叢且遁逃。世祖升遐天子死。原陵不及釣臺高。

山下泉

唐李端

碧水映丹霞。濺濺度淺沙。暗通山下草。流出洞中花。素色和雲落。暄聲遶石斜。明朝更尋去。應到阮郎家。

憶山泉

唐吳融

穿雲絡石細淙淙。杳杳疑聞弄管絃。千仞洒來寒碎玉。一泓深處碧涵天。烟迷葉亂尋難見。月好風清聽不眠。暮雨正多歸未得。只因流恨更潺湲。

泉

唐崔塗

遠辭岩竇瀉潺湲。靜拂雲根別故山。可惜寒聲留不得。旋添波浪向人間。

瀑布

明朱之蕃

萬峯迴合欲參天。千丈驚看匹練懸。素女機絲搖皓月。鮫人綈帶漾輕烟。匡廬色借香花散。雁蕩聲隨歌吹傳。何必瑤京餐沆瀣。枕流終日弄潺湲。

和尚書咏山瀑布十二韻

唐徐寅

名齊火浣溢山椒。誰把驚虹挂一條。天外倚來秋水刃。海心飛上白龍綃。民田鑿斷雲根引。僧
圓穿通竹影澆。噴石似烟輕漠漠。灑崖如雨冷蕭蕭。乍疑玉繭纏蒼壁。忽訝銀河落絳霄。寒漱
綠陰仙桂老。碎流紅艷野桃夭。千尋綠寫長年在。六出花開夏日消。急恐劃分青嶂骨。久應棚
裂翠微腰。濯纓便可識漁父。洗耳還應傲帝堯。林降猿猱偏得飲。岸邊烏鵲擬為橋。赤城未到
詩先寄。廬阜曾遊夢已遙。數夜積霖聲更遠。郡樓欹枕聽良宵。

題雙瀑

宋王十朋

瀑水蕭峯下。靈源不可尋。倚天雙寶劍。點石萬星金。勢合鯨鯢鬪。聲齊虎豹吟。我來遊勝景。洗
耳聽清音。

廬山瀑布

唐李白

日照香爐生紫烟。遙看瀑布挂前川。飛流直下三千尺。疑是銀河落九天。

江潮

元謝宗可

靈胥怒開島門開。十萬神兵戰鼓回。龍決黃河銀浪湧。鼇翻坤軸玉山摧。半江飛雪橫空起。千

里奔雷撼地來。欲駕雲帆滄海去。秋風八月上蓬萊。

錢塘觀潮

元仇遠

一痕初見海門生。頃刻長驅作怒聲。萬馬突圍天鼓碎。六鼇翻背泰山傾。遠朝魏闕心猶在。直上嚴灘勢始平。寄語吳兒休踏浪。天河罔象正縱橫。

看濤

唐朱慶餘

不知來遠近。但見白峨峨。風雨驅飛玉。魚龍迸上波。聲長勢未盡。曉去夕還過。要路橫天堦。其如造化何。

小池

唐方干

廣狹偶然非製定。猶存方寸象滄溟。一泓春水無多浪。數尺晴天幾個星。露滿玉盤當半夜。匣開金鏡在中庭。主人垂釣常來看。誰把漁竿醉未醒。

秋池

唐吳融

冷涵秋影碧溶溶。一片澄明見底空。有日晴來雲襯白。幾時吹落葉浮紅。香啼夢聽娟娟露。乾

動蓮莖淅淅風。凌曉無端照衰髮。便悲霜雪鏡光中。

和韋承慶過義陽公主山池

唐杜審言

徑轉危峯逼。橋迴缺岸坊。玉泉移酒味。石髓換梗香。綰霧青絲弱。牽風紫蔓長。猶言宴樂少。別向後池塘。

又

攢石當軒倚。懸泉度牖飛。鹿麝銜妓席。鶴子曳童衣。園果嘗難遍。池蓮摘未稀。卷簾惟待月。應在醉中歸。

又

賞玩奇他日。高深愛此時。池分入水背。峯作九山疑。地靜魚偏逸。人間鳥欲欺。青溪留別興。更與白雲期。

從岐王夜宴衛家山池應教

唐王維

坐客香貂滿。宮娃綺幔張。澗花輕粉色。山月少燈光。積翠紗窗暗。飛泉繡戶涼。還將歌舞出。歸

路莫愁長。

興慶池侍宴應制

唐韋元旦

滄池滌沆帝城邊。殊勝昆明鑿漢年。夾岸旌旗疏葦道。中流簫鼓振樓船。雲峯四起迎宸幄。水樹千重入御筵。宴樂已深魚藻咏。承恩更欲奏甘泉。

又

唐蘇頲

降鶴池前廻步輦。棲鸞樹杪出行宮。山光積翠遙疑逼。水態含青近若空。直視天河垂象外。俯窺京室畫圖中。皇歡未使恩波極。日暮樓船更起風。

池上

唐鄭谷

池樹愜幽獨。狂吟學解嘲。露荷香自在。風竹冷相敲。喪志嫌孤宦。無機愛淡交。仙山如有分。必擬訪三茅。

元處士池上

唐溫庭筠

蓼穗菱叢思蠶姑。水螢江鳥滿烟蒲。愁紅一片風前落。池上秋波似五湖。

御溝

唐王貞白

一派御溝水。綠槐相蔭清。此中涵帝澤。無處濯塵纓。鳥道來雖險。龍池到自平。朝宗心本切。願向急流傾。

和崔校書新穿井

唐章孝標

霜鍾破桐陰。青絲試淺濈。月輪開地脉。鏡面寫天心。碧甃花千片。香泉乳百尋。欲知尋汲引。聽取轆轤音。

府試水始冰

唐馬戴

南池寒色動。北陸歲陰生。薄薄流澌聚。澹澹翠濺平。暗沾霜稍厚。迴照日還輕。乳竇懸殘滴。潮流減恨聲。那堪金井貯。曾映玉壺清。潔白心誰識。空期飲此明。

冰花

明朱之蕃

旋空風急暮雲平。幻出飛花下玉京。頃刻粧成欺楮葉。郊原踏遍勝瓊英。光搖書幌人忘寐。香藉庭梅夜轉清。吟就不妨消渴甚。天應付與點茶鐙。

居處部

宮中行樂詞

唐李 白

盧橘爲秦樹。蒲萄出漢宮。烟花宜落日。絲管醉春風。
笛奏龍吟水。簫鳴鳳下空。君王多樂事。還與萬方同。

又

寒雪梅中盡。春風柳上歸。宮鶯嬌欲醉。薜燕語還飛。
遲日明歌席。新花艷舞衣。晚來移綠仗。行樂有光輝。

又

水綠南薰殿。花紅北闕樓。鶯歌聞太液。鳳吹繞瀛洲。
素女鳴珠珮。天人弄綠毬。今朝風日好。宜入未央遊。

敕借岐王九成宮避暑應教

唐王 維

帝子遠辭丹鳳閣。天書遙借翠微宮。隔窗雲霧生衣上。
卷幔山泉入鏡中。林下水聲喧笑語。岩

前樹色隱房櫺。仙家未必能勝此。何事吹簫向碧空。

和賈至舍人早朝大明宮之作

絳幘雞人報曉籌。尚衣方進翠雲裘。九天閭闔開宮殿。萬國衣冠拜冕旒。日色才臨仙掌動。香烟欲傍裊龍浮。朝罷須裁五色詔。珮聲歸到鳳池頭。

又

唐岑參

雞鳴紫陌曙光寒。鶯啭皇州春色闌。金闕曉鐘開萬戶。玉墀仙仗擁千官。花迎劍佩星初落。柳拂旌旗露未乾。獨有鳳凰池上客。陽春一曲和皆難。

古行宮

唐章孝標

无烟疎冷古行宮。寂寞朱門反鎖空。殘粉水銀流砌下。墮環秋月落泥中。鶯傳舊語嬌春日。花學嚴粧妬曉風。天子時清不巡幸。只應鸞鳳集梧桐。

經古行宮

唐杜牧

臺閣參差倚夕陽。年年花發滿山香。重門關閉青春晚。深殿垂簾白日長。草色芊綿侵御路。泉

聲鳴咽繞宮牆。先皇一去無回駕。紅粉雲鬟空斷腸。

隋宮

唐李商隱

紫泉宮殿鎖烟霞。欲取燕城作帝家。玉璽不緣歸日角。錦帆應是到天涯。於今腐草無螢火。終古垂楊有暮鴉。地下若逢陳後主。豈宜從問後庭花。

長信宮

唐關名

細草侵階亂碧蘚。宮門深鎖綠楊天。珠簾欲捲樓秋水。羅幌微開動冷烟。風引漏聲來枕上。月移花影到窗前。獨挑殘燭魂堪斷。却恨青蛾誤少年。

宮詞

唐薛逢

十二樓中盡曉粧。望仙樓上望君王。鎖呶金獸連環冷。水滴銅龍畫漏長。雲鬢罷梳還對鏡。羅衣欲換更添香。遙窺正殿簾開處。袍袴宮人掃御床。

又

唐王建

龍烟紫氣日瞳瞳。宣政門當玉殿風。五刻闌前卿相出。下簾聲在半天中。

又

未暗報來門鎖了。夜深應別喚笙歌。房下著珠簾睡。月過金堦白露多。

又

宋徽宗

春朝小雨乍新晴。祥霧勻收洞宇明。嚴警不聞人一語。海棠枝上曉鶯聲。

又

花洞連延一架平。文鴛雙砌接珍亭。明暉北望垂楊岸。滿目烟波上下青。

又

宋花藥夫人

廚盤進食簇時新。侍宴無非列近臣。日午殿頭宣索鱠。隔花催喚打魚人。

紫宸殿退朝口號

唐杜甫

戶外昭容紫袖垂。雙瞻御座引朝儀。香飄合殿春風轉。花覆千官淑景移。晝漏稀聞高閣報。天顏有喜近臣知。宮中每出歸東省。會送夔龍集鳳池。

門

唐李嶠

奕奕彤閣下。遄遄紫禁隈。阿房萬戶列。閭闔九重開。疏廣遺榮去。子公待駟來。詎知金馬側。方朔有奇才。

晚出左掖

唐杜甫

刻漏傳呼淺。春旂簇仗齊。退朝花底散。歸院柳邊迷。樓雪融城濕。宮雲去殿低。避人焚諫草。騎馬欲雞棲。

春宿左省

花隱掖垣暮。啾啾棲鳥過。星臨萬戶動。月傍九霄多。不寢聽金鑰。因風想玉珂。明朝有封事。數問夜如何。

中秋禁直

唐韓偓

星斗疎明禁漏殘。紫泥封後獨凭欄。露和玉霄金盤冷。月射珠光貝闕寒。天視樓臺歸苑外。風吹歌管下雲端。長卿祇爲長門賦。未識君臣際會難。

翰林齋宿

明文徵明

春星爛熳燭微垣。獨擁青綾向夜闌。宮漏隔花銀箭永。蓮燈垂燼玉堂寒。坐聆宵折霜團屋。起見郊禋月滿壇。鈴索無風塵土遠。始知仙署逼金鑾。

入直

宋周必大

綠槐夾道集昏鴉。敕使傳宣坐賜茶。歸到玉堂清不寐。月鉤初上紫薇花。

漢苑行

唐張仲素

春風淡淡影悠悠。鶯囀高枝燕入樓。千步迴廊聞鳳吹。珠簾處處上銀鉤。

樓

唐李嶠

百尺重城際。千尋大道隈。漢宮井幹起。吳國落星開。笛怨綠珠去。蕭隨弄玉來。消憂聊假日。誰識仲宣才。

登兗州城樓

唐杜甫

東郡趨庭日。南樓縱目初。浮雲連海岱。平野入青徐。孤嶂秦碑在。荒城魯殿餘。從來多古意。臨眺獨躊躇。

黃鶴樓

唐崔顥

昔人已乘黃鶴去。此地空餘黃鶴樓。黃鶴一去不復返。白雲千載空悠悠。晴川歷歷漢陽樹。芳草淒淒鸚鵡洲。日暮鄉關何處是。煙波江上使人愁。

登樓

花近高樓傷客心。萬方多難此登臨。錦江春色來天地。玉壘浮雲變古今。北極朝廷終不改。西山寇盜莫相侵。可憐後主還祠廟。日暮聊爲梁父吟。

鵲鵲樓

唐李益

鵲鵲樓西百尺檣。汀洲雲樹共茫茫。漢家簫鼓空流水。魏國山河半夕陽。事去千年猶恨促。愁來一日即爲長。風烟併起思鄉望。遠日非春亦自傷。

岳陽樓晚望

唐崔珣

乾坤千里水雲間。釣艇如萍去復還。樓上北風斜捲席。湖中西日倒銜山。懷沙有恨騷人往。鼓瑟無師帝子閒。何事黃昏尚凝睇。數行煙樹接荆蠻。

南樓

宋葛長庚

凭暖朱欄力已酥。樓前眼結望中疎。溪陽草樹看來短。淮岸人家淡欲無。薄暮鴉翻千點墨。晴空雁草數行書。多情庾亮吟魂遠。風泛蘆花秋滿湖。

煙雨樓

明葛一龍

煙雨樓頭春乍晴。鴛鴦湖上鳥嚶嚶。中浮片席空三面。斜抱千家截半城。漁網晒來風柳變。酒船搖出浪花平。夕陽慣照憑欄妓。一抹遙山紅袖明。

江樓

唐韓偓

夢啼嗚咽覺無語。杳杳微微望烟浦。樓空客散燕交飛。江靜帆稀日亭午。

單同年求德興俞氏聚遠樓詩

宋蘇軾

雲山烟水苦難親。野草閒花各自春。賴有高楼能聚遠。一時收拾與閒人。

亭臺

唐秦韜玉

雕檻累棟架崔嵬。院宇生烟次第開。為向西窗添月色。豈辭南海取花栽。意將盡地成幽沼。勢

擬驅山近小臺。清鏡漸深宮轉迴。春時長是別人來。

司天臺

唐李山甫

拂雲朱檻捧昭回。靜對銅渾水鏡開。太史只知頻奏瑞。蒼生無計可陳災。景公進德星曾退。漢帝推誠日爲迴。何事曠官全不語。好天良月鎖高臺。

草閣

唐杜甫

草閣臨無地。柴扉永不關。魚龍迴夜水。星月動秋山。夕露晴初濕。高雲薄未還。泛舟慚小婦。飄泊損紅顏。

題宣義池亭

唐姚合

春入池亭好。風光暖更鮮。尋芳行不困。選勝坐還遷。細草亂如髮。幽禽鳥似絃。苔紋翻古篆。石色學秋天。花落能漂酒。萍開解避船。暫來還差疾。久住合成仙。迸筍搖階近。垂藤壓樹偏。此生應借看。自計買無錢。

春日宴宋主簿山亭得寒字

唐宋之問

公子正邀歡。林亭春未闌。攀岩踐苔易。迷路出花難。窗覆垂楊暖。堦侵瀑水寒。帝城歸路直。留與接鷓鴣。

蔡起居山亭

唐胡皓

文史歸休日。栖閒卧草亭。薔薇一架紫。石竹數重青。垂露和仙藥。燒香誦道經。莫將山水弄。持與世人聽。

謝公亭

唐李白

謝公離別處。風景每生愁。客散青天月。山空碧水流。池花春映日。窗竹夜鳴秋。今古一相接。長歌懷舊遊。

溪亭

唐許渾

溪亭四面山。橫柳半溪灣。蟬響螳螂急。魚深翡翠閒。水寒留客醉。月上與僧還。猶戀蕭蕭竹。西齋未掩關。

懷真珠亭

唐溫庭筠

珠箔金鈎對彩橋。昔年於此見嬌嬌。香燈帳望飛瓊翼。涼月殷勤碧玉簫。屏倚故窗山六扇。柳垂寒砌露千條。壞牆經雨蒼苔遍。拾得當時舊翠翹。

夏日題老將林亭

唐張蠡

百戰功成翻愛靜。侯門漸欲似仙家。牆頭細雨垂纖草。水面回風聚落花。井放轆轤閒浸酒。龍開鸚鵡報烹茶。幾人圖在凌烟閣。曾不交鋒向塞沙。

遊朱坡故少保杜公林亭

唐闕名

杜陵池館洛城東。孤鳥廻汀路不窮。高岫乍疑三峽近。遠波初似五湖通。梧桐葉暗蕭蕭雨。菱荇花香淡淡風。還有舊時巢燕在。飛來飛去畫堂空。

山亭夏日

綠樹陰濃夏日長。樓臺倒影入池塘。水晶簾動微風起。滿架薔薇一院香。

宋氏林亭

唐薛能

地濕莎青雨後天。桃花紅近竹林邊。行人本是農桑客。記得春深欲種田。

題隱霧亭

唐魚元機

春花秋月入詩篇。白日清宵是散仙。空捲珠簾不曾下。長移一榻對山眠。

深院

唐韓偓

鵝兒唼喋梳黃嘴。鳳子輕盈膩粉腰。深院下簾人晝寢。紅薔薇映碧芭蕉。

東堂新成

明嚴嵩

無端世路繞羊腸。偶以疎慵得自藏。種竹旋添畫數徑。買山聊起讀書堂。開窗古木蕭蕭籟。隱几寒花寂寂香。莫笑野人生計少。濯纓隨處有滄浪。

蚤秋過龍武李將軍書齋

唐王建

高樹蟬聲深巷裏。朱門冷靜似閒居。重裝墨畫數莖竹。長著香薰一架書。語笑侍兒知禮數。吟哦野老任狂疎。就中愛讀英雄傳。又說功勳恐不如。

錢塘青山李隱居西齋

唐許渾

小隱西亭為客開。翠蘿深處遍蒼苔。林間掃石安棋局。岩下分香遞酒杯。蘭葉露光秋月上。蘆

花風起夜潮來。雲山繞屋猶嫌淺。欲擢漁舟近釣臺。

書齋漫興

唐翁承贊

池塘四五尺深水。籬落兩三般樣花。過客不須頻問姓。讀書聲裏是吾家。

南軒

唐戴叔倫

野居何處是。軒外一橫塘。坐納薰風細。簾垂白日長。西山如對畫。臨水坐流觴。更愛閒花木。忻忻得向陽。

題碧藻軒

明唐寅

畫堂基構畫船通。碧水連漪碧藻叢。波弄日光翻上棟。窗含烟景直浮空。簾垂菡萏花開上。魚戲欄杆倒影中。試倩詩人略評品。不妨喚作水晶宮。

題盧處士居

唐溫庭筠

西溪閑隱客。遙識楚人家。古樹老連石。急泉清露沙。千峯隨雨暗。一徑入雲斜。日暮飛鴉散。滿庭蕎麥花。

題李處士幽居

水玉簪頭白角巾。瑤琴寂歷拂輕塵。濃陰似帳紅薇晚。細雨如烟碧草春。隔竹見籠疑有鶴。捲簾看盡靜無人。南窗自有忘機友。谷口徒稱鄭子真。

經李徵君故居

露濃烟重草萋萋。樹映欄杆柳拂堤。一院落花無客醉。半窗殘月有鶯啼。芳筵想像情難盡。故榭荒涼路已迷。惆悵羸驂來往慣。每經門巷亦長嘶。

次題二守許過新居

宋蘇軾

數畝蓬蒿古縣陰。晚窗明快夜堂深。也知卜築非真宅。聊欲跼蹐看此心。聞道攜壺閑奇字。更因登木助微音。相娛比戶江千頃。直下都無地可臨。

宅

唐李嶠

寂寂蓬蒿徑。喧喧湫隘廬。屢逢長者轍。時引故人車。孟母遷鄰罷。將軍辭第初。誰憐草元處。獨對一牀書。

侍宴安樂公主新宅應制

唐蘇頌

駉駉羽騎歷城池。帝女樓臺向晚披。露洒旌旗雲外出。風迴岩岫雨中移。當軒半落天河水。傍欄還低月樹枝。簫鼓宸遊陪宴日。和鳴雙鳳喜來儀。

題田將軍宅

唐姚合

焚香書院最風流。莎草綠牆綠薛秋。近砌別穿澆藥井。臨街新起看山樓。棲禽戀竹明猶在。客觀花夜未休。好是暗移城裏宅。清涼潭得似江頭。

廢宅

唐吳融

風飄碧瓦雨摧垣。却有鄰人為鎖門。幾樹好花空白晝。滿庭荒草易黃昏。放魚池涸蛙爭聚。棲燕梁空雀自喧。不獨淒涼眼前事。咸陽一火變成原。

青溪江令公宅

唐羅隱

鶯箋象管夜深時。曾賦陳宮第一詩。讎罷風流人不見。廢來踪跡草應知。鶯憐勝事啼空谷。蝶戀餘香舞好枝。還有往年金甃井。牧童樵叟等閒窺。

公子家

唐李山甫

曾是皇家幾世侯。入雲高第照神州。柳遮門戶橫金鎖。花擁絃歌咽畫樓。錦袖妬姬爭巧笑。玉銜騎馬索閒遊。麻衣酷獻生平業。醉倚春風不點頭。

又

柳底花陰壓路塵。瑞烟輕罩一園春。鴛鴦占水能欺客。鸚鵡嫌籠解罵人。腰褭似龍隨日換。輕盈如燕逐年新。不知買盡長安笑。活得蒼生幾戶貧。

尋山家

唐長孫佐輔

獨訪山家歇還涉。茅屋斜連隔松葉。主人聞語未開門。繞籬野菜飛黃蝶。

張谷田舍

唐鄭谷

縣官清且儉。深谷有人家。一徑入寒竹。小橋穿野花。碓喧春澗滿。梯倚綠桑斜。自說年來稔。前村酒可賒。

南溪別業

唐岑參

結宇依青嶂。開軒對翠嶂。樹交花兩色。溪合水重流。竹徑春來掃。蘭樽夜不收。逍遙自得意。鼓腹醉中遊。

蘇氏別業

別業居幽處。閒來生隱心。南山當戶牖。澧水映園林。竹覆經冬雪。庭昏未夕陰。寥寥人境外。獨坐聽春禽。

題友人別業

唐白居易

樹深藤老竹廻還。石壁重重翡翠斑。俗客見來猶解愛。忙人到此亦偷閒。況當霽景涼風後。如在千岩萬壑間。黃綺更歸何處去。洛陽城外有商山。

寄題戴氏別墅

宋劉宰

聞君築室水雲鄉。一榻翛然獨老龐。近挹荷香供几案。遠邀山翠入軒窗。自歌自笑遊魚樂。時去時來白鳥雙。何日過門成夜泊。一樽相對銀缸。

城西訪友人別墅

唐雍陶

漫水橋邊小路斜。日高猶未到君家。村原門巷多相似。處處春風枳殼花。

奉和辛韋嗣立山莊應制

唐李嶠

南洛師臣契。東巖王佐居。幽情遺綬冕。宸眷屬樵漁。制下峒山蹕。恩同灞水興。松門駐旌蓋。薜幄引簪裾。石磴平黃陸。烟樓半紫虛。雲霞仙路近。琴酒俗情疎。喬木千齡外。懸泉百丈餘。崖深經錄藥。穴古舊藏書。樹宿搏風鳥。池潛縱壑魚。寧知天子貴。尚憶武侯廬。

同李舍人春日宴安樂公主山莊

唐沈佺期

嘗聞天女貴。家即帝居連。亭插宜春果。山銜太液泉。橋低烏鵲夜。臺起鳳凰年。故事猶如此。新圖更可憐。紫岩粧閨透。青嶂妓樓懸。峯奪香爐巧。池偷明鏡圓。梅花寒似雪。桂葉曉留烟。興盡方投轄。金聲還復傳。

陸渾山莊

唐宋之問

歸來物外情。負杖閭岩耕。源水看花入。幽林採藥行。野人相問姓。山鳥自呼名。去去獨吾樂。無能愧此生。

過故人莊

唐孟浩然

故人具雞黍。邀我至田家。綠樹村邊合。青山郭外斜。開筵面場圃。把酒話桑麻。待到重陽日。還來看菊花。

陳使君山莊

唐牟融

新卜幽居地自偏。士林爭羨使君賢。數椽蕭洒臨溪屋。十畝膏腴附郭田。流水斷橋荒草路。淡烟疎雨落花天。秋成準擬重來此。沉醉何妨一榻眠。

園

唐杜甫

仲夏多流水。清晨向小園。碧溪搖縱闕。朱果爛枝繁。始爲江山靜。終防市井喧。畦蔬饒茅屋。自足媚盤飧。

小園

唐李建勳

小園我所好。栽植忘勞形。晚果經霜赤。寒蔬近社青。竹籬荒引蔓。土井淺生萍。更欲從人勸。憑高置草亭。

春日芙蓉園侍宴應制

唐宋之問

芙蓉秦地沼。盧橘漢家園。谷轉斜盤徑。川迴曲抱原。風來花自舞。春入鳥能言。侍宴瑤池夕。歸途笳吹繁。

石季倫金谷故園

唐許堯佐

石氏遺文在。淒涼見故園。清風思索樂。衰草念行軒。舞榭蒼苔掩。歌臺落葉繁。斷雲歸舊壑。流水咽新源。曲沼殘陽歛。叢篁宿鳥喧。惟餘池上月。猶似對金樽。

新闢小園

唐陸游

東軒嫩日上疎櫺。吹盡浮雲作意晴。林暖牆頭雙鶻語。水清池面小魚行。畦添藥品誰能別。架引藤陰忽已成。倚杖怡然便終日。老夫那復不平鳴。

又

山園寂寂閉春風。箇裏天教著放翁。萬事已拋高枕外。一樽常醉亂花中。閒隨戲蝶忘形久。細聽啼鶯得意同。月桂可憐常在眼。小橋時放一枝紅。

暢春園卽景

明張氏

蒼茫山色映新晴。紫氣遙瞻識鳳城。兩岸垂楊高閣蔭。一灣流水小橋橫。湘簾日轉花陰細。翠幙風柔燕語輕。卽此便非塵世界。三山何必訪蓬瀛。

又

天涯寄跡一閒身。遊處風光觸目新。飛鷺落霞天際影。畫船烟柳景中人。波回曲沼開明鏡。草際平陂列翠茵。自愧庸才叨授簡。朝朝扈從侍芳辰。

春園家宴

唐張謂

南園春色正相宜。大婦同行少婦隨。竹裏登樓人不見。花間覓路鳥先知。櫻桃解結垂簷果。楊柳能低入戶枝。山簡醉來歌一曲。參差笑殺郢中兒。

秋園

唐吳融

始憐春草細霏霏。不覺秋來綠漸稀。惆悵擷芳人散盡。滿園烟露蛩高飛。

邨園

元金涓

半畝邨園接水涯。誅茅新構小書齋。窗前不用栽花柳。只對青山景自佳。

遊東湖黃處士園林

唐劉威

偶向東湖更向東。數聲雞犬翠微中。遙知楊柳是門處。似隔芙蓉無路通。樵客出來山帶雨。漁舟歸去水生風。物情多與閒相稱。所恨求安計不同。

積芳圃

宋朱子

樂事從茲不易涯。朱門還似野人家。行看靚豔須攜酒。坐對清陰只煮茶。曉起蒼涼承墜露。晚來光景亂蒸霞。平生結習今餘幾。試數毗那襟上花。

鹿柴

唐王維

空山不見人。但聞人語響。返景入深林。復照青苔上。

竹里館

獨坐幽篁裏。彈琴復長嘯。深林人不知。明月來相照。

山館

唐皇甫冉

山館長寂寂。閒雲朝夕來。空庭復何有。落日照蒼苔。

又

唐杜甫

南國畫多霧。北風天正寒。路危行木杪。身遠宿雲端。山鬼吹燈滅。廚人語夜闌。雞鳴問前館。世亂敢求安。

江館

唐朱慶餘

江館遙遙處。知音信轉賒。夜深鄉夢覺。窗下月明斜。起雁看荒草。驚波尚白沙。那堪動鄉思。故國在天涯。

宿江店

唐張籍

野店臨西浦。門前有橘花。停燈待賁客。賣酒與漁家。夜靜秋霜白。路迴山月斜。閒尋泊船處。潮落見平沙。

浴堂

唐謝宗可

香泉湧出半池溫。難洗人間萬古塵。混沌殼中天不曉。淋漓氣底夜長春。波濤鼓怒喧風雨。雲

霧隨陰護鬼神。却笑相逢裸形國。不知誰是浴沂人。

寺觀部

題杭州靈隱寺

唐張祐

峯巒開一掌。朱檻幾廻延。佛地花分界。僧房竹引泉。五更樓下月。十里郭中烟。後塔聳亭後。前山橫閣前。溪沙涵水靜。澗石照苔鮮。好是呼猿久。西岩深響連。

過香積寺

唐王維

不知香積寺。數里入雲峯。古木無人徑。深山何處鐘。泉聲咽危石。日色冷青松。薄暮空潭曲。安禪制毒龍。

山寺

唐杜甫

野寺殘僧少。山園細路高。麝香眠石竹。鷓鴣家金桃。亂水通人過。懸崖置屋牢。上方重閣晚。百里見纖毫。

題重居寺

浮圖經近郭。長日美僧閒。竹徑深開院。松門遠對山。重廊標板榜。高殿鎖金環。更問宗雷室。西行咫尺間。

澧湖山寺

唐張說

空山寂歷道心生。虛谷迢遙夜鳥聲。禪室從來塵外賞。香臺豈是世中情。雲間束嶺千尋出。樹裏南湖一片明。若使巢由知此意。不將蘿薜易簪纓。

涪城縣香積寺官閣

唐杜甫

寺下春江深不流。山腰官閣迥添愁。含風翠壁孤雲細。背日丹楓萬木稠。小院迴廊春寂寂。浴鵑飛鷺曉悠悠。諸天合在藤蘿外。昏黑應須到上頭。

酬錢起秋夜宿靈臺見寄

唐郎士元

石林精舍虎溪東。夜扣禪扉謁遠公。月在上方諸品靜。心持半偈萬緣空。蒼苔古道行應遍。落木寒泉聽不窮。惟有雙峯最高頂。此心期與故人同。

開聖寺

唐溫庭筠

路分溪石夾烟叢。十里蕭蕭古樹風。出寺馬嘶秋色裏，向陵鴉亂夕陽中。竹間泉落山廚靜。塔下僧歸殿影空。猶有南朝舊碑在。敢將興廢問休公。

宿山寺

唐項斯

衆葉重重覆翠微。黃昏溪上語人稀。月明古寺客初到。風度閒門僧未歸。山果經霜多自落。水螢穿竹不停飛。中宵能得幾時睡。遠避鐘聲催着衣。

遊法興寺

元胡大游

山色搖光入袖涼。松陰十丈印回廊。老僧讀罷楞嚴咒。一殿神風柏子香。

題解空寺

元僧修禪

古塔凌空玉筍高。斜陽半壓水嘈嘈。老僧却掩殘經坐。靜聽松聲沸海濤。

題義公禪房

唐孟浩然

義公習禪寂。結宇依空林。戶外一峯秀。階前衆壑深。夕陽連雨足。空翠落庭陰。看取蓮花淨。方知不染心。

破山寺後禪院

唐常建

清晨入古寺。初日照高林。曲徑通幽處。禪房花木深。山光悅鳥性。潭影空人心。萬籟此俱寂。惟聞鐘磬音。

題崇福寺禪院

唐崔峒

僧家竟何事。掃地與焚香。清磬度山翠。閒雲來竹房。身心塵外遠。歲月坐中忘。向晚禪堂掩。無人空夕陽。

題興善寺寂上人院

唐鄭谷

客來風雨後。院靜似荒涼。罷講蛩離砌。停思葉滿廊。臘高興故疾。爐暖發餘香。自說匡廬側。移陰半石牀。

僧院

唐僧靈一

虎溪閒月引相過。帶雪松枝掛薜蘿。無限青山行欲盡。白雲深處老僧多。

生公講堂

唐劉禹錫

生公說法鬼神聽。身後堂空夜不扃。高座寂寥塵漠漠。一方明月可中亭。

宿無可上人房

唐馬戴

稀逢息心侶。細語遠山期。河漢秋深夜。松杉露滴時。風傳林磬響。月掩草堂遲。坐卧禪心在。浮生皆不知。

翠峯菴卽事

唐黃庚

竟日尋幽處。杖藜不憚遙。客行黃葉路。僧立碧溪橋。岩瀑飛寒雪。松風吼夜潮。是山皆可隱。何用楚辭招。

登總持塔

唐駱賓王

梵宇出三天。登臨望八川。開襟俯城闕。揮手拍雲烟。函谷春山外。昆明落日邊。東京楊柳陌。少別遂經年。

題慈恩塔

唐章八元

十層突兀在虛空。四十門開面面風。却怪鳥飛平地上。自驚人語半天中。迴梯暗踏如穿洞。絕

頂初攀似出籠。落日鳳城佳氣入。滿城春樹雨濛濛。

終南山白鶴樓

步步景通真。門前衆水分。煙蘿諸洞合。鐘磬上清聞。古木千尋雪。寒山萬丈雲。終期掃壇級。來事紫陽君。

題仙遊觀

唐韓翃

仙臺初見五城樓。風物淒淒宿雨收。山色遙連秦樹晚。砧聲近報漢宮秋。疎松影落空壇靜。細草春香小洞幽。何用列尋方外去。人間亦自有丹邱。

春日鎮陽柳溪道院

元薩都刺

城外青谿出洞門。道人歸去日長曛。柳花滿地無人掃。隔水遙看是白雲。

禹廟

唐杜甫

禹廟空山裏。秋風落日斜。荒庭垂橘柚。古屋畫龍蛇。雲氣生虛壁。江聲走白沙。早知乘四載。疏鑿控三巴。

周瑜廟

唐胡會

共說生前國步難。山川龍戰血漫漫。交鋒魏帝旌旗退。委質吳王社稷安。庭際雨餘春草長。廟前風起晚花殘。功勳碑碣今何在。不得當時一字看。

野廟

唐吳融

古原荒廟掩蒼苔。何處喧喧鼓笛來。日暮鳥歸人散盡。野風吹起紙錢灰。

荒祠

唐張籍

春草空祠暮。荒林惟鳥飛。記年碑石在。經亂祭人稀。野鼠緣朱帳。陰塵蓋畫衣。近來潭水黑。時見宿龍歸。

重過聖女祠

唐李商隱

白石岩扉碧藓滋。上清淪謫得歸遲。一春夢雨常飄瓦。盡日靈風不滿旗。萼綠華來無定所。杜蘭香去未移時。玉郎會此通仙籍。憶向天堦問紫芝。

咏物詩選卷四

魏塘俞 琰長仁輯

人部

田家

宋梅堯臣

高樹蔭柴扉。青苔點落暉。荷鋤山月上。尋徑野烟微。老叟扶童望。羸牛帶犢歸。燈前飯何有。白
薤露中肥。

又

唐聶夸中

鋤禾日當午。汗滴禾下土。誰知盤中食。粒粒皆辛苦。

農謠

宋方岳

漠漠餘香著草花。森森柔綠長桑麻。池塘水滿花成市。門巷春深燕作家。

宿漁家

唐劉威

竹屋清江上。風煙四五家。水園分芰葉。鄰畝認蘆花。雨到魚翻浪。洲迴鳥傍沙。月明何處去。片
片席帆斜。

西江上送漁父

唐溫庭筠

欲逐嚴光向若耶。釣輪焚棹寄年華。三秋梅雨愁楓葉。一夜扁舟宿葦花。不見水雲應有夢。偶
隨鷗鷺便成家。白蘋風起樓船暮。江燕雙雙五兩斜。

釣翁

唐秦韜玉

一竿青竹老江隈。荷葉衣裳可自裁。潭定靜懸絲影直。風高斜颭浪紋開。朝携輕棹穿雲去。暮
背寒塘戴月回。世上無窮嶮巖事。算應難入釣船來。

淮上漁者

唐鄭谷

白頭波上白頭翁。家送船移浦口風。一尺鱸魚新釣得。兒孫吹火荻花中。

樵子

唐陸龜蒙

生自蒼崖邊。能語白雲養。纔穿遠林去。已在孤峰上。薪和野花採。步帶山詞唱。日暮不歸來。柴

扉有人望。

樵者

宋歐陽修

雲際依依認舊林。斷崖荒磴路難尋。西山望見朝來雨。南澗歸時渡處深。

牧童

宋闕名

草鋪橫野六七里。笛弄晚風三四聲。歸來飽飯黃昏後。不脫蓑衣卧月明。

僧

金李俊民

貌與松俱瘦。心將絮共沾。一庵空寂地。香火讀楞嚴。

送靈澈上人還越

唐劉長卿

禪客無心杖錫還。越州深處草堂閒。身隨敝履經殘雪。手綴寒衣入舊山。獨向青溪依樹下。空留白日在人間。那堪別後長相憶。雲水蒼蒼但闕關。

送無可上人遊越

唐姚合

清晨相訪門前立。麻屨方袍一少年。嬾讀經文求作佛。但攻詩句覓成仙。芳春山影花連寺。獨

夜潮聲月滿船。今日送行偏惜別。共師文字有因緣。

贈日本鑑禪師

唐鄭谷

故國無心度海潮。老僧方丈倚中條。夜深雨絕松堂靜。一點山螢照寂寥。

贈道士

唐褚戴

簪星曳月下蓬壺。曾見東臯種白榆。六甲威靈藏瑞檢。五龍雷電繞霜都。惟教鶴採丹邱信。不使人窺太乙爐。聞說葛陂風浪惡。許騎青鹿從行無。

贈楊鍊師

唐鮑溶

紫煙衣上繡春雲。清隱山書小篆文。明月在天將鳳管。夜深吹向玉宸君。

貴公子

唐韋莊

大道青樓御苑東。玉蘭仙杏壓枝紅。金鈴犬吠梧桐院。朱鬣馬嘶楊柳風。流水帶花穿巷陌。斜陽和樹入簾櫳。瑤池宴罷歸來醉。笑語君王在月宮。

長安少年行

唐李廓

迢迢輕薄伴。閒遊不着緋。長櫳出獵馬。數換打毬衣。曉日尋花去。春風帶酒歸。青樓無晝夜。歌舞歇時稀。

又

日高春睡足。忙馬賞年華。倒插銀魚袋。行隨金犢車。還携新市酒。遠醉曲江花。幾度歸侵黑。金吾送到家。

又

戟門連日閉。苦欲惜殘春。開鎖通新客。教姬屈醉人。請歌牽白馬。自舞踏紅茵。時輩皆相許。平生不負身。

少年行

唐吳象之

永思錯獵小平津。使氣常遊中貴人。一擲千金潭是膽。家無四壁不知貧。

情

唐吳融

依依脉脉兩如何。細似輕絲渺似波。月不長圓花易落。一生惆悵爲伊多。

喜

久旱逢甘雨。他鄉遇故知。洞房花燭夜。金榜掛名時。

宋汪洙

春思

兀兀治聲酒未醒。霏霏撥火雨初晴。愁看入戶桃花片。閒聽爭巢燕子聲。百疾侵臨成老大。一春轉盼又清明。蘭亭禹廟渾如昨。回首兒時似隔生。

宋陸游

又

草色青青柳色黃。枕花歷亂李花香。東風不為吹愁去。春日偏能惹恨長。

唐賈至

秋思

清波收潦日。華林鳴籟初。芙蓉露下落。楊柳月中疎。燕裙湘綺被。趙帶流黃裾。相思阻音信。結

北齊蕭慤

夢感離居。

又

唐李中

巫峽雲深湘水遙。更無消息夢空勞。夢回深夜不成寐。起立閒庭看月高。

春宮怨

唐杜荀鶴

蚤被嬋娟悞。欲粧臨鏡慵。承恩不在貌。教妾若爲容。風暖烏聲碎。日高花影重。年年越溪女。相憶采芙蓉。

宮怨

隋侯夫人

庭絕玉輦跡。芳草漸成窩。隱隱聞簫鼓。君恩何處多。

又

欲泣不成淚。悲來翻強歌。庭花方爛熳。無計奈春何。

春怨

唐劉方平

紗窗日落漸黃昏。金屋無人見淚痕。寂寞空庭春又晚。梨花滿地不開門。

又

朝日殘鶯伴妾啼。開簾只見草萋萋。庭前時有春風入。楊柳千條盡向西。

西宮春怨

唐王昌齡

西宮夜靜百花香。欲捲珠簾春恨長。斜抱雲和深見月。朧朧樹色隱昭陽。

西宮秋怨

芙蓉不及美人粧。水殿風來珠翠香。却恨含情掩秋扇。空懸明月待君王。

恨

唐徐寅

事與時違不自由。如燒如刺寸心頭。烏江項籍思歸去。雁塞李陵長繫留。燕國飛霜將破夏。漢宮執扇豈禁秋。須知入骨難消處。莫比人間取次愁。

閒

不管人間是與非。白雲流水自相依。一瓢掛樹傲時代。五柳種門陰落暉。江上翠娥遺佩去。岸邊紅袖採蓮歸。客星辭得漢光武。却坐江東舊薜磯。

影

張劭

依稀相識便相從。一笑原非陸士龍。何忍寂寥燈下別。故宜蕭散水邊逢。白描未合傳神手。烏有偏分抱道容。却怪乾坤如許大。更無佳地著浮蹤。

夢

唐徐寅

月落燈前閉北堂。神魂交入杳冥鄉。文通毫管醒來異。武帝蘅蕤覺後香。傳說已微賢可輔。周公不見恨何長。生松十八年方應。適塞人間豈合忙。

春夢

唐岑參

洞房昨夜春風起。遙憶美人湘江水。枕上片時春夢中。行盡江南數千里。

麗人部

岐王席上咏美人

唐張諤

半額畫雙蛾。盈盈燭下歌。玉杯寒意少。金屋夜情多。香艷王分貼。裙嬌勅賜羅。平陽莫謾妬。喚出不如他。

天津橋上美人

唐駱賓王

美女出東鄰。容豫上天津。整衣香滿路。移步襪生塵。水下看粧影。肩頭畫月新。寄言曹子建。箇

是洛川神。

杜丞相筵上美人

唐李羣玉

裙拖六幅湘江水。鬢聳巫山一段雲。貌態只應天上有。歌聲豈合世間聞。胸前瑞雪燈斜照。眼底桃花酒半熏。不是相如能賦客。肯教容易見文君。

贈美人

唐章孝標

諸侯帳下慣新粧。皆怯劉家薄媚娘。寶髻巧梳金翡翠。羅裙宜著繡鴛鴦。輕輕舞汗初沾袖。細細歌聲欲繞梁。何事不歸巫峽去。故來人世斷人腸。

又

唐崔珏

錦里芬芳少佩蘭。風流全占似君難。心迷曉夢窗猶暗。粉落香肌汗未乾。兩臉天桃從鏡發。一眸春水照人寒。自嗟此地非吾土。不得如花歲歲看。

美人

唐韓偓

袅娜腰肢淡薄粧。六朝宮樣窄衣裳。著詞暫見櫻桃破。飛蓋遙聞薝蔔香。春惱情懷身覺瘦。酒

添顏色粉生光。此時不敢分明道。風月應知暗斷腸。

又

明楊基

纔向瑤臺覓舊踪。驛鴉啼斷景陽鐘。薄施朱粉粧偏媚。倒插花枝態更濃。立近晚風迷蛺蝶。坐臨秋水亂芙蓉。多情莫恨蓬山遠。只隔珠簾抵萬重。

又

唐盧綸

殘粧色淺髻鬟開。笑映珠簾覩客來。推醉惟知弄花鈿。潘郎不敢使人催。

又

自拈裙帶結同心。緩處偏知春氣深。愛促狂夫問閒事。不知歌舞問黃金。

陌上美人

唐李白

駿馬驕行踏落花。垂鞭直拂五雲車。美人一笑褰珠箔。遙指紅樓是妾家。

題贈美人

唐杜牧

娉娉裊裊十三餘。荳蔻梢頭二月初。春風十里揚州路。捲上珠簾總不如。

又

多情却似總無情。但覺尊前笑不成。蠟燭有心還惜別。替人垂淚到天明。

開府席上賦得佳人名解愁

唐盧綸

不敢苦相留。明知不自由。頻眉乍欲語。欲笑又低頭。舞態兼殘醉。歌聲似帶羞。今朝縱見也。只未解人愁。

貧女

唐秦韜玉

蓬門未識綺羅香。擬托良媒亦自傷。誰念風流高格調。共憐時世儉梳粧。敢將十指偏誇巧。不把雙眉闔畫長。苦恨年年壓金線。為他人作嫁衣裳。

邨女

元方回

青荷葉傘茜裙紅。隨母歸寧省外翁。莫笑梳粧未京樣。兵餘猶見太平風。

春女

唐張籍

新粧面面下珠樓。深鎖春光一院愁。行到中庭數花朵。蜻蜓飛上玉搔頭。

採蓮女

唐王昌齡

荷葉羅裙一色裁。芙蓉向臉兩邊開。亂入池中看不見。聞歌始覺有人來。

採薪女

唐白居易

亂蓬爲鬢布爲巾。曉踏寒山自負薪。一種錢塘江上女。著紅騎馬是何人。

東鄰美人

唐宋濟

花暖江城斜日陰。鶯啼曉戶曉雲深。春風不道珠簾隔。傳得歌聲與客心。

宮女

唐白居易

淚濕羅中夢不成。夜深前殿按歌聲。紅顏未老恩先斷。斜倚熏籠坐到明。

又

唐朱慶餘

寂寂花時閉院門。美人相立立瓊軒。含情欲說宮中事。鸚鵡前頭不敢言。

閨婦

斜凭綃牀愁不動。紅綃帶緩綠鬟低。遼陽春盡無消息。夜合花開日又西。

繡婦

不洗殘粧坐繡牀。却嫌鸚鵡繡鴛鴦。迴針繡到雙飛處。憶惜征夫淚數行。

唐闕名

王家少婦

十五嫁王昌。盈盈入畫堂。自矜年最少。復倚壻為郎。舞愛前溪好。歌憐子夜長。閒來聞百草。度日不成粧。

唐崔顥

夜觀妓

畫堂觀妙妓。長夜正留賓。燭吐蓮花艷。粧成桃李春。髻鬟低舞席。衫袖掩歌唇。汗濕偏宜粉。羅輕詎著身。調移箏柱促。歡會酒杯傾。倘使曹王見。應嫌洛浦神。

唐孟浩然

五日觀妓

西施謾道浣春紗。碧玉今時鬪麗華。眉黛奪將萱草色。紅裙妬殺石榴花。新歌一曲令人艷。醉舞雙眸斂鬢斜。誰道五絲能續命。却令今日死君家。

唐萬楚

贈妓

唐孫綰

綠翠鮮衣紅玉膚。輕盈年在破瓜初。霞杯醉喚劉郎賭。雲髻慵邀阿母梳。不怕寒侵緣帶寶。每憂風舉倩持裾。設圖西子爲粧樣。西子原來未得如。

席上贈妓

唐韓偓

矜嚴標格絕嫌猜。嗔怒難逢笑靨開。小雁斜侵眉柳去。嬌霞橫接眼波來。鬢垂香頸雲遮藕。粉著蘭胸雪壓梅。莫道風流無宋玉。好將心力事粧臺。

贈歌妓

唐崔仲容

水剪雙眸霧剪衣。當筵一曲媚春暉。瀟湘夜色怨猶旺。巫峽曉雲愁不稀。皓齒昨分寒玉細。黛眉輕蹙遠山微。渭城朝雨休重唱。滿眼陽關客未歸。

別妓

明鄒佐卿

立馬江皋問暮潮。片帆西去路迢迢。人將碧草新晴去。魂對青山夜雨消。雲色自依桃葉渡。月明悵斷鳳凰簫。樓頭濁酒春堪醉。還訪秦淮舊板橋。

老妓

明范昌期

教坊脂粉洗鉛華。一片閒心對落花。舊曲聽來猶有恨。故園歸去却無家。雲鬟半髻臨青鏡。雨淚頻彈濕絳紗。安得江州白司馬。尊前重與訴琵琶。

王郎中席上歌妓

唐顧况

袖拂青樓花滿衣。能歌宛轉世應稀。空中幾處聞清響。欲繞行雲不遣飛。

送妓人出家

唐楊郾伯

盡出花鈿與四鄰。雲鬟剪落壓殘春。暫驚風燭難留世。便是蓮花不染身。貝葉欲翻迷錦字。梵聲初學悞梁塵。從今艷色歸空後。湘浦應無解佩人。

美人繡幃

唐胡令能

日暮堂前花蕊嬌。手拈小筆上牀描。繡成安向東園裏。引得黃鸝下柳條。

美人刺繡

明楊基

風送楊花滿繡牀。飛來紫燕亦成雙。閒情正在停針處。笑嚼殘絨唾碧窗。

美人雙陸

宋蘇軾

香銷寶鴨月如霜。欲罷檣蒲故拙行。倦起局邊佯數子。暗搔星眼擲兒郎。

美人垂釣

明吳寬

携伴柳陰過。投竿傍淺莎。沉容魚避影。流盼水增波。玉餌含香細。金鈎引緒多。宛憐淇水上。衛女怨如何。

美人騎馬

唐盧綸

駿馬嬌仍穩。春風灞岸晴。促來金蹀躞。扶上玉人輕。帽束雲鬟亂。鞭籠翠袖明。不知從此去。何處更傾城。

美人插花

明桃花女子

梳成鬆髻出簾遲。折得桃花三兩枝。欲插上頭還住手。偏從人問可相宜。

美人對月

明唐寅

斜髻嬌娥夜卧遲。梨花風靜鳥棲枝。難將心事和人說。說與青天明月知。

美人燒香

明錢福

窄窄金蓮款款抬。為酬天竺願香來。眸凝綠水波微動。掌合白蓮花未開。暖細謾搖春日柳。臉勻初試雪天梅。不知暗祝因何事。斜拔金釵撥冷灰。

佳人忍笑

唐韓偓

宮樣梳頭淺畫眉。晚來粧飾更相宜。水精鸚鵡釵頭顫。舉袂佯羞忍笑時。

佳人半睡

曉眠仍嫌瘦。更衣又怕寒。宵分未歸帳。半睡待郎看。

內人晝眠

梁簡文帝

北窗聊就枕。南簷日未斜。攀鈎落綺障。插捩舉琵琶。夢笑開嬌靨。雲鬟壓落花。簾紋生玉腕。香汗浸紅紗。夫婿恆相伴。莫悞是倡家。

美人卧

唐梁銍

妾家巫峽陽。羅帳寢銀牀。曉日臨窗久。春風引夢長。落釵猶掛鬢。微汗欲消黃。縱使朦朧覺。魂猶逐楚王。

又

明王 偁

象牙瑤簾碧紗籠。綽約佳人睡正濃。半抹曉烟籠芍藥。一泓秋水浸芙蓉。神遊蓬島三千界。夢繞巫山十二峰。誰把棋聲驚覺後。起來香汗濕酥胸。

美人蚤起

明鄒迪光

玉蟬滴盡曉氤氳。翠簾纔捲帶宿醺。扶枕不曾呼婢女。畫眉先自倩夫君。立沾羅襪花間露。薄染香奩鏡裏雲。怪是未明雙鵲噪。於人何事報殷勤。

行

明張 綬

紈扇輕裾到處宜。暖風搖曳細腰肢。相逢詩陌回眸處。瞥見雕欄轉角時。零亂瓊環來冉冉。飄搖羅帶去遲遲。黃昏未識凌波趣。枉著金蓮步步隨。

浴

唐韓 偓

再整魚犀攏翠簪。解衣先覺冷森森。教移蘭燭頻羞影。自試香湯更怕深。初似洗花難抑按。終。愛沃雪不勝任。豈知侍女簾幃外。賸取君王幾餅金。

初日看婚

唐楊師已

洛陽花燭動。威里盡新娥。隱扇羞應慣。含情愁已多。輕啼溼紅粉。微睇轉橫波。更笑巫山曲。空傳雲雨過。

新婚曉

明湯傳楹

日影和烟上畫梁。雙鬟俏立整羅裳。傳來絮語欺鸚鵡。睡足脂痕暈海棠。扣領含羞留待客。褰帷匿笑不藏粧。守宮的的爭金甌。未許人前理繡牀。

新婚夕

最憐粧卸背銀缸。斜溜嬌波印玉郎。臂藕未曾輪作枕。唾花先已蘊生香。閒從繡幕窺來去。慢倚熏籠話短長。怪底侍兒簾外聽。故將羅襪蹴鴛鴦。

新嫁孃

唐王建

三日入廚下。洗手作羹湯。未語姑食性。先遣小姑嘗。

新粧

唐楊容華

宿鳥驚眠罷。房櫳乘曉開。鳳釵金作鏤。鸞鏡玉爲臺。粧似臨池出。人疑月下來。自憐終不見。欲去復徘徊。

新上頭

唐韓偓

學梳鬆鬢試新粧。消息佳期在此春。爲要好多心轉惡。遍將宜稱問傍人。

花燭詞

明陸卿子

日照粧樓夜不眠。學梳雲髻尚疑偏。細看鏡裏徘徊影。重拂鴉黃貼翠鈿。

又

畫樞雕闥綴綺疏。蘭房初試繡裙裾。重開芍藥帷前鏡。照見新粧列樣梳。

又

華燭含暉照洞房。蕭歌聲裏識蕭郎。繁音艷節教春住。看取蛾眉畫更長。

雲鬢

明王雱

雲鬢三尺縮芙蓉。翠簪巫山雨後峰。斜倚玉牀春色去。鴉翎蟬翼半蓬鬆。

欲曉看粧面

唐吳融

朦朧欲曙色。隱隱辨殘粧。日始雲中出。花猶霧裏藏。眉邊全失翠。額畔半留黃。轉入金屏影。佯侵角枕光。有蟬墮鬢樣。無燕著釵行。十二峯前夢。如何不斷腸。

耳

附張勣

金環從小鬢圓門。冰雪聰明慧性存。有樣半輪分月魄。無瑕雙璧種芳根。關心側向瑤琴細。掠鬢斜臨玉鏡溫。最是惜花通款語。羞紅微上欲消魂。

肩

小立依依比陸郎。遠峰削就覺衫長。鬟垂舞不捎烏鵲。釵溜眠還壓鳳凰。醉後雙頰寒起粟。別時一拍手分香。折花那怕王昌見。艷影今年未及牆。

乳

融酥年紀好韶華。春盡雙拳玉有芽。畫檻橫依平半截。檀槽側抱一邊遮。香浮欲軟初含露。粉滴才圓未破瓜。夾捧芳心應內熱。莫教清楚著單紗。

臂

半捲鮫綃露未全。側拈菱鏡勢應偏。橫添枕上香拋玉。屈倚牕邊藕放蓮。金釧光籠粧閣曉。丹砂密護守宮年。柔情只許仙郎惜。嚙後鑷紗印宛然。

手

唐韓偓

暖日膚紅玉筍芽。調琴抽線露尖斜。背人細撚垂烟鬢。向鏡輕勻襯臉霞。悵望夕逢褰繡幔。依稀曾見托金車。後園笑向同行道。摘得薜蘿又一了。

又

明錢福

笑折櫻桃力不禁。時攀楊柳弄清陰。管絃曲裏傳聲慢。星月樓前斂拜深。繡幃倚回雙舞袖。綠窗閒整小眉心。秋來幾度挑羅襪。爲憶相思却放針。

紅指甲

明瞿佑

金盤和露搗仙葩。解使纖纖玉有瑕。一點愁凝鸚鵡喙。十分春上牡丹芽。嬌彈粉淚拋紅豆。戲掐花枝鏤綠霞。女伴相逢頻借問。幾回錯認守宮砂。

洗足

明錢福

濯罷蘭湯雪欲飄。橫擔膝上求鯨鮪。匣來玉筍纖纖嫩。放下金蓮步步嬌。蹴罷香風飛彩燕。踏殘明月聽瓊簫。幾回宿向鴛衾下。勾醒郎官去早朝。

小尼師

唐王建

新剃青頭髮。生來未掃眉。身輕禮拜穩。心慢記經遲。喚起猶侵曉。催齋已過時。春晴墻下立。私地弄花枝。

還俗尼

唐吳融

柳眉梅額倩粧新。笑脫袈裟得舊身。三峽重爲行雨客。九天曾作散花人。空門付與悠悠夢。寶帳迎回黯黯春。寄語江南徐老克。一生長短托清塵。

文部

經

唐李嶠

漢室鴻儒盛。魯堂大義明。五千道德闢。三百禮儀成。青紫方拾芥。黃金徒滿籝。誰知懷逸辯。重席冠羣英。

史

唐李商隱

歷覽前賢國與家。成由勤儉敗由奢。何須琥珀方爲枕。豈得珍珠始是車。運去不逢青海馬。力窮難拔蜀山蛇。幾人曾預南薰曲。終古蒼梧哭翠華。

又

元劉因

記錄紛紛已失真。語言輕重在詞臣。若將事事求心跡。恐有無邊受屈人。

詩

唐盧延遜

莫話詩中事。詩中難更無。吟安一個字。撚斷數莖鬚。險鬼天應問。狂搜海亦枯。不同文賦易。爲著者之乎。

又

唐僧貫休

經天緯地物。動必計天才。盡日覓不得。有時還自來。真風含素髮。秋色入靈臺。吟向霜澹下。終

須神鬼哀。

論詩

金元好問

暈碧裁紅點綴勻。一回拈出一回新。鴛鴦繡就從君看。莫把金針度與人。

覽楊枝書文卷

唐章孝標

跪伸霜素剖琅玕。身墮瑤池曉暗寒。紅錦晚開雲母殿。白珠秋瀉水晶盤。情高鶴立崑崙峭。思壯鯨跳渤海寬。誰有軒轅古銅片。為持相並照妖看。

飛白雲書

唐岑文本

六文開玉篆。八體曜銀書。飛毫列錦繡。拂素起龍魚。鳳舉崩雲絕。鸞驚遊霧疎。別有臨池草。思沾垂露餘。

禁直觀御書

明唐敏

天門旭日炫新晴。鳳髓龍香硯墨清。親見君王書草字。蛟龍吹雨雜風聲。

內狀

唐元稹

天門晴開玉瑋鉤。畫送中樞曉禁清。彤管內人書細膩。金奩玉印篆分明。銜銜不避將軍令。跋
殺兼題冢宰名。南省郎官誰待詔。與君將作世間行。

紙

唐李嶠

妙跡蔡侯施。芳名左伯馳。雲飛錦綺落。花發縹紅披。舒卷隨幽顯。康方合軌儀。莫驚反覆字。當
取葛洪規。

尚書新造花箋

唐徐寅

濃染紅桃二月花。只看神筆縱龍蛇。淺澄秋水看雲母。擊碎輕苔間粉霞。寫賦好追陳后寵。題
詩堪送竇滔家。使君即入金臺殿。夜直無非草白麻。

酬惠箋紙

唐楊巨源

百張雲樣亂花開。七字文頭艷錦回。浮碧真從天上得。殷紅應是日邊來。捧持價重凌蕉葉。封
裹香深笑海苔。滿篋清光應照眼。欲題風韻愧凡才。

謝靜遠惠紙

元顧瑛

蜀郡金花新著樣。剡溪玉版舊齊名。荷君寄我影川雪。猶帶遶漪瀉月聲。

謝吳宗師惠墨

元虞集

念我衰年不廢書。錦囊古墨送幽居。明窗塵影丹同熟。元圃雲英玉不如。敢謂文章勝虎豹。祇應箋注到蟲魚。研磨不盡人間老。傳與兒孫尚有餘。

筆

唐李嶠

握管門庭側。含毫山水隈。霜輝簡上發。藻彩夢中開。鸚鵡摛文至。麒麟絕句來。何當遇良史。左右振奇才。

又

唐徐寅

君子三端擅一名。秋毫雖細握非輕。軍書羽檄教誰錄。帝命王言待我成。勢健豈饒泥水陣。鋒鋷還學歷山耕。毛乾時有何人潤。盡把焚燒恨始平。

宣州筆

唐耿漳

寒竹漸虛受。纖毫任幾重。影端能守直。心勁懶藏鋒。落紙驚風起。搖空滴露濃。丹青與白事。金

此復何從。

鼠鬚筆

元謝宗可

夜逐虛星上月宮。奮髯奪得管城公。囊中不覺吟窗夢。指下先爭翰墨功。莫笑硯池濡醉墨。絕勝倉廩飽陳紅。平生啗盡詩書字。散作龍蛇落紙中。

遠山筆架

元劉因

何物能支筆萬鈎。峯頭依約遠山痕。燈橫烟影雲猶見。秋入霜毫勢欲吞。掌上三峰看太華。人間一髮是中原。中書未免從高閣。不向林泉怨少恩。

水晶筆架

明瞿佑

三峰近列硯池頭。光照文房爛不收。冰壑夜寒龍獨卧。雪山春暖兔羣遊。彩毫倚閣功應就。銀管依棲價未酬。別有珊瑚新琢樣。策勳畢竟是誰優。

硯

金李俊民

端溪溫潤石。價重百車渠。一滴元潭水。蛇頭萬卷書。

古石硯

唐李山甫

追琢他山石。方圓一勺深。抱才惟守墨。求用每虛心。波浪因文起。塵埃爲廢侵。憑君更研究。何啻值千金。

謝惠紫石硯

唐陸龜蒙

霞骨堅來玉自愁。琢成飛燕古釵頭。澄沙脆弱聞應伏。青鐵沉埋見亦羞。最稱風亭批碧簡。好將雲竇浸寒流。君能把贈閒吟客。編寫江南物象酬。

尚書命題瓦硯

唐徐寅

遠向端溪得。皆因郢匠成。鑿山青霽斷。琢石紫花輕。散墨松香起。濡毫藻句清。入臺知價重。著匣恐生塵。守黑還全器。臨池草著名。春闈携就試。軍機載將行。不獨碑文降。兼能助筆耕。莫嫌涓滴潤。深染古今情。洗處無瑕玷。添時識滿盈。蘭亭如見用。敲爇有金聲。

硯池

明瞿佑

活水源頭一脉清。文林藝圃藉滋榮。旗搖彩影龍蛇動。筆奪元機風雨驚。螢火不愁乾欲死。蠶

魚今喜放長生。遙思紫石潭中事。靈怪紛紛開幾更。

詩歌

元謝宗可

雨蔓霜條老翠壺。吟邊不是酒胡蘆。剖開架上輪囷玉。著盡胸中錯落珠。滿貯苦心留宇宙。深藏清氣付江湖。誰家半腹能千首。為問山人果在無。

武部

弓

唐李嶠

桃文稱辟惡。桑質表初生。宛轉雕鞬際。依稀半月明。遙彎落雁影。虛引怯猿聲。徒切烏號思。攀龍遂不成。

又

唐楊師道

霜重辭膠勁。風高月影圓。鳥飛隨帝輦。雁落逐鳴絃。

箭

唐李嶠

漢甸初收羽。燕城忽解圍。影隨流水急。光帶落星飛。夏列三成範。堯沉九日輝。斷蛟雲夢澤。希為識志歸。

弩

挺質本軒黃。申威振遠方。機張驚雉雉。玉彩輝星芒。高鳥行應盡。清猿坐見傷。蘇秦六百步。持此說韓王。

彈

俠客持蘇合。佳遊滿帝鄉。避丸深可謂。求炙遂難忘。金迸疑星落。珠成似有光。誰知少孺子。將此見吳王。

刀

列辟鳴騶至。惟良佩犢旋。帶環疑照月。引鑑似函泉。入夢華梁上。含鋒彩筆前。莫驚開百鍊。特擬定三邊。

劍

我有昆吾劍。求趨天子庭。白虹時切玉。紫氣夜干星。鏑上芙蓉動。匣中霜雪明。倚天持報國。畫地取雄名。

和周侍御買劍

唐曹唐

將軍溢價買吳鉤。要與中原斬寇讎。試掛窗前驚電轉。略拋牀下怕泉流。青天露拔雲霓泣。黑地潛擎鬼魅愁。見說夜深星斗畔。等閒期剋月支頭。

觀淬龍泉劍

唐裴夷

歐冶將成器。風胡喜見逢。發硎恩切玉。投水化為龍。不復藏深匣。終期用剌鐘。蓮花主寶鏑。秋日厲霜鋒。鍊質鑄三尺。吹毛過百重。礪磨如不倦。提握敢辭從。

贈劍客

唐賈島

千年磨一劍。霜刃未嘗試。今日把示君。誰有不平事。

戈

唐李嶠

富父桴喉日。殷辛漂杵年。曉霜含白刃。落景駐雕鉞。夕攢金門側。朝提玉塞前。願隨龍影度。橫

闕陣雲邊。

矛

畫幹似蛇長。誰論半段槍。日斜親闔罷。高宴卓沙場。

明高啓

旌

告善康莊側。求賢市肆中。擁麾分彩雉。持節曳丹虹。影麗天山雪。光搖朔塞風。方知美周政。抗節賦車攻。

唐李嶠

旗

桂影承宵月。虹輝接曙雲。縱橫齊入陣。舒卷引三軍。日薄蛟龍影。風翻烏鵲文。誰知懷勇志。蟄地幾繽紛。

夕烽

唐杜甫

夕烽來不近。每日報平安。塞上傳光小。雲邊落點殘。照秦通警急。過龍自艱難。聞道蓬萊殿。千官立馬看。

宿溫城望軍營

唐駱賓王

虜地寒膠折。邊城夜柝聞。兵符關帝閣。天策動將軍。塞靜胡笳切。沙明楚錄分。風旗翻異影。霜劍轉龍文。白羽搖如月。青山斷若雲。烟疎宜捲幔。塵滅似銷氛。投筆懷班業。臨戎想召勳。還應雪漠貶。持此報明君。

蘄州行營作

唐戴叔倫

蘄水西城向北看。桃花落盡李花殘。朱旗半捲山川小。白馬連嘶草樹寒。

從軍行

唐楊炯

烽火照西京。心中自不平。牙璋辭鳳閣。鐵騎繞龍城。雪暗凋旗畫。風多雜鼓聲。寧為百夫長。勝作一書生。

又

唐王昌齡

青海長雲暗雪山。孤城遙望玉門關。黃沙百戰穿金甲。不破樓蘭終不還。

又

琵琶起舞換新聲。總是關山離別情。撥亂邊愁聽不盡。高高秋月照長城。

封大夫破播仙凱歌

唐岑參

日落轅門鼓角鳴。千人面縛出蕃城。洗兵魚海雲迎陸。秣馬龍堆月照營。

觀獵

唐王維

風勁角弓鳴。將軍獵渭城。草枯鷹眼疾。雪盡馬蹄輕。忽過新豐市。遠歸細柳營。迴看射雕處。千里暮雲平。

又

唐韋莊

苑牆東畔欲斜暉。傍苑穿花兔正肥。公子喜逢朝罷日。將軍誇換戰時衣。鶻翻錦翅雲中落。犬帶金鈴草上飛。直待四郊高鳥盡。掉鞍齊向國門歸。

觀浙西府相畋獵

千里旌旗十萬兵。等閒遊獵出軍城。紫袍日照金鵝闥。紅旆風吹畫虎牕。帶箭彩禽雲外落。避雕寒兔月中驚。歸來一路笙歌滿。更有仙娥載酒迎。

射鵬騎

唐馬戴

蕃面將軍著鼠裘。酣歌衝雪在邊州。獵過黑山猶走馬。寒鵬射落不回頭。

射柳

元張宏範

年少將軍耀武威。人如輕燕馬如飛。黃金箭落星三點。白玉弓開月一圍。簫鼓聲中驚霹靂。綺羅筵上動光輝。回頭笑殺無功子。羞對薰風脫錦衣。

咏物詩選卷五

魏塘俞 琰長仁輯

樂部

歌

唐李 嶠

漢帝臨汾水。周郎去洛濱。鄆中吟白雪。梁上繞飛塵。響過行雲住。聲隨子夜新。願君聽扣角。當自識賢臣。

又

唐王貞白

誰唱關西曲。寂寞夜景深。一聲長在耳。萬恨重經心。調古清風起。曲終涼月沉。却應筵上客。未必是知音。

和人聽歌

唐崔 珣

紅臉初分翠黛愁。錦筵歌板拍清秋。一樓春雪和塵落。午夜清泉帶雨流。座上美人心盡死。尊

前旅客淚難收。莫辭更送劉郎酒。百斛明珠異日酬。

舞

唐李嶠

妙妓遊金谷。佳人滿石城。霞衣席上轉。花袖雪前明。儀鳳諧清曲。回鶻應雅聲。非君一顧重。誰賞素腰輕。

又

隋楊炯

紅顏自燕趙。妙妓邁陽阿。就行齊逐唱。赴節暗相和。折腰送餘曲。斂袖待新歌。頻容生翠羽。曼睂出橫波。雖稱趙飛燕。比此詎成多。

應令咏舞

隋王訓

新粧本絕世。妙舞亦如仙。傾腰逐韻管。斂袖聽張絃。袖輕風易入。斂重步難前。笑態千金重。香十里傳。將持比飛燕。定當誰可憐。

周員外席上觀柘枝

唐張祐

畫鼓拖環錦臂攘。小娥雙換舞衣裳。金絲蹙霧紅衫薄。銀蔓垂花紫帶長。鶯影乍迴頭並舉。鳳

聲初歇。起齊張。一時歎腕招殘拍。斜欹輕身拜玉郎。

數陪李梓州泛江有女樂在諸舫戲為艷曲二首贈李 唐杜甫

上客迴空騎。佳人滿近船。江清歌扇底。野曠舞衣前。玉袖臨風竝。金壺隱浪偏。競將明媚色。偷眼艷陽天。

又

白日移歌袖。青霄近笛牀。翠眉縈度曲。雲鬢儼成行。立馬千山暮。迴舟一水香。使君自有婦。莫學野鴛鴦。

與牛家妓樂雨夜合宴

唐白居易

玉管清絃聲旖旎。翠釵紅袖坐參差。兩家合奏洞房夜。八月連陰秋雨時。歌臉有情凝睇久。舞腰無力轉裙遲。人間歡樂無過此。上界西方即不知。

鐘

唐李嶠

既接南鄰磬。還隨北里笙。平陵通曙響。長樂徹宵聲。秋至含霜動。春歸應律鳴。欲知長待扣。金

簾有餘清。

遠寺鐘

唐李嘉祐

疎鐘何處來。度竹兼拂水。漸逐微風聲。依依猶在耳。

鼓

唐李嶠

舜日諧鼓響。堯年頌土聲。向樓疑吹擊。震谷似雷驚。仙鶴排門起。靈鼙帶水鳴。樂云行已奏。禮曰冀相成。

琴

唐潘緯

客來鳴素琴。惆悵對遺音。一曲起於古。幾人聽到今。晝寒風靄遠。夜泛月煙深。夙續水仙操。坐生方外心。

又

唐孫氏

玉指朱絃軋復清。湘妃愁怨最難聽。初疑颯颯涼風動。又似蕭蕭暮雨零。近若流泉來碧嶂。遠如元鶴下青冥。夜深彈罷堪惆悵。露濕棠蘭月滿庭。

聽趙秀才彈琴

唐韋莊

滿匣冰泉咽又鳴。玉音閒淡入神清。巫山夜雨絃中起。湘水晴波指下生。蜂簇野花吟細韻。蟬移高柳迸殘聲。不須更奏幽蘭曲。卓氏門前月正明。

夢遊洛中聞琴

宋蔡襄

修竹蕭蕭曲檻前。清泉瀺瀺小池邊。琴中一弄履霜操。人靜當庭月正圓。

風琴

唐僧貫休

至竟心爲造化功。一枝青竹四絃風。寥寥雙耳更深後。如在縑山明月中。

聽胡琴

唐劉長卿

女姬留此曲。千載一知音。不解胡人語。空愁楚客心。聲隨邊草動。意入隴雲深。何事長江上。還聞出塞吟。

瑤琴

唐溫庭筠

冰簟銀牀夢不成。碧天如水夜雲輕。鴈聲遠過瀟湘去。十二樓中月自明。

錦瑟

唐李商隱

錦瑟無端五十絃。一絃一柱思華年。莊生曉夢迷蝴蝶。望帝春心托杜鵑。滄海月明珠有淚。藍田日暖玉生煙。此情可待成追憶。只是當時已惘然。

湘靈鼓瑟

唐錢起

善鼓雲和瑟。常聞帝子靈。馮夷空自舞。楚客不敢聽。逸韻諧金石。清音發杳冥。蒼梧來怨慕。白芷動芳馨。流水經湘浦。悲風過洞庭。曲終人不見。江上數峯青。

箏

唐李嶠

豫州芳宴設。游楚妙彈開。新曲帳中發。清音指下來。鈿裝模六律。柱列配三才。莫聽西秦奏。箏箏有剩哀。

觀撈箏

唐王灣

虛室有秦箏。箏新月復清。絃多弄委曲。柱促語分明。曉怨凝繁手。春嬌入曼聲。近來惟此曲。傳得美人情。

聞鄰家理箏

唐徐安貞

北斗橫天夜欲闌。愁人倚月思無端。忽聞畫閣秦箏遠。知是鄰家趙女彈。曲成虛憶青蛾斂。調急遙憐玉指寒。銀鎖重關聽未關。不如眠去夢中看。

夜箏

唐白居易

紫袖紅絃明月中。目彈自感暗低容。絃凝指咽聲停處。別有深情一萬重。

琵琶

唐太宗

半月無雙影。金花有四時。摧藏千里態。掩抑幾重悲。促節榮紅袖。清音滿翠帷。駛彈風響急。緩曲劍聲遲。空餘闌隴恨。因此代相思。

又

明常倫

紅袖揮金撥。朱顏倚玉肩。團圓懷夜月。幽咽瀉春泉。白雪調終晏。青雲過遠天。悠悠時斷續。引興似當年。

又

唐白居易

絃清撥刺語鈴鈴。背却殘燈就月明。賴是心無惆悵事。不然爭奈子絃聲。

夜聽琵琶

明石 沆

娉婷少婦未關愁。清夜琵琶上小樓。翠帟一聲江月白。碧雲飛起四山秋。

聽彈箜篌

唐裴 說

箜篌二十五絲絃。漢武當年應節宣。今夜月明雙指下。雲天朱字遇神仙。

笙

唐羅 鄴

筠管參差排鳳翅。月堂淒切勝龍吟。最宜輕動纖纖玉。醉送當觀澠澠金。縱嶺獨能微妙曲。歲臺相竝吹清音。好將宮徵陪歌扇。莫違新聲鄭衛侵。

銀河吹笙

唐李商隱

悵望銀河吹玉笙。樓寒院冷接平明。重衾幽夢他年斷。別樹羈雌昨夜驚。月榭故香因雨發。風簾殘燭隔霜清。不須浪作縱山意。湘瑟秦簫自有情。

聽鄰家吹笙

唐郎士元

鳳吹聲如隔彩霞。不知牆外是誰家。重門深鎖無尋處。惟有碧桃千萬花。

聞吹簫

明施漸

半夜聞簫莫問誰。急將幽意向人吹。秋風不與閒心會。祇有窻前明月知。

吹笛

唐杜甫

吹笛秋山風月清。誰家巧作斷腸聲。風飄律呂相和切。月傍關山幾處明。胡騎中宵堪北走。武陵一曲想南征。故園楊柳今搖落。何處愁中却盡生。

宿巴陵聞笛

明王偁

玉笛飄殘月下聲。空江秋日思冥冥。怪來楊柳移關塞。可是梅花落洞庭。半夜旅情隨調切。誰家少婦倚樓聽。曉來更覓龍吟處。一點君山水面青。

春夜洛城聞笛

唐李白

誰家玉笛暗飛聲。散入春風滿洛城。此夜曲中聞折柳。何人不起故園情。

秋夜聞笛

元薩都刺

何人吹笛秋風外。北固山前月色寒。亦有江南未歸客。徘徊終夜倚闌杆。

胡笛曲

唐王昌齡

城南虜已合。一夜幾重圍。自有金鉤引。能沽出塞衣。聽臨關月苦。清入海風微。三奏高樓曉。征人掩淚歸。

邊上胡笳

唐杜牧

何處吹笳薄暮天。塞垣高鳥沒狼煙。遊人一聽堪頭白。蘇武爭禁十九年。

聽曉角

唐李益

邊霜昨夜墜關榆。吹角當城片月孤。無限塞鴻飛不度。秋風吹入小單于。

晚泊潤州聞角

唐李涉

孤城吹角水茫茫。曲引邊聲旅思長。驚起暮天沙上雁。海門斜去兩三行。

江宿聞蘆管

唐鄭谷

塞曲悽清楚水濱。聲聲吹入落梅春。須知風月千樁下。亦有胡蘆河畔人。

木魚

明瞿佑

長廊懸掛發鯨音。鱗甲光芒欲信尋。跳躍幸離生死海。虛空已斷去來心。閤黎誅密鍾常早。長者思多水共深。龍象有靈能拱護。不隨波浪去浮沉。

拍板

唐朱灣

赴節心常在。從繩道可觀。須知片木用。莫向散材看。空為歌偏苦。仍愁和即難。既能親掌握。願得接同歡。

方響

唐杜牧

數條秋水掛琅玕。玉手丁當怕夜寒。曲盡連敲三四下。恐驚珠淚落金盤。

聞方響

元王惲

丁冬鏗戔碎瑤琳。掩盡朱絃竊渺音。花外粉牆遮不斷。珮環清徹洞房深。

風箏

唐司空曙

高風火玉柱。萬籟忽齊飄。颯樹遲難度。縈空細漸消。松泉鹿門夜。笙鶴洛濱朝。坐與真僧聽。支

頭向寂寥。

又

唐高駢

夜靜絃聲響碧空。宮商信任往來風。依稀似曲才堪聽。又被風吹別調中。

檐馬

明瞿佑

鍊鐵能成八駿形。渾身堅甲四蹄輕。向空騰踏風塵動。逐隊回旋劍戟鳴。澗閣香消驚曉夢。畫月堂轉起秋聲。玉關路阻金河遠。牽付將軍致太平。

樂部附錄

宿瑩公禪房聞梵

唐李頎

花宮仙梵遠微微。月隱高城鐘漏稀。夜動霜林驚落葉。曉聞天籟發清機。蕭條已入寒空靜。颯沓仍隨秋雨飛。始覺浮生無住著。頓令心地欲皈依。

秋夜北山精舍觀體如師梵

唐劉長卿

焚香素仙唄。向夕遍空山。清切兼秋遠。威儀對月閒。靜分嚴響答。散入海潮還。幸得風吹去。隨人到世間。

府試中元節觀道流步虛

唐殷堯奉

元都開秘籙。白石禮先生。上界秋光淨。中元夜景清。星辰朝帝列。鸞鶴步虛聲。玉洞花長發。珠宮月最明。掃壇天地肅。授簡鬼神驚。倘賜刀圭藥。還成不死名。

巧藝部

題王右丞山水障子

唐張祐

精華在筆端。咫尺匠心難。日月中堂見。江湖滿座看。夜凝嵐氣溼。秋浸壁光寒。料得昔人惡。平生詩思殘。

又

右丞今已沒。遺畫世間稀。咫尺江湖近。尋常禽鳥飛。山光全在掌。雲氣欲生衣。以此常為玩。平

生滄海機。

題千里山水長幅

元鄧文原

蒼山高處白雲浮。樓閣參差帶遠洲。千尺虬龍依絕壁。一聲鸛鶴唳清秋。山翁有約憑雙屐。野客無心遡碧洲。自是霜林好風景。居然尺五見丹邱。

題可老所藏徐明叔畫卷

宋朱子

羣峯相接連。斷處秋雲起。雲起山更深。咫尺看千里。

題畫

明劉球

水抱孤村遠。山通一徑斜。不知深樹裏。還住幾人家。

千里江山圖

金李俊民

筆下江山取次成。一峯未盡一峯生。憑誰試向人間問。水郭烟村第幾程。

題山水卷

元錢選

胸中得酒出孱顏。水葉森森歲暮殘。落墨不隨風氣暝。幾重山色幾重瀾。

嚴公廳宴共咏蜀道畫圖

唐杜甫

日臨公館靜。畫列地圖雄。劍閣星橋北。松州雪嶺東。華夷山不斷。吳蜀水相通。興與烟霞會。清樽幸不空。

襄陽圖

唐徐安貞

畫得襄陽郡。依然見昔遊。岷山思駐馬。漢水憶回舟。丹壑常含霽。青松不換秋。畫圖空咫尺。千里意悠悠。

金陵圖

唐韋莊

誰謂傷心畫不成。畫人心逐世人情。君看六幅南朝事。老木寒雲滿故城。

片雲圖

唐岑參

雲片何人畫。塵侵粉色微。未曾行雨去。不見逐風歸。只怪偏凝壁。回看欲惹衣。丹青忽借便。移向帝鄉飛。

水墨松石

唐方干

三世精能舉世無。筆端狼籍見工夫。添來勢逸陰崖黑。澄處痕輕灌木枯。垂地寒雲吞大漠。過江春雨入全吳。蘭堂坐久心彌惡。不是山川是畫圖。

畫松

唐僧景雲

畫松一似真松樹。且待尋思記得無。曾在天台山上見。石橋南畔第三株。

題喬夫人墨竹

金元好問

萬葉千梢下筆難。一枝新綠儘高寒。不知霧閣雲窗晚。幾就扶疎月影看。

題畫蘭

明文徵明

手培蘭蕊兩三栽。日暖風和次第開。坐久不知香在室。推窗時有蝶飛來。

扇上畫牡丹

唐羅隱

為愛紅芳滿砌增。教人扇上畫將來。葉隨綠筆參差長。花逐輕風次第開。閒掛綫曾停蝶。頻搖不怕落莓苔。根生無地如仙桂。疑是嫦娥月裏栽。

題扇面荷花

明曹鼎

玉井芙蓉紅粉腮。何人移向月中裁。高軒忽漫看圖畫。疑是昭陽鏡裏開。

寫真

唐僧淡交

圖形期自見。自見却傷神。已是夢中夢。更逢身外身。冰花凝幻質。墨彩染空塵。堪笑余蕭索。俱為末了人。

題唐六如紅拂妓

明文徵明

六如居士春風筆。寫得蛾眉妙有神。展卷不禁雙淚落。斷腸原不為佳人。

門神

附張劭

功名一紙笑空虛。也比凌烟畫影初。每到殘年催致仕。却逢新曆當除書。衣冠溫賈光朱戶。靈爽難邀式敝廬。腹負將軍痴宰相。赫然相對立何如。

畫鶴

唐宋之間

粉壁畫仙鶴。昂藏真氣多。鸞飛竟不去。當是戀恩波。

西洋畫

附沈又彭

巍巍宮闕絕塵埃。萬戶千門迤邐開。堪望不堪身入玩。疑看蜃氣幻樓臺。

觀棋

唐釋子蘭

拂局盡捐時。能因長路遲。點頭初得計。格手待無疑。寂默觀遺景。凝神入過思。共藏多少意。不語兩相知。

觀奕

明吳寬

高樓殘雪照棋枰。坐覺窗間黑白明。袖手自甘終日飽。苦心誰惜兩雄爭。豪鷹欲擊形還匿。怒蟻初交陣已成。却笑面前歧路滿。蘇張何事學縱橫。

官莊池觀競渡

唐儲光義

落日吹簫管。清池發棹歌。船爭先後渡。岸激去來波。水葉藏魚鳥。林花間綺羅。踟躕仙女處。猶似望天河。

鞦韆

宋洪覺範

畫架雙栽翠絡偏。佳人春戲小樓前。飄揚血色裙拖地。斷送玉容人上天。花版潤沾紅杏雨。絲

繩斜掛綠楊烟。下來閒處從容立。疑是蟾宮請降仙。

又

明謝遷

日轉畫堂樹影偏。謝家庭院簇神仙。綠繩斜引纖纖筍。畫版輕乘步步蓮。弄玉未升雲漢上。綠珠先墜綺樓前。不知小徑殘紅裏。明日何人拾翠鈿。

蹴鞠

明錢福

蹴鞠當場二月天。仙風吹下兩嬋娟。汗霑粉面花含露。塵撲蛾眉柳帶烟。翠袖低垂籠玉筍。紅裙斜曳露金蓮。幾回蹴罷嬌無力。恨殺長安美少年。

踢毬

明馬如玉

腰支孌孌力微微。滾滾紅塵拂羽衣。偃月髻邊星獨墜。石榴裙底鳳雙飛。

傀儡吟

唐元宗

刻木牽絲作老翁。雞皮鶴髮與真同。須臾弄罷寂無事。遠似人生一夢中。

影戲

明瞿佑

燈火光中夜漏遲。風輪旋轉競奔馳。過來有跡人爭覩。散去無聲鬼不知。月地花堦頻出沒。雲窗霧閣暫追隨。一場變幻如春夢。綠索重看傀儡縋。

器用部

銅儀

元揭傒斯

法像坤儀重。來從汴水邊。飛龍纏四極。黃道界中天。望絕秋毫末。循環太古前。荒臺明月夜。歷歷映星躔。

寒漏

唐皇甫冉

清冬洛陽客。寒漏建章臺。出禁因風徹。褰窗共月來。偏將殘瀨雜。乍與遠鴻哀。遙夜重城警。流年滴水催。閒齋堪坐聽。況有故人杯。

尚書郎上直聞春漏

唐杜牧

地即尚書省。人惟鷄鶩行。審時傳玉漏。直夜遞星郎。歷歷聞仙署。冷冷出建章。自空來斷續。隨

月散淒。物靜知聲近。寒輕覺夜長。聽餘殘月落。曙色滿東方。

謝許鍊師惠圖書

明危進

茅山許史舊諸孫。還向仙童卧白雲。竹外畫沙迷鶴迹。花間引水泛鵝羣。蒼崖翠刻金書字。丹井銀牀玉篆文。蚪蚪早收東觀上。幾人相倚報清芬。

題印囊

唐皮日休

金篆方圓一寸餘。可憐銀艾未恩渠。不知夫子將心印。印破人間萬卷書。

車

唐李嶠

天子馭金根。蒲輪開四門。五神趨電至。雙轂似雷奔。丹鳳棲金輅。非熊載寶軒。無階忝虛左。珠乘奉王言。

和李秋谷平章小車詩

元虞集

雪晴宮草隱晴沙。相國朝天識帝車。班馬晝移溫室樹。鳴鑾晨度掖垣花。塞帷每命賢俱載。趨駕頻煩使至家。此日龍門誰執御。擁經正履侍金華。

舟

唐李嶠

征棹三江暮。連檣萬里迴。相鳥風際轉。畫鷁浪前開。羽客乘霞至。仙人弄月來。何當同轉說。持展巨川材。

採蓮舟

明瞿佑

依紅泛綠往來頻。載得盈盈一段春。荷葉叢深難問路。瓜皮樣小恰容身。撐歸別浦飄香袖。擢入回塘動白蘋。幾度風來聞笑語。隔花應有斷腸人。

放舟

唐杜甫

送客滄溪縣。山寒雨不開。直愁騎馬滑。故作泛舟回。青惜蜂蠻過。黃知橘柚來。江流翠自在。生穩興悠哉。

秋夜泛舟

唐劉方平

林塘夜泛舟。虫響荻飈飈。萬影皆因月。千聲各爲秋。歲華空復晚。鄉思不堪愁。西北浮雲外。伊川何處流。

秋夜船行

唐嚴維

扁舟時屬暝。月上有餘輝。海燕秋還去。漁人夜不歸。中流何寂寂。孤棹也依依。一點前村火。誰家未掩扉。

夜泛

明黎淳

四溟波浩浩。一葦向空渡。月近星斗寒。始識天上路。

夜船

唐韓偓

野雲低迷烟蒼蒼。平波揮目如凝霜。月明船上簾幙捲。露重岸頭花木香。村遠夜深無火燭。江寒坐久換衣裳。誠知不覺天將曙。幾簇青山雁一行。

小舫

唐白居易

小舫一艘新造了。輕裝梁柱庠安遙。深芳靜岸遊應遍。淺水低橋去盡通。黃柳影籠隨棹月。白蘋香起打頭風。慢牽欲傍櫻桃泊。借問誰家花最紅。

憶釣舟

唐吳融

青山小隱枕潺湲。一葉垂綸幾汭沿。後浦春風隨興去。南塘秋雨有時眠。慣銜曉霧驚羣雁。愛颺斜陽入亂烟。回首無人寄惆悵。九衢塵土困揚鞭。

帆

唐皇甫冉

一帆何處去。正在望中微。浦迥搖空色。汀迴映落暉。每爭高鳥度。能送遠人歸。偏似南浮客。悠揚無所依。

江帆

唐羅鄴

別離不獨恨蹄輪。渡日風帆發更頻。何處青樓方凭檻。半江斜日認歸人。

使風

唐韓偓

茶香睡覺心無事。一卷黃庭在手中。欹枕卷簾江萬里。舟人不語滿帆風。

賦秤送人

唐包何

願以金稱槌。因君贈別離。鈎懸新月吐。衡直衆星隨。掌握須平執。銖鎰必盡知。由來披分審。莫放弄權移。

中和節詔賜公卿玉尺

唐裴度

陽和行慶賜。尺度及羣工。寵荷乘佳節。傾心立大中。短長思合製。遠近貴攸同。共荷裁成德。將酬分寸功。作程施有用。垂範播無窮。願續延洪壽。千春奉聖躬。

畫屏

綺閣雲霞滿。芳林草樹新。鳥驚疑欲曙。花笑不關春。山對彈琴客。溪流垂釣人。請看車馬跡。行處有風塵。

寒林石屏風

唐僧無悶

草堂無物伴身閒。唯有屏風枕簟間。本向他山求得石。却于石上見他山。

帷

唐李嶠

久聞先生戶。高褰太守襦。羅將翡翠合。錦逐鳳凰舒。明月彈琴夜。清風入幌初。方知決勝策。黃石受兵書。

簾

清風時入燕。紫殿幾含秋。曖曖龍靈閣。纖纖上玉鈎。窗中翡翠動。戶外水晶浮。巧作盤龍勢。長迎飛燕遊。

又

唐萬 楚

玳瑁昔稱華。玲瓏薄綺紗。鈎銜門勢曲。節亂水紋斜。日弄長飛鳥。風搖不卷花。自當分內外。非是為嬌奢。

又

唐羅 隱

疊影重紋映畫堂。玉鈎銀燭共熒煌。會應曉得神仙在。休下真珠十二行。

琉璃簾

元馬祖常

吳儂巧製玉玲瓏。翡翠蝦蟆迥不同。萬縷橫陳銀色界。一塵不入水精宮。月華遠射離離白。澄影斜穿細細紅。相隔神仙才咫尺。靈犀一點若為通。

獲周豐鼎見博古圖第三卷銘六字

趙孟頫

豐鼎制特小。周人風故淳。摩挲玉質潤。拂拭翠光勻。鑄法觀來妙。銘文考更真。平生篤好古。對

此興彌新。

香鴨

唐徐寅

不假陶鎔妙。誰教羽翼全。五金池畔質。百和口中烟。嘗鈍魚難啄。心空火自然。御爐如有缺。須進聖君前。

別春爐

唐白居易

暖閣春初入。溫爐興漸闌。晚風猶冷在。夜火且留看。獨宿相依久。多情欲別難。誰能共天語。長遣四時寒。

手爐

附張勳

松灰籠煖袖先知。銀葉香飄篆一絲。頂絳梅花平出網。腰環竹節卧生枝。不愁凍玉蒼難撚。且喜元霜筆易持。縱使詩家寒到骨。陽春腕底已生姿。

燈

唐李商隱

皎潔終無倦。煎熬亦自求。花時隨酒遠。雨夜背窗休。冷暗黃茅驛。暄明紫桂樓。錦囊名畫掩。玉

局敗棋收。何處無佳夢。誰人不隱憂。影隨簾押轉。光信筆文流。客目勝潘岳。儂今定莫愁。固應留半饒。回照下帷羞。

又

唐鄭谷

雨向莎階滴未休。冷光孤恨兩悠悠。船中聞鴈洞庭宿。牀下有蛩長信秋。背照翠簾新洞列。不挑紅燼正含愁。蕭瑟寒竹南窗靜。一局閒棋爲爾留。

又

唐徐寅

分影由來恨不同。綠窗孤館兩何窮。菱煙短焰長疑暗。零落殘花旋委空。幾處隔簾愁夜雨。誰家當戶怯秋風。莫言明滅無多事。曾比人生一世中。

又

唐韓偓

高在酒樓明錦幙。遠隨漁艇泊烟江。古來幽怨皆銷骨。休向長門背雨窗。

書燈

元謝宗可

尹晤聲裏漏初長。願借丹心吐寸光。萬古分明看簡冊。一生照耀付文章。芸編清逼蘭膏煖。花

爐時沾竹汗香。明日金蓮供草制。幾人風露在秋堂。

書舍寒燈

元葉顥

青燈黃卷伴更長。花落銀缸午夜香。異日長檠珠翠處。苦心寒焰莫相忘。

蓮燈

元謝宗可

寫點芙蓉午夜芳。醉看疑是水雲鄉。蘭缸照破西湖夢。火樹燒殘太液香。焰暖應愁擎夜雨。燼寒不爲倒秋霜。元宵庭院東風曉。零落紅衣繞畫梁。

水燈

波明焰暖晚風閒。泡影飛來鏡裏看。萬點芙蓉開碧沼。一天星斗落冰盤。珠浮赤水光猶溼。火浴丹池夜未乾。照破魚龍波底夢。幽宮不怕五更寒。

走馬燈

飈輪擁騎駕炎精。飛繞人間不夜城。風鬣追星來有影。霜蹄逐電去無聲。秦軍夜潰咸陽火。吳炬宵馳赤壁兵。更憶雕鞍年少日。章臺踏碎月華明。

聞雞燈

明瞿佑

怒挾爭機下絳臺。月明照見影毵毵。彩鸞舞鏡腸應斷。丹鳳迎陽尾乍開。五德有名終氣合。兩雄相厄未心灰。孟韓聯句誰能續。燒盡東風畫燭煤。

鞋燈

弓樣新裁瘦不禁。分明一柸照花陰。凌波未試響響玉。踏月還生步步金。細蕾先開傳密意。赤繩雙繫結同心。少年前度相看處。唯恨鞦韆別院深。

燈花

唐韓愈

今夕知何夕。花燃錦帳中。自能當雪暖。那肯待春紅。紅裏排金粟。釵頭綴玉蟲。更煩將喜事。來報主人公。

又

元謝宗可

誰分春色上銀臺。小草梢頭吐燼煤。丹萼擎烟深夜結。朱蕤噴火背陽開。吟窗對酒分詩罷。旅館敲棋待客來。願得東君膏澤滿。芳心一點不成灰。

挑燈杖

唐駱賓王

稟質非貪熱。焦心豈憚熬。終知不自潤。何處用脂膏。

燭

唐太宗

九龍翻焰動。四照逐花生。即此流高殿。堪持代月明。

蠟燭

唐鄭谷

仙漏遲遲出建章。宮簾不動透清光。金闌露白初裁詔。畫閣春紅正試粧。淚滴杯盤何所恨。縹蘭麝暗和香。多情更有分明處。照得歌塵下燕梁。

燭剪

附張劭

張起飛蛾兩翅空。烟花採遍露盤中。分膏香染金雅常。去蠹光流玉樹叢。鑒客詩窗煩刻額。佳人繡幕藉催工。一枝也勝吳剛斧。砍退重陰徹夜紅。

線香

明瞿佑

搗麝篩檀入範模。潤分薇露合羅蘇。一絲吐出青烟細。半炷燒成玉筋粗。道士每占經次第。佳

人惟驗續功夫。軒窗几席隨宜用。不待高擎鵲尾爐。

魏城馬南瑞以異香見遺爲賦

元毛 鹿

梅心蘭甲類元同。氣壓荀家百和功。借潤更煩纖手玉。出雲初試博山銅。崇朝日下亭亭蓋。三月花間細細風。我有烟緣在香火。鼻端消息爲君通。

香桌

明瞿 佑

雕檀斲梓樣新奇。露閣雲窗任轉移。金獸小身平立處。玉人纖手竝棲時。輕烟每向穿花見。細語多因拜月知。有約不來閒凭久。麝煤煨盡獨敲棋。

木炭

明朱之蕃

墨沼蒼龍蛻骨堅。冰霜難犯地爐邊。送來雪裏寒威重。領取春回暖律先。炙手何勞事倚附。烹心喜見息風烟。烏金聲價真相稱。不朽精神藉火傳。

煙

唐徐 寅

燎野焚林見所從。惹空橫水展形容。能滋甘雨隨車潤。不竝行雲逐客踪。晴島回籠嘉樹薄。春

亭嬌攀好花濃。有時片片風吹去。海碧山青過幾重。

遠烟

唐僧處默

鶉鴝前山上。凝光滿薜蘿。高風吹不斷。遠樹得偏多。翠與晴雲合。輕將淑氣和。正堪留野目。休問意如何。

南至日隔仗望含元殿爐烟

唐崔立之

冕旒初負宸。丹服盡朝天。陽谷初移日。金爐漸起烟。芬香縈篆獸。散漫入貂褰。霜仗凝逾白。朱旂映轉鮮。始看浮闕在。稍見逐風還。為沐皇家慶。來瞻羽衛前。

烟火戲

明瞿佑

天花無數月中開。五色祥雲繞絳臺。墮地忽驚星彩散。飛空旋作雨聲來。怒撞玉斗翻晴雪。勇踏金輪起疾雷。更漏已深人漸散。闌竿挑得綠燈回。

鏡

唐姚合

鑄為明鏡絕塵埃。翡翠窗前掛玉臺。綉帶共尋龍口出。菱花爭向匣中開。孤光常見鷺踪在。分

處還應鵲影迴。好是照身宜謝女。嫦娥飛向月中來。

古鏡

唐闕名

舊是秦時鏡。令藏古匣中。龍盤初掛月。鳳舞欲生風。石色曾留殿。珠光適在宮。應祥知道泰。鑑物覺神通。肝膽誠難測。妍媸信易窮。幸居君子室。長得免塵蒙。

又

唐僧若虛

軒后紅爐獨鑄成。薛痕磨落月輪呈。萬般物象皆能鑑。一箇人心不可明。匣內乍開鸞鳳活。臺前高掛鬼神驚。百年肝膽堪將此。只怕頻看素髮生。

對鏡

金完顏疇

鏡中色相類吾深。吾面終難鏡裏尋。明月印空空受月。是他空月本無心。

扇

唐李嶠

翟羽舊傳名。蒲葵價不輕。花芳不滿面。羅薄詎障聲。集熱含風細。臨秋帶月明。同心如可贈。持表合歡情。

又

唐徐寅

為發涼颼滿玉堂。每親襟袖使難忘。霜凝雪暗知何在。道契時來忽自揚。曾伴一樽臨小檻。幾遮殘日過迴廊。漢宮如有秋風起。誰信班姬淚數行。

摺疊扇

明瞿佑

開合清風紙半張。隨機舒卷豈尋常。金環竝束龍腰細。玉柵齊編鳳翅長。偏稱遊人撝袖裏。不勞侍女執花傍。宮羅舊賜休相妬。還汝團圓共夜涼。

牀

唐李嶠

傳說有象牀。時音獻君王。飛璫千金重。珊瑚七寶粧。桂筵含素柏。蘭席拂沉香。願奉羅帷夜。長承秋月光。

白角簟

唐羅鄴

疊玉駢珪巧思長。露華烟曉讓清光。休搖雉尾當三伏。似展龍鱗在一牀。高價不惟標越絕。冷紋疑是卧瀟湘。杜陵他日重歸去。偏稱醉眠松桂堂。

席

唐李嶠

避坐承宣父。重筵揖戴公。桂香浮半月。蘭氣襲回風。舞拂丹霞上。歌清白雪中。佇將文綺色。舒卷帝王宮。

决明甘菊枕

明朱之蕃

警枕重勞石枕寒。無如藥叢最相安。剖來珠蚌光堪掬。採積金英秀可殮。布被暖香欺錦帳。竹牀清風敵蒲團。休論返黑方瞳炯。熟寢通宵即大丹。

蒲團

附張劭

千絲水葉細成綸。百結平沉在下邊。仙竈坐殘雲共冷。佛燈趺老月同圓。不時葦索非逃釋。隨意工夫也入元。莫笑山家閒骨董。幾人能得此清緣。

龍杖

元謝宗可

鱗甲光搖玉一枝。幽宮躍出袖中持。多因掌握提携晚。休恨飛騰變化遲。緩策不愁山雨溼。醉橫常有野雲隨。會看掛壁風雷起。莫待詩翁過葛陂。

紅藤杖

唐白居易

交親過瀟別。車馬到江回。唯有紅藤杖。相隨萬里來。

湘竹杖寄無住

元宋元

采向湘江古廟邊。得來賁客木蘭船。老宜泉石攄慵態。吟稱烟霞倚瘦肩。宴坐夜和金錫憩。經行春早紫苔穿。知師道價神龍護。莫漫騰空去九天。

水晶念珠

唐曹松

等量紅縷賁晶瑩。盡道圓勻別未勝。鑿斷玉潭盈尺水。琢成金地兩條冰。輪時祇恐星侵佛。掛處常疑露滴僧。幾度夜深尋不著。琉璃為殿月為燈。

竹夫人

元謝宗可

胸次玲瓏粉黛羞。宵征何必抱衾裯。應無雲雨三更夢。自有冰霜六月秋。盡節每曾陳諷刺。虛心那解老溫柔。專房不怕蛾眉妬。只恐西風動別愁。

錫婆

明瞿佑

困倚蒲團罷煮湯。一團和氣有商量。生來不作閒雲雨。老去偏多熱肺腸。金母有心同壽域。竹奴無意妬專房。布衾紙帳風雷夜。始信溫柔別有鄉。

織錦機

綠紗窗下聲唧唧。知是秦川第幾家。五色染成長命綵。雙頭挽就合歡花。只愁轉軸勞筋力。莫漫投梭損齒牙。不似繡床閒坐倦。自將辛苦作生涯。

熨衣斗

有柄何曾挹酒漿。隨時用舍屬閨房。幹旋天上陽和氣。平貼人間錦繡香。翠袖卷紗移玉腕。金篝分火近牙牀。衣成遠寄征夫去。印顰何時肘從黃。

擣衣石

一方滑淨絕苔錢。才屬秋閨響可傳。長夜未央風陣急。美人相對月華圓。高於鳳閣黃金礎。厚勝花堦綠玉碑。幾度晚涼眠不得。丁冬聲到客愁邊。

聞砧

金鄮權

玉關消息到長安。處處砧聲擣夜闌。想得月殘音響斷。一燈清照剪刀寒。

剪刀

唐徐寅

寶持多用繡為囊。雙目交加兩翼霜。金匣掠平花翡翠。綠窗裁破錦鴛鴦。初裁連理枝猶短。誤綰同心帶不長。欲製繻袍先把看。質非紈綺愧鉗鋟。

又

明瞿佑

巧製工夫百鍊鋼。持來閨閣共行藏。雙環對展魚腸快。兩股齊開燕尾長。針線有功憑製造。綺羅無價任裁量。隨機鏤出新花樣。長在佳人玉指傍。

茶鐺

有耳原非鼎鼐材。只宜烹茗待賓來。煖分道室金丹火。冷撥山房鐵鼎灰。車轉羊腸聲漸急。香浮雀舌夢初回。若教移對舒州杓。又屬詩人舉酒盃。

題真上人竹茶爐

明王綏

僧館高閒事事幽。竹編茶竈淪清流。氣蒸陽羨三春雨。聲帶湘江兩岸秋。玉白夜敲蒼雪冷。翠

甌晴引碧雲稠。禪翁托此重開社。若箇知心是趙州。

貢餘祕色茶盞

唐徐寅

振碧融青瑞色新。陶成先得貢吾君。巧剡明月染春水。輕旋薄冰盛綠雲。古鏡破苔當席上。嫩荷涵露別江濱。中山竹葉香初發。多病那堪中十分。

咏柳少府山瘿木樽

唐李白

瘿木不雕飾。且將斤斧疎。樽成山岳勢。材是棟梁餘。外與金罍並。中涵玉醴虛。慚君垂拂拭。遂忝玳筵居。

螺杯

元謝宗可

香醕浮蟻入旋渦。半殼蒼瓊費琢磨。應嫌美人盤寶髻。且供豪客捲金波。尊中綠照珠光潤。掌上春擎海氣多。安得滄溟俱變酒。垂涎終日飲如何。

夜光杯

明朱之蕃

髣髴盤繞隱東洋。吸得瑤空寶月光。孕出靈珠能照乘。剖開素質待飛觴。晶瑩絕勝金樽艷。華

彩渾添玉液芳。浮白江天遠騎望。酒星垂耀正更長。

酒旗

元謝宗可

水邨山郭酒初香。綵影青青字一行。壺伴低懸花露溼。檐陰斜揭柳風涼。指揮惹馬衝愁陣。搖曳心旌入醉鄉。惆悵步兵招不起。半竿空自舞斜陽。

藥鼎

明瞿佑

白雪紅鉛自有華。何須勾漏問丹砂。香煙滿屋結蒼霧。丹氣穿林生紫霞。修煉欲通三島路。烹調不入五侯家。彌明豈識君臣品。惟把龍鬚豕腹誇。

花瓶

泉香一壺淨無塵。小器翻成席上珍。密把英華齊藉口。虛將心腹暗藏春。送行不是沙頭玉。引浪原非井底銀。貪揀俏枝停立久。閨中偏稱曉粧人。

象牙梳

不與豪門製寶床。晨昏用舍屬蘭房。一鈎獨現雲鬟側。八字平分翠鬢傍。溪女菱詩銀櫛貴。宮

嬾空愛玉釵門。從教座上無油木。勸酒行看出艷粧。

眼鏡

附張 劭

冷光匣底出羅微。黑蝶分張翅欲飛。星隔絳河雙耿耿。月懸銀海竝輝輝。朦朧透霧花能辨。黯
淡依燈草易揮。大阮不愁青白廢。圓冰自解發清機。

水晶環

唐羅 維

玉室符長慶。環中得水精。任圓猶不極。見素質仍貞。信是天然瑞。非因撲斲成。無瑕勝玉美。至
潔過冰清。未肯齊珉價。甯同雜佩聲。能銜任黃雀。亦欲應時明。

碧鈿指環

明瞿 佑

一點萍星露指尖。分明界破玉纖纖。眼看翠靨侵銀甲。手弄花鈿出鏡奩。懷寶自知承寵厚。賜
環誰始受恩兼。鳳仙更索柔荑染。紅綠爭春色倍添。

玉指環

附張 劭

一彊細琢費工夫。黃雀銜來入袖羅。戒取井欄沉玉女。潔爭月掌抱嫦娥。初拈春笋雙穿滑。微

褪紅痕淺印多。記得韋郎親脫贈。再生攜手不消磨。

斧

明解縉

斲削羣才到鳳池。良工良器兩相資。他年好携朝天去。奪取簪宮第一枝。

鋸子

曲邪除盡不疑猜。昔日公輸巧製來。正是得人輕借力。定然分別棟梁材。

釣絲

元謝宗可

臨流纖影衆鱗驚。消得長縲一饌輕。鉤墮亂縈春水碧。竿垂斜象晚風清。牽回江上烟波夢。掣斷人間富貴情。我欲笑携千尺去。桃花浪裏拔鯨鯨。

青

唐荆冬倩

地闊天光遠。春還月道臨。草濃河畔色。槐結路傍陰。未映君王史。先標胄子衿。經明如可拾。自有致雲心。

燕脂

元謝宗可

仙花和露搗芳塵。駐得宮娥不老春。香暈紅潮生玉頰。緩融絳蠟點櫻唇。渭流漲膩人應遠。宮井流斑恨愈新。鏡倚綠窗嬌夢醒。索纖微醺晚粧勻。

烟筒

附陳業

截得貧簪竹。裝成一勺宜。烟雲時吐納。杖履慣追隨。直欲凌茶椀。還堪敵酒卮。吟邊與夢後。正爾繫相思。

雜玩部

鰲山

明瞿佑

燈火元宵擁翠微。飛來海上是耶非。樓臺夜識金銀氣。嶺岫春回日月輝。龍伯國人垂釣去。水宮仙子步塵歸。女媧立極多勞苦。不似東風錦繡圍。

觀鰲山

明唐寅

禁衛森嚴夜寂寥。燈山忽見翠岩曉。六鰲並駕神仙府。雙鵲連成帝子橋。星振珠光鋪錦繡。月

分金影亂瓊瑤。顧身已自登巒嶺。何必秦姬奏洞簫。

骰子

明瞿佑

擲蒲局裏任提撕。圓轉隨時效滑稽。力士賜緋心獨喜。媚娘雙陸夢多迷。深藏玉手拈羅帕。輕打牙盤刻樹鷄。却憶咸陽客舍裏。呼盧喝雉燭花低。

爆竹

明黎淳

自憐結束小身材。一點芳心未肯灰。時節到來寒焰發。萬人頭上一聲雷。

雙陸

元謝宗可

彩戲清響押盤飛。曾記唐宮爲賜緋。影入空梁殘月在。聲隨征馬落星稀。重門據險應輪擲。數點爭雄莫露機。惟恨懷英誇敵手。御前奪取翠裘歸。

紙鳶

孤鶩穩駕剡溪雲。多少兒童仰羨頻。半紙飛騰元在已。一絲高下豈隨人。聲馳空碧東風曉。影度遙天化日春。誰道致身無羽翼。迴看高舉絕紅塵。

又

畫裏休看郭超先。巧糊片楮作翩跹。影馳空碧搖雙帶。聲過行雲鼓一絃。避雨飛來芳草地。乘風遊遍綠陽天。黃昏人倚樓頭望。添箇紅燈到上邊。

附張 劭

泥孩兒

是許寧馨物。居然在席端。難邀上客賞。易博小兒歡。粉膩緣粧點。泥融本控搏。何曾無面目。畢竟沒心肝。幾見頑堪鑿。誰云秀可餐。一朝仍化土。冷落白蘋灣。

附魏 允札

戲咏不倒翁

唐李 白

掉首浮生半紙輕。一丸封就任縱橫。何妨失足貪遊戲。不耐安眠欠老成。儘受推排偏倔強。敢煩扶策自支撐。却遭桃梗妍皮誚。此內空空浪得名。

蘭花

附張 劭

素苞黃蕊結離離。玉蛹生來不蠹奇。陌上採桑催信早。宮中剪綵鬪芳遲。抽從圍客絲纒辨。插向蠶娘鮑娘枝。只有晉陽裁處好。穩無風雨擾花期。

咏物詩選卷六

魏塘俞 琰長仁輯

玉帛部

玉

唐李 嶠

映石先過魏。連城欲向秦。洛陽陪勝友。燕趙類佳人。方水晴虹媚。常山瑞馬新。徒為下和識。不遇楚王珍。

珠

燦爛金輿側。玲瓏玉殿隈。昆池明月滿。合浦夜光迴。彩逐靈蛇轉。形隨舞鳳來。甘泉宮起罷。花媚望風臺。

奉試明堂火珠

唐崔 曙

正位開重屋。凌空出火珠。夜來雙月滿。曙後一星孤。天淨光難滅。雲生望欲無。遙知太平代。國

實在名都。

珊瑚

附錢鑒

石家擎出獨稱高。七尺玲瓏映綺寮。不識瓊枝來海底。却疑火樹燦元宵。

水精

唐韋應物

映物隨顏色。含空無表裏。持來向明月的。燦愁成水。

琉璃

唐元稹

有色同寒水。無物隔纖塵。象筵看不見。堪將對玉人。

琥珀

曾為老茯神。本是寒松液。蚊蚋落其中。千年猶可覿。

金

唐李嶠

南楚標前貢。西秦識舊城。祭天封漢嶺。擲地警孫聲。向日披沙淨。含風振鐸鳴。方同楊伯起。獨有四知名。

銀

唐李嶠

恩婦屏輝掩。遊人燭影長。玉壺初下箭。桐井共安牀。色帶長河色。光浮滿月光。靈山有珍甕。仙闕薦君王。

錢

唐徐寅

多蓄多藏豈足論。有誰還議濟王孫。能于禍處翻為福。解向憐家買得恩。幾怪鄧通難免餓。須知夷甫不曾言。朝爭暮競歸何處。盡入權門與倖門。

錦

唐鄭谷

文君手裏曙霞生。美號曾聞借蜀城。奪得始知袍更貴。著歸方覺畫偏榮。宮花顏色開時麗。池鳳毛衣浴後明。禮部郎官人所重。省中別好占窠名。

繡

唐羅隱

一片綠羅如錦綃。洞房西室女工勞。花隨玉指添春色。鳥逐金針長羽毛。蜀錦漫誇聲自貴。越綾虛說價功高。可中用作鴛鴦被。紅葉枝枝不得刀。

綾

金縷通秦國。為裘措魏名。落花遙寫霧。飛鶴近圖雲。馬眼冰凌影。竹根雪霰文。何當畫秦女。煙際坐氤氲。

羅

妙舞隨裾動。行歌入扇清。蓮花依帳發。秋月鑒帷明。雲薄衣初捲。蟬飛翼轉輕。若珍三代服。同擅綺紈名。

高氏姊惠素羅

元鄭允端

雪色香羅照眼明。阿兄寄贈見深清。明朝急為裁春服。相約麻姑禮上清。

布

唐李嶠

御績淑義皇。緇冠表素王。瀑飛臨碧海。火浣擅炎荒。孫被登三相。劉衣闡四方。佇因春斗粟。未曉棣華芳。

冠服部

山友贈薜花冠

唐項斯

塵汗出華髮。漸君青薜冠。此身閒未得。終日戴應難。好就松陰挂。宜當枕石看。會須尋道士。簪去繞霜壇。

酬贈葛巾

唐王維

野巾傳惠好。茲貺重兼金。嘉此幽棲物。能齊隱吏心。早朝方暫挂。晚沐更來簪。坐覺囂塵遠。思君共入林。

華陽巾

唐徐牧

剪霧裁雲勝角冠。來從玉洞五雲端。醉宜蘼葉歌斜影。穩稱菱花仔細看。野客愛留籠鶴髮。溪翁爭乞配魚竿。真仙首飾勞相寄。塵上翻慚戴去難。

白油帽

唐錢起

薄質慚加首。愁陰幸庇身。卷舒無定日。行止必依人。已沐脂膏惠。甯辭雨露頻。雖同客衣色。不染洛陽塵。

筠笠

唐陸龜蒙

朝携下楓浦。晚戴出烟艇。冒雪或平簷。聽泉時側頂。飈移靄然色。波亂危如影。不識九衢塵。終年居下涸。

答友人惠牙簪

唐章孝標

牙簪不可忘。來處隔炎荒。裁得半輪月。磨成四寸霜。曉辭梳齒膩。秋入髮根涼。好是紗巾下。纖纖出衆囊。

包頭

明梁小玉

輕霞薄霧小香羅。傍著蟬鬟香更多。最愛春山經綰上。橫粧一帶淺青螺。

賀盧員外賜緋

唐段成式

雲雨軒懸鶯語新。一篇佳句占陽春。銀黃年少偏欺酒。金紫風流不讓人。運甓塵中斜日滿。貫

珠歌裏落花頻。莫辭倒載吟歸去。明月東山又吐茵。

賜錦袍

唐劉 兼

十月芙蓉花滿枝。天庭驛騎賜寒衣。將同玉蟬侵肌冷。也遣金鵬遍體飛。夜卧始知多忝竊。晝行方覺轉光辉。深冬若得朝天闕。太華峯前衣錦歸。

謝賜衣

明高 啓

臚呼遙捧賜。拜服望蓬萊。香帶爐煙下。光迎扇月開。奇文天女織。新樣內官裁。被澤徒深厚。慚無奪錦才。

端午日賜衣

唐杜 甫

宮衣亦有名。端午被恩榮。細葛含風軟。香羅疊雪輕。自天題處涇。當暑著來清。意內稱長短。終身荷聖情。

新製綾襖成感而有咏

唐白居易

水波文襖造新成。綾軟綿勻溫復輕。晨興好擁向陽坐。晚出宜披踏雪行。鶴氅毳裘無實事。木

棉花冷得虛名。宴安往往歎侵夜。卧穩昏昏睡到明。百姓多寒無可救。一身獨暖亦何情。心中為念農桑苦。耳裏時聞餓凍聲。爭得大裘長萬丈。與君都蓋洛陽城。

竹衫

附張 劭

齊腰丹服亦消炎。穿就幽篁異織簾。魚網篩風涼易透。鮫絲辟水汗難粘。身逃張廌裁應好。心愛王猷着未嫌。莫怪眼中微有刺。此君原與熱人砭。

漁蓑

元謝宗可

翠結香莎付釣舟。一竿風雨不須愁。苔磯夜泊披寒去。葦岸昏歸帶溼收。月冷籠衣眠舵尾。天晴隨網晒船頭。羊裘莫笑狂奴錯。也著煙波萬頃秋。

半臂

附張 劭

何須全錦表風華。雅便詩翁手入叉。短覆鶯毛翎未滿。雙披荷葉藕微遮。休疑割袖香初斷。却喜隨肩煖易加。底事曲江人醉去。忍寒不顧笑情奢。

韞

唐杜 甫

細尺裁量減四分。纖纖玉筍裹輕雲。五陵年少欺他醉。笑把花前出畫裙。

賦得履

明高啓

穩稱遊方脚。新編楚岸蒲。滑欺拳頂石。危怯世間塗。輕曳愁妨蟻。高飛笑化鳬。上堂聲每衆。度嶺影還孤。著處朝行道。拋時夜結跣。空山欲相訪。落葉去踪無。

襪鞋

附張劭

淨樹奇毛織就輕。道人放脚有閒情。雙飛紫鳳凌山起。逐步清風入夏生。詩上翻宜隨拂掛。畫中看稱採芝行。只休送與珠裝客。不曉紅塵去走名。

繡鞋

明錢福

幾日深閨繡得成。看來便覺可人情。一簷煖玉凌波小。兩瓣秋蓮落地輕。南陌踏青春有跡。西廂立月夜無聲。看花又溼蒼苔露。晒向窗前趁晚晴。

睡鞋

附張劭

樣減銷金軟勝綿。象牀斜坐試將眠。纖纖縫就雲分瓣。窄窄兜來月上弦。未怯春風吹彩鳳。只

愁夜雨溼紅蓮。玉郎瞥見心先醉。素傍銀燈掌上憐。

複裙

唐蕭驎

晶晶金紗淨。離離寶縫分。纖腰非學楚。寬帶爲思君。

被

唐李嶠

桂友尋東閣。蘭交聚北堂。象筵分錦繡。羅薦合鴛鴦。光逸偷眠穩。王章泣恨長。孔懷欣共寢。萼棟幾含芳。

虎皮褥

明瞿佑

南山遺害已驅除。裁就文茵任卷舒。不製征鞍隨將士。却登講席奉師儒。夜無惡夢來燈下。晝有威風起座隅。每向高堂鋪設處。能令馮婦亦回車。

紙帳

元謝宗可

清懸四壁剌溪霜。高卧梅花月半牀。蒨甕有天春不老。瑤臺無夜雪生香。覺來虛白神光發。睡去清閒好夢長。一枕總無塵土氣。何妨留我白雲鄉。

尚書筵中咏紅手帕

唐徐寅

鶴綾三尺曉霞濃。送與東家二八容。羅帶繡裙輕好繫。藕絲紅縷細初縫。別來拭淚遮桃臉。行去包香墮粉胸。無事把將鑾暗脫。為君池上折芙蓉。

鮫綃帕

明瞿佑

繭結扶桑出海濱。遠隨機杼倩鮫人。不裁洛浦凌波襪。能代湘川拭淚巾。紫霧熏香攸汗潤。彩毫傳恨寄情真。吳綾輕薄番羅俗。出袖宜同掌上珍。

飲食部

謝青餽飯

唐皮日休

傳得三元餽飯名。大宛閒說有仙卿。分泉過屋春青稻。拂霧褰衣折紫莖。蒸處不教雙鶴見。服來惟怕五雲生。草堂空坐無饑色。時把金津漱一聲。

酬寄錫粥

唐李商隱

粥香錫白杏花天。省對流鶯坐綺筵。今日寄來春已老。鳳樓迢遞憶鞦韆。

粉丸

明吳寬

淨淘細碾玉霏霏。萬顆完成素手稀。鬚上輕圓真易拂。腹中磊塊更堪圍。不勞劉裕呼方旋。若使陳平食更肥。既飽有人頻咳唾。席間往往落珠璣。

茶

宋林逋

石碾輕飛瑟瑟塵。乳香烹出建谿春。世間絕品人難識。閒對茶經憶古人。

嘗茶

唐劉禹錫

生怕芳叢鷹嘴芽。老郎封寄謫仙家。今宵更有湘江月。照出霏霏滿盃花。

峽中嘗茶

唐鄭谷

簇簇新英摘露光。小江園裏火煎嘗。吳僧漫說丫山好。蜀叟休誇烏嘴香。合座半甌輕泛綠。開緘數片淺含黃。鹿門病客不歸去。酒渴更知春味長。

嘗雲芝茶

元劉秉忠

鐵色皺皮帶老霜。含英咀美入詩腸。古根未得天真味。鼻觀先通聖妙香。海上精華難品第。江南草木屬尋常。待將膚湊侵微汗。毛骨生風六月涼。

對茶

元孫淑

小閣烹香茗。疎簾下玉鉤。燈光翻出鼎。斂影倒沉甌。婢捧消春困。親嘗散暮愁。吟詩因坐久。月轉晚粧樓。

尚書惠蠟面茶

唐徐寅

武夷春暖月初圓。採摘新芽獻地仙。飛鵲印成香蠟片。啼猿溪走木蘭船。金槽和碾沉香末。冰椀輕涵翠縷煙。分贈恩深知最異。晚鑪宜煮北山泉。

雪煎茶

元謝宗可

夜掃寒英糞綠塵。松風入鼎更清新。月圓影落銀河水。雲脚香融玉樹春。陸井有泉應近俗。陶家無酒未爲貧。詩脾奪盡豐年瑞。分付蓬萊頂上人。

茶煙

明瞿佑

濛濛漠漠更霏霏。淡抹銀屏罨講帷。石鼎火紅詩咏後。竹爐湯沸客來時。雪飄僧舍衣初溼。花落船窗鬢已絲。惟有庭前雙白鶴。翩然趨避獨先知。

酒

唐翁 綬

避暑迎春復送秋。無非綠蟻滿杯浮。百年莫惜千回醉。一盞能消萬古愁。幾為芳菲眠細草。曾因雨雪上高樓。平生名利關身者。不識狂歌到白頭。

屠蘇酒

明瞿 佑

紫府仙人授寶方。新正先許少年嘗。入神奉命調金鼎。一氣回春滿絳囊。金液夜流千尺井。春風曉入九霞觴。便將鳳歷從頭數。日日持杯訪醉鄉。

菖蒲酒

採得靈根傍藕塘。祇因佳節屆端陽。金刀細切傳纖手。玉甕輕浮送異香。廚薦鱗魚冰作鱠。盤供角黍蔗為漿。同時節物充筵會。縱飲何妨入醉鄉。

泗州除夜雪中黃師實送酥酒

宋蘇 軾

關石土酥黃似酒。揚州雲液卻如酥。欲從元放覓拄杖。忽有麴生來座隅。對雪不堪令飽暖。隔船應已厭歌呼。明朝積玉深三尺。高枕牀頭尚一壺。

對酒

唐王 建

為病比來渾斷絕。緣花不免却知聞。從來事事關身老。主領春風只在君。

看壓新醅

唐陸龜蒙

曉壓糟牀漸有聲。旋如荒澗野泉清。身前古態重應出。世上愁痕滴合平。飲啄斷年同鶴儉。風波終日看人爭。樽中若使常能綠。兩段通侯總強名。

又

唐皮日休

一簣松花細有聲。旋將梁椀撇寒清。秦吳只恐蕭來近。劉項真應釀得平。酒德有神多客頌。醉鄉無貨淡人爭。五湖煙水郎山月。合向樽前問底名。

河南府試鄉飲酒

唐呂 溫

酌言雖舊典。刈楚始登堂。百拜寶儀盃。三終樂奏長。來同鶩出谷。坐比鴈成行。禮罷知何適。隨

雲入帝鄉。

待宴甘泉殿

唐李嶠

月宇臨丹地。雲窗網碧紗。御筵陳桂醕。天酒酌榴花。水向浮橋直。城連禁苑斜。承恩恣歡賞。歸路滿煙霞。

廣達樓下夜侍醕宴應制

唐蘇頲

東岳封回宴洛京。西壙通曉會公卿。樓臺絕勝宜春苑。燈火還同不夜城。正覩人間朝市樂。忽聞天上管絃聲。醕來萬舞羣臣醉。喜戴千年聖主明。

秋夜宴臨津鄭明府宅

唐杜審言

行止皆無地。招尋獨有君。酒中堪累月。身外即浮雲。霜白宵鐘徹。風清曉漏聞。坐携餘興往。還似未離羣。

錢塘夜宴留別郡守

唐張蠡

四方騷亂一州安。夜列樽罍伴客歡。華策調高山閣迥。蝦蟆聲促海濤寒。屏間珮響藏歌妓。幕

外刀光列侍官。沉醉不愁歸棹晚。晚風吹上子陵灘。

陪金陵府相中堂夜宴

唐韋莊

滿耳笙歌滿眼花。滿樓珠翠勝吳娃。因知海上神仙窟。只似人間富貴家。綉戶夜攢紅燭市。舞衣晴曳碧天霞。却愁宴罷青娥散。楊子江頭月半斜。

長安春舍叙邵陵舊宴懷永門蕭使君

唐曹唐

木魚金鑰鎖重城。夜上紅樓縱酒情。竹箭水簷更漏促。桐花風軟管絃清。百分打散銀船溢。十指寬催玉筋輕。星斗漸稀賓客散。碧雲猶戀艷歌聲。

又

三年身逐楚諸侯。賓榻容居最上頭。飽聽笙歌陪夜飲。熟尋雲水縱閒遊。朱門鎖閉煙霞暮。鈴閣清冷水木秋。月滿前山圓不動。更邀詩客上高樓。

糟魚

元王惲

霜刀切斷玉腴芳。暖貯銀罍釀粉漿。錦尾帶頰傳內品。金盤堆雪喜初嘗。解醒未減黃柑美。爲

味能欺紫蟹香。一筋餐餘乘醉卧。夢橫滄海聽鳴榔。

糖霜

元洪希文

春餘甘蔗榨為漿。色美鵝兒淺淺黃。金掌飛仙承瑞露。板橋行客履新霜。攜來已見堅冰漸。嚼過誰傳餐玉方。喻與雪堂老居士。牙盤琥珀妙稱揚。

豆腐

附張 劭

琉璃磨雪溼霏霏。煉作瓊漿起素衣。出匣寧愁方壁碎。覆羹常見白雲飛。蔬盤慣雜同羊酪。象筋難挑比髓肥。却笑北平思食乳。霜刀不切粉酥歸。

梅醬

枝北枝南採作漿。紫蘇添釀碧罌嘗。不須鹽豉和羹下。儘有甘泉攪味長。澆齒解醒良可喜。攢眉飲水亦何傷。七菹好付醃人手。萬饌酸風夏欲涼。

雲母散

唐白居易

曉霧雲英漱井華。寥然身若在煙霞。藥銷日晏三匙飯。酒渴春深一椀茶。每夜坐禪觀水月。有

時行醉玩風花。淨名事理人難解。身不出家心出家。

人參

唐皮日休

神草延年出道家。是誰披露託三桮。開時的定涵雲液。闋後還應帶石花。名士寄來消酒渴。野人煎處撇來華。從今湯劑如相續。不用金山焙上茶。

病中宜茯苓寄李諫議

唐吳融

千年伏菟帶龍鱗。太華峯頭得最真。金鼎曉煎雲漾粉。玉甌寒貯露含津。南宮已借徵詩客。內署今還託諫臣。飛檄愈風知妙手。也須分藥救漳濱。

煙

附胡然

流播自遐方。爭看帶火嘗。避寒同麝藥。解渴勝茶湯。堪助吟哦趣。能增齒頰香。霏霏呼吸處。雲霧滿衣裳。

果部

李

唐李嶠

潘岳閒居日。王戎戲陌辰。蝶遊芳徑。鶯轉弱枝新。葉暗青房。花明玉井春。方知有靈。時用表真人。

食梅

明費宏

夏木陰陰雨氣寒。半黃微顯摘林端。齒輪赤子先拚軟。肩為蒼生故自攢。調劑功微慚玉鉉。賜沾恩重憶金盤。一株留取當階樹。贏得花時索笑看。

梅

宋黃庭堅

帶葉連枝摘未殘。依依茶塢竹籬間。相如病渴應須此。莫與文君覓遠山。

桃

唐李嶠

獨有成蹊處。穠花發井旁。山風凝笑臉。朝露泣啼粧。隱士顏應改。仙人路漸長。還欣上林苑。千歲奉君王。

勅賜百官櫻桃

唐王維

芙蓉閣下會千官。紫禁朱櫻出上蘭。纔是寢園春薦後。非關御苑鳥銜殘。歸鞍競帶青絲籠。中使頻傾赤玉盤。飽食不須愁內熱。大官還有蔗漿寒。

白櫻桃

唐韋莊

王母堦前種幾株。水晶簾外看如無。只應漢武金盤上。瀉得珊瑚白玉珠。

楊梅

明徐階

折來鶴頂紅猶溼。刺破龍睛血未乾。若使太真知此味。荔枝焉得到長安。

謝紹興帥邱宗卿惠楊梅

宋楊萬里

梅出稽山世少雙。情知風味勝他楊。玉肌半醉生紅粟。墨暈微深染紫漿。火齊堆盤珠徑寸。醴泉浸齒蔗爲漿。故人解寄吾家果。未變蓬萊閣下香。

枇杷

大葉聲長耳。一梢堪滿盤。荔枝多與核。金橘却無酸。雨壓低枝重。漿流冰齒寒。長卿今在否。莫遣作園官。

榴火

明朱之蕃

天付炎威與穗融。海波如沸沃珍叢。飛將寶鼎千重鍊。煉就丹砂萬點紅。自抱赤衷迎曉日。應慚艷質媚春風。農家賴粟須甘雨。愁擬焚林望碧空。

棗

後秦趙整

北園有一樹。布葉垂重陰。外雖多棘刺。中實有赤心。

栗熟

宋朱子

樹雜椅桐繼國風。莫教林下長蒿蓬。共期秋實充腸飽。不羨春華轉眼空。病起數升傳藥錄。晨興三咽學仙翁。櫻桃浪得銀絲薦。一笑才堪面發紅。

梨

宋劉子翬

尚想飛花映綺疏。離離秋實點塵蕪。丹腮曉露香猶薄。玉齒寒冰啗欲無。舊有佳名傳大谷。誰分靈種下仙都。蔗漿不用傳金碗。猶得相如病少蘇。

奉和揀貢橘

唐張彤

凌霜遠涉太湖深。雙捲朱旗望橘林。樹樹籠煙疑帶火。山山照日似懸金。行看採摘方盈手。暗覺馨香已滿襟。揀選封題皆盡力。無人不感近臣心。

謝惠春橘

唐陸龜蒙

到春猶作九秋鮮。應是新封白帝煙。良玉有漿須讓味。明珠無類亦羞圓。堪居漢苑霜梨上。合在仙家火棗前。珍重更過三十子。不堪分付野人邊。

佛手柑

明朱多炆

春雨空花散。秋霜碩果低。牽枝出纖素。隔葉卷柔荑。指豎禪師悟。拳開法嗣迷。疑將灑甘露。似欲攬伽梨。色現黃金界。香分白麝臍。願從靈運後。接引證菩提。

金橘

明錢士升

密密金丸不禁偷。最憐懸著樹梢頭。老人口腹原無分。留得深秋供兩眸。

柿

明陳汝秩

晚風吹雨過林廬。柿葉飄紅手自書。無限瀟瀟江海意。一樽相對憶鱸魚。

銀杏

宋楊萬里

深灰淺火略相遭。小苦微甘韻最高。未必雞頭如鴨脚。不妨銀杏作金桃。

荔枝

唐徐寅

朱彈星丸燦日光。綠瓊枝散小香囊。龍綃殼綻紅紋栗。魚目珠涵白膜漿。梅熟已過南嶺雨。橘酸空待洞庭霜。蠻山踏曉和煙摘。拜捧金盤獻越王。

又

日日薰風捲瘴煙。南園珍果荔枝先。靈鴉啄破瓊津滴。寶器盛來蚌腹圓。錦里只聞消醉渴。蕊宮惟合贈神仙。何人刺出猩猩血。深染羅紋遍殼鮮。

龍眼

明王象晉

何緣喚作荔枝奴。豈冶未安百果無。琬液醇和羞沆瀣。金丸的皪賽瓊珠。好將姑射仙人產。供作瑤池王母需。應共荔丹稱伯仲。况兼益智策勳殊。

橄欖

宋蘇軾

紛紛青子落紅鹽。正味森森苦且嚴。待得餘甘回齒頰。已輸崖蜜十分甜。

葡萄

明馮琦

曉暖繁陰覆綠苔。藤枝蘿蔓共縈迴。自隨博望仙槎後。詔許甘泉列殿裁。的的紫房含雨潤。疎疎翠幄向風開。詞臣消渴沾新釀。不羨金莖露一杯。

又

唐韓愈

新莖未徧半猶枯。高架支離倒復扶。若欲滿盤堆馬乳。莫辭添竹引龍鬚。

又

元張芳洲

聞道乘槎客。相携到漢庭。何緣嘗草日。先自入醫經。

蓮實

金張櫟

水妃擎出紺珠囊。玉筍雕盤喜乍嘗。膚白已攪新藕嫩。心清尤帶小荷香。聞餘翠鳥零珍羽。飛盡黃蜂露蜜房。口腹累人良可笑。此身便欲老江鄉。

蓮

唐溫庭筠

綠塘搖詭接星津。乳乳蘭橈入白蘋。應爲洛神波上機。至今蓮蕊有香塵。

觀貢藕

唐趙嘏

野艇幾西東。清吟映碧空。寒衣來水上。奉玉出泥中。葉亂田田綠。蓮餘片片紅。微波來入選。就日已生風。御潔玲瓏膳。人懷被濯功。梯山謾多品。不與世流同。

賜藕

明李東陽

祇向名花看畫圖。忽驚仙骨在泥塗。輕同握雪愁先碎。細比餐冰聽却無。郭北芳菲懷故里。江南風味憶西湖。渴塵此夜消應盡。未羨金莖與玉壺。

菱

唐李嶠

鉅野韶光暮。東平春溜通。影搖江浦月。香引棹歌風。日色翻池上。萍花發鏡中。五湖多賞樂。千里望難窮。

食西瓜

元方夔

恨無鐵手削駝峯。醉嚼寒瓜一百筒。饅饅花衫粘唾。碧痕痕丹血搯膚紅。香浮笑語牙生水。涼

入衣襟。骨有風。從此安心師老圃。青門何處問窮通。

紅瓢瓜

明瞿佑

採得青門綠玉房。巧將猩血沁中央。結成晞日三危露。瀉出流霞九醞漿。溪女洗花新染色。山翁煉藥舊傳方。賓筵滿把瑛盤飮。雪藕調冰倍有光。

穀部

觀稻

明石沆

稻水千區映。村烟幾處斜。冷風低起樹。輕浪細浮花。鳥雀深深圃。鳬鷺淺淺沙。社歌聲不絕。于此見年華。

茆堂檢校刈稻

唐杜甫

香稻三秋末。平田百頃間。喜無多屋宇。幸不得雲山。御挾侵寒氣。嘗新破旅顏。紅鮮終有日。玉粒未吾慙。

插秧

宋范成大

種密移疎綠毯平。行間清淺穀紋生。誰知細細青青草。中有豐年擊壤聲。

米

附俞琰

后稷遺嘉種。收來寶並珠。眼看一粒粟。貴賤命相須。

麥

明申時行

茫茫秀色挺來牟。片片黃雲似水流。風作跳波時隱見。雨添新漲乍沉浮。晴畦錦漾千層潑。寒隴濤生四月秋。却怪狂瀾頻起陸。漫教文偉賦中愁。

麥浪

明瞿佑

舉濤無際拍天浮。水氣生涼四月初。路隔隴頭高似岸。人騎牛背穩如舟。腥風只恐藏魚鼈。霜羽頻看起鷺鷥。滄海桑田何足怪。黃雲割盡見平時。

蠶豆

附張劭

白花翠莢傍畦低。桑女輕筐採更携。磊磊綠珠嵌鳳眼。紛紛紅袖剝香泥。麥連晚筍饒車響。聞

向新茶布穀歸。真味田家誇不少。熏風一頃夕陽西。

豇豆

宋蘇軾

綠畦過驟雨。細米小虹蜺。錦帶千條結。銀刀一寸齊。貧家隨飯熟。鉤客借糕題。五色南山豆。幾成桃李谿。

蔬部

題菜

元貢性之

西風吹動錦爛斑。曉起窺園露未乾。三日宿醒醒不得。正思風味到辛盤。

樹菜

宋蘇軾

秋來霜氣滿東園。蘆菰生兒芥有孫。我與何曾同一飽。不知何苦食鷄豚。

諸葛菜

附張劬

快來紫翠應炎精。野蔌能將大姓爭。花史標堪垂不朽。草廬種豈傍先生。分輩尚託躬耕意。匝

地空留割據情。已見敷榮徧吳魏。蜀都賦裏不須名。

紫芥

明吳寬

滿目爛斑布地來。春風驚見錦友堆。菜根作苦終嫌咬。若葉浮香是撥開。何處菟葵嗟競掘。昨朝馬蘭悔多栽。傳聞此種番邦致。用向中華亦楚材。

蓴菜

明徐桂

波心未吐心如結。水葉初齊葉尚含。脂似凝膚柔繞指。轉教風味憶江南。

蘆菔

元許有壬

性質宜沙地。栽培屬夏畦。熟登甘似芋。生薦脆如梨。老病消凝滯。奇功直品題。故園長尺許。青菜更堪齋。

嘗山藥

明銘崧

誰種山中玉。修圓故自勻。野人尋得慣。帶雨劚來新。味益丹田暖。香凝石髓春。商芝亦何事。空負白頭人。

謝姜寬送芋子

明費宏

芋魁相送滿筠籠。應念冰盤苜蓿空。此日蹲鴟真損惠。當年黃獨漫哀窮。蒸時不厭萌蘆爛。煨處還思楮柚紅。自是菜根滋味好。萬錢誰復羨王公。

王瓜

附張劭

匏葉藤花覆架涼。薦新老圃摘微黃。生逢是月先登曆。種出誰家却姓王。按節祇同苔菜秀。談禪聊共紫茄香。金齏玉蘆沽還賤。未必烏衣子愛嘗。

絲瓜

穿趙梅隱

黃花褪束綠身長。白結絲包困曉霜。虛瘦得來成一捻。剛偎人面染脂香。

薑

宋劉子翬

新芽肌理膩。曉日淨如空。恰似勻粧指。柔尖帶淺紅。

花椒

欣欣笑口向西風。噴出元珠顆顆同。採處倒含秋露白。晒時嬌映夕陽紅。調羹美著鹽齏上。塗

壁香凝漢殿中。鼎錄也。應知此味。莫教薑桂獨成功。

咏物詩選卷七

魏塘俞 琰長仁輯

花部

梅花

宋林 逋

衆芳搖落獨暄妍。占斷風情向小園。疎影橫斜水清淺。暗香浮動月黃昏。禽霜欲下先偷眼。粉蝶如知合斷魂。幸有微吟可相狎。不須檀板共金樽。

又

明高 啓

瓊枝只合在瑤臺。誰向江南處處栽。雪滿山中高士卧。月明林下美人來。寒依疎影蕭蕭竹。春掩殘香漠漠苔。自去何郎無好咏。東風愁絕幾回開。

又

縞袂相逢半是仙。平生水竹有深緣。將疎尚密微經雨。似暗還明遠在烟。薄暝山家松樹下。嫩

寒江店李花前。秦人若解當時種。不引漁郎入洞天。

又

唐李嘉祐

半落半開臨水岸。團情團思媚韶光。玉鱗寂寂飛斜月。素手亭亭對夕陽。

早梅

唐戎昱

一樹寒梅白玉條。迴臨村路傍溪橋。不知近水花先發。疑是經春雪未消。

紅梅

宋蘇軾

怕愁貪睡獨開遲。自恐冰容不入時。故作小紅桃杏色。尚餘孤瘦雪霜姿。寒心未肯隨春態。酒

又

元丁鶴年

姑射仙人鍊玉砂。丹光晴貫洞中霞。無端半夜東風起。吹作江南第一花。

綠萼梅

元謝宗可

萼綠仙人下玉堂。清魂夜化雪芬芳。荷衣薄襯霓裳冷。蘭珮濃薰薜荔香。曉顙浮酥凝淺黛。春

容點翠照新粧。多因誤入羅浮夢。愁絕黃昏鬢已蒼。

鴛鴦梅

兩兩魁春簇錦機。文禽夢覺月分輝。枝頭交頸接香煖。花底同心結子肥。金殿鎖煙粧粉額。玉堂環水浴紅衣。有情一種隨流去。莫被風飄各自飛。

岸上梅

唐崔魯

含情含怨一枝枝。斜壓漁家短短簷。惹袖尚餘香半日。向人如訴雨多時。初開偏稱雕梁畫。未落先愁玉笛吹。行客見來無去意。解帆煙浦為題詩。

蠟梅

宋楊萬里

天向梅梢別出奇。國香未許世人知。殷勤滴蠟纖封却。却被霜風折一枝。

桃花

唐太宗

禁苑春暉麗。花蹊綺樹粧。綴條深淺色。點露參差光。向日分千笑。迎風共一香。何如仙嶺側。獨秀隱遙芳。

又

唐李中

祇因紅杏是知音。灼灼偏宜間竹陰。幾樹半開金谷曉。一溪齊綻武陵春。豔舒香葉時皆重。子結千年事莫尋。誰步宋牆明月下。好香和影上衣襟。

又

唐羅隱

暖觸衣襟漠漠香。間梅遮柳不勝芳。數枝艷拂文君酒。半里紅欹宋玉牆。盡日無人應恨望。有時經雨更淒涼。舊山山下還如此。回首東風一斷腸。

又

唐白敏中

千朵濃芳倚樹斜。一枝枝綴亂紅霞。憑君莫厭臨風看。占斷春光在此花。

白桃花

附張勳

玉蝶爭來露井春。隔牆香動影難分。雪粧觀裏都清致。花映溪頭總練紋。綽約艷魂離倩女。風流新寡現文君。只愁人面重遊誤。一樹紅芳已化雲。

李花

唐李商隱

李徑獨來數。愁情相與懸。自明無月夜。強笑欲風天。減粉與圓籜。分香沾渚蓮。徐妃久已嫁。猶自玉為鉤。

又

宋汪洙

枝綴霜葩白。無言笑曉風。清芳誰是侶。色間小桃紅。

杏花

唐溫憲

園雪上晴梢。紅明映碧寥。店香風起夜。村白雨休朝。靜落猶如蒂。繁開正蔽條。淡然閒賞久。無以那嬌饒。

又

唐吳融

粉薄紅輕揜斂羞。花中占斷得風流。軟非因醉都無力。凝不成歌亦自愁。獨照影時臨水畔。最含情處出牆頭。徘徊盡日難成別。更待黃昏對酒甌。

梨花

金張建

畫樹高枝茁柔綢。嫩苞開破雪撻毬。碎粘粉紫鬚齊吐。潤卷丹黃葉半抽。月影曉窗留好夢。雨

聲深院。瑣清愁。瓊胞已實。香猶在。散入長安賣酒樓。

又

宋汪洙

院落沉沉曉。花開白雲香。一枝輕帶雨。淚濕貴妃粧。

次韻梨花

宋黃庭堅

桃花人面各相紅。不及天然玉作容。總向風塵塵裏染。輕輕籠月倚牆東。

又

宋秦觀

梁園雪盡已無餘。月鎖瑤枝冷自如。妬殺雙雙白燕子。故將春事往來輸。

左掖梨花

唐邱為

冷艷全欺雪。餘香乍入衣。春風且莫定。吹向玉堦飛。

山石榴花十二韻

唐白居易

燁燁復煌煌。花中無比方。艷天宜小院。條短稱低廊。本是山頭物。今為砌下芳。千叢相向背。萬朵互低昂。照灼連朱檻。玲瓏映粉牆。風來添瑟瑟。日出助晶光。漸綻臘脂萼。猶含琴軫房。離披

亂剪綠。斑駁未勻粧。絳燭燈千炷。紅裙妓一行。此時逢國色。何處覓天香。恐合裁金闕。思將獻玉皇。好差青鳥使。封作百花王。

海榴

唐溫庭筠

海榴開似火。先解報春風。葉亂裁腰綠。花宜插鬢紅。蠟珠攢作蒂。綃絲剪成叢。鄭驛多歸思。相期一笑同。

水林檎花

唐鄭谷

雨露一朝新。簾櫳曉景分。鮑和蜂蝶動。香帶管絃聞。笑擬春無力。粧濃酒漸醺。直疑風起夜。飛去替行雲。

桂

唐李嶠

未植銀宮裏。寧移玉殿幽。枝生無限月。花滿自然秋。俠客條爲馬。仙人葉作舟。願君期道術。攀折可淹留。

木犀

宋鄧肅

雨過西風作晚涼。連雲老翠入新黃。清風一日來天闕。世上龍涎不敢香。

又

宋朱淑貞

彈壓西風擅衆芳。十分秋色爲伊忙。一枝淡貯書窗下。人與花心各自香。

紅木犀

明瞿佑

滴露研朱染素秋。輕黃淡白總包羞。量空金粟知難買。擊碎珊瑚惜未收。仙友目傳丹竈術。狀元須作錦衣遊。一枝擬向嫦娥乞。管取花神暗點頭。

玉蘭

明陸樹聲

蕊龍芳樹雨初乾。樽酒花前洽笑歡。日晃簾櫳晴噴雪。風回齋閣氣生蘭。參差玉珮排空出。爛熳香鱗擁醉看。自是東君苦留客。莫教絃管易吹殘。

木蘭花

唐陸龜蒙

洞庭波浪渺無津。日日征帆送遠人。幾度未蘭船上望。不知原是此花身。

辛夷花

柳疎梅墮少春叢。天遠花神別致功。高處秾穠難避日。動時枝弱易爲風。堪將亂蕊添雲髻。若得千株便雪宮。不待羣芳應有意。等閒桃李即爭紅。

木筆花

唐吳融

嬾如新竹當初齊。粉膩紅輕樣可攜。誰與詩人假檻看。家于箋墨共分題。

山茶

明張新

胭脂染就錦裙襦。琥珀粧成赤玉盤。似共東風解相識。一枝先已透春寒。

白山茶

明瞿佑

消盡林端萬點霞。叢叢綠葉襯瑤華。寶珠買斷春前景。宮粉粧成雪裏花。餘子競傳丹竈術。此身甘傍玉川家。江頭梅樹無顏色。何似溪邊瑞草芽。

玉蕊花

唐王建

一樹龍蔥玉刻成。飄廊點地色輕輕。女冠夜覓香來處。唯見堦前碎月明。

紫薇花

明薛蕙

紫薇開最久。爛熳十旬期。夏日逾秋序。新花續故枝。楚雲輕掩冉。蜀錦碎參差。卧對山窗下。猶堪比鳳池。

又

明錢士升

深紫嫣紅出素秋。不粘皮骨自風流。猶憶翰林官署裏。雙雙蚪絲對南樓。

紫藤花

明王世貞

蒙茸一架自成林。窈窕繁葩灼暮陰。南國紅蕉將比貌。西陵松柏結同心。裁霞綴綺光相亂。剪雨縈煙態轉深。紫雪半庭長不掃。閒拋簪組對清吟。

海棠

唐鄭谷

春風用意勻顏色。銷得攜觴與賦詩。艷麗最宜新著雨。嬌嬈全在欲開時。莫愁粉黛臨窗懶。須信丹青點筆遲。朝醉暮吟看不足。羨他蝴蝶宿深枝。

又

宋宋祁

薄暝霞烘爛。平明露溼鮮。長余繡作地。密帳錦為天。

又

明張新

雨滋霞視入朱顏。月下疑從姑射還。最是春工多巧思。著將色在淺深間。

西府海棠

附張氏

似笑如顰百媚生。臨風映日態輕盈。西施舞罷添朝倦。妃子扶來帶宿醒。開處自堪誇絕世。落時誰不羨傾城。雖然一種天香少。子美無詩亦寡情。

垂絲海棠

明瞿佑

嫋嫋東風拂苑牆。天機呈巧織仙裳。玉欄斜搭酣春睡。銀燭高烧照晚妝。華屋雨寒愁緒亂。綺窗日暖唾茸香。詩成倘有纖毫補。願醉佳人錦瑟傍。

秋海棠

附張劭

滴滴胭脂短。叢叢飛來彩蝶占。牆東鴛鴦簪冷紅新點。蟋蟀欄低翠半籠。艷態不勝寒露裏。睡情多在月明中。莫教開近芙蓉殿。長信佳人怨守宮。

又

明陳石亭

露浥秋姿膩。風回宮袂涼。無緣被春色。猶得向秋陽。

又

明俞琬綸

春色先陰到海棠。獨留此種占秋芳。稀疏點綴猩紅小。堪佐黃花薦客觴。

白秋海棠

附闕 名

畫檻西偏小院東。草蟲鳴處茁芳叢。露零乍傳粧奩粉。風緊全消淚點紅。玉樹歌翻秋色裏。霓裳曲奏月明中。春花漫笑甘寥落。香氣氤氳自不同。

繡毬花

附張 劭

積雪玲瓏樹欲寒。艷陽偏得滿欄杆。多情粉蠟千枝繞。無數梅花一帶攢。露滴芳心愁宛轉。月移香影愛團圓。紅樓難禁風拋去。蚤付金鍼譜上看。

夜合花

唐元 稹

綺樹滿朝陽。融融有露光。雨多疑濯錦。風散似分粧。葉密烟蒙火。枝低繡拂牆。更憐當暑見。留咏日偏長。

槿花

唐李商隱

珠館熏蕙久。玉房梳掃餘。曉蘭才作濁。麝錦不成書。本以亭亭遠。翻嫌脉脉疎。回頭問殘照。殘照更空虛。

楊花

金邢安國

細點輕圓轉復飄。隋家堤岸瀟陵橋。非綿非絮寒無用。如雪如霜暖不消。狂惹客衣知有恨。巧尋禪榻故相撩。陂塘回首浮萍滿。依舊春風擺翠條。

牡丹

唐溫庭筠

水漾晴紅壓疊波。曉來金粉覆庭莎。裁成艷思偏應巧。分得春光數最多。欲綻似含雙靨笑。正繁疑有一聲歌。華堂客散簾垂地。想凭欄杆斂翠蛾。

又

唐羅隱

似共東風別有因。絳羅高捲不勝春。若教解語應傾國。任是無情亦動人。芍藥與君爲近侍。芙蓉何處避芳塵。可憐韓令功成後。辜負穠華過此身。

又

艷多烟重欲開難。紅蕊當心一抹檀。公子醉歸燈下見。美人朝起鏡中看。當庭始覺春風貴。帶雨方知國色寒。日晚更將何所似。太真無力凭欄杆。

追和白舍人咏白牡丹

唐徐寅

蓓蕾抽開紫綵囊。瓊葩薰出白龍香。裁分楚女朝雲片。剪破嫦娥夜月光。雪句豈須徵柳絮。粉腮應恨貼梅粧。檻邊幾笑東籬菊。冷折金風待降霜。

白牡丹

唐韋莊

閨中莫妬新粧婦。陌上須慚傅粉郎。昨夜月明渾似水。入門唯覺一庭香。

應制粉紅雙頭牡丹

金黨懷英

春意應嫌芍藥遲。一枝分秀伴雙蕤。並肩翠袖初酣酒。對鏡紅粧欲鬪奇。上苑風煙工獻巧。中天雨露本無私。更看散作人間瑞。萬里黃雲麥雨岐。

芍藥

唐張泌

清香粉淡怨殘春。蝶翅蜂鬚戀蕊塵。閒倚晚風生悵望。靜留遲日學因循。休將薜荔爲青鎖。好與蓮花作近鄰。零落若教隨暮雨。又應愁殺別離人。

又

唐韓愈

浩態狂香昔未逢。紅燈灩灩綠盤龍。覺來獨對情驚恐。如在仙宮第幾重。

瑞香

宋闕名

孕花簇粉烘晴日。鵲有濃香透遠風。六曲欄杆凝睇處。錦籠真是玉爲籠。

夾竹桃

明唐順之

桃竹舊傳分碧海。竹桃今見映朱欄。春至芳香能共遠。秋來花葉不同殘。疎英灼灼分叢發。密蕊菲菲對節攢。不信千年能結子。錯疑竹實待棲鸞。

茉莉花

宋朱子

曠然塵慮盡。爲對夕花明。密葉低層幰。冰蕤亂玉英。不因秋露溼。詎識此香清。預恐芳菲盡。微吟繞砌行。

又

碎剪玻璃簇晚芳。肯從素奈闕春光。翠移小樹來炎海。白放疎花過夕陽。竹几泉滋冰盞冷。紗幮風透瓦盆香。綰成一點珠毬好。添上鬟鬟浴後粧。

附張 劬

又

雖無鉅態驚羣目。幸有清光壓九秋。應是仙娥宴歸去。醉來掉下玉搔頭。

元江 奎

薔薇

唐朱慶餘

四面垂條密。重陰入夏清。綠攢傷手刺。紅墮斲腸英。粉着降鬢膩。光疑蝶翅明。雨中看亦好。況復值初晴。

又

唐陸龜蒙

倚牆當戶自橫陳。致得貧家不似貧。外布芳菲雖笑日。中含芒刺欲傷人。清香往往生遙夜。狂蔓看看及四鄰。遇有客來堪玩處。一端晴綺照烟新。

又

濃似猩猩初染素。輕於燕燕欲凌空。可憐細麗難勝日。照得深紅作淺紅。

玫瑰花

唐唐彥謙

爵柱騰清燦。鮫綃覆綠蒙。宮粧臨曉日。錦段落東風。無力春烟裏。多愁暮雨中。不知何處惹。深淺兩般紅。

司直巡官無諸移到玫瑰花

唐徐寅

芳菲移至越王臺。最是薔薇好並栽。穠艷盡憐勝綵繪。佳名誰贈作玫瑰。春成錦繡風吹折。天染瓊瑤日照開。為報朱衣早邀客。莫教零落委蒼苔。

月季花

宋韓琦

牡丹殊絕委春風。籊籊蕭疎怨晚叢。何似此花榮艷足。四時常放淺深紅。

酴醾

宋黃庭堅

漢宮嬌額半塗黃。入骨濃薰百合香。日色漸遲風力細。倚欄偷舞白霓裳。

又

金元好問

枕幃餘韻最清真。夢裏猶來著莫人。擬借濃陰作羅幕。玉纓多處卧殘春。

凌霄花

宋楊繪

直饒枝幹凌霄去。猶有根源與地平。不道花依他樹發。強攀紅日闌鮮明。

素馨花

宋陳傅良

羞將妾媚隨花譜。愛伴孤高上月評。獨恨遇寒成弱質。色香殊不遜梅兄。

芳蘭

唐太宗

春暉開禁苑。淑景媚蘭場。映庭含淺色。凝露浮光。日麗參差影。風傳輕重香。會須君子折。佩裏作芬芳。

蘭

宋劉克莊

深林不語抱幽貞。賴有微風遞遠馨。開處何妨依薜砌。折來未肯戀金瓶。孤高可挹供詩卷。素淡堪移入卧屏。莫笑門無佳子弟。數枝濯濯映堦庭。

並蒂蘭

元謝宗可

碧蕊連芳並萼擎。春風江浦對含情。不妨燕姁重占夢。應魂湘粟獨解清。霜節百年期共老。國香一點爲誰爭。詩人莫比雙蕖怨。幸有離騷日月明。

珠蘭

附張 劭

別從九畹認名蘭。蠟淚霏霏點翠紋。纔露鴈休連串採。已花恐作未開看。輕釵寶影搖金粟。纖手分香替玉盤。到戶客先知異種。薰風一縷麝臍寒。

掛蘭

元謝宗可

江浦烟叢困草萊。靈根從此謝栽培。移將楚畹千年恨。付與東君一縷開。湘女久無塵土夢。靈均舊是棟梁材。午窗試讀離騷罷。却怪幽香天上來。

菊

唐駱賓王

擢秀三秋晚。開芳十步中。分黃俱笑日。含翠共搖風。碎影涵流動。浮香隔岸通。金顰徒可汎。玉暈竟誰同。

又

唐李山甫

籬下霜前偶得存。忍教遲晚避蘭蓀。也消造化無多力。未受陽和一點恩。裁處不容依玉砌。玩時還許設金樽。陶潛沒後誰知己。霜滴幽叢見淚痕。

又

宋劉子翬

青叢蘂郁早抽穿。金蕊爛斑晚著花。秋意祇應宜淡泊。化工可是惜鉛華。輕烟細雨重陽節。曲檻疎籬五柳家。暮醉朝吟供採摘。更憐寒蝶共生涯。

和魯望白菊

唐皮日休

已過重陽半月天。瑤華千點照寒烟。蕊香亦似浮金鑊。花樣還如鍊玉錢。玩影密妃堪比艷。錄形蕭史好爭妍。無由摘向牙箱裏。飛上方諸贈列仙。

紅菊

元謝宗可

錦爛重陽節到時。繁花夢裏傲霜枝。晚香帶冷凝丹粒。秋色封寒點絳蕤。淡映殘紅迷老圃。濃拖斜照落東籬。靈砂換却淵明骨。倦倚西風不自知。

西施菊

明瞿佑

不惜金錢買冶容。移根應自館娃宮。西風冷落三秋後。故國繁華一笑中。戲蝶流連香徑晚。遊人悵望屨廊空。莫教野鹿偷銜去。留映蘇臺夕照紅。

秋菊有佳色

唐公乘億

陶令籬邊菊。秋來色更佳。翠攢千斤葉。金剪一枝花。蕊逐風鬚亂。英隨蝶翅斜。帶香飄綠綺。和酒上烏紗。散漫搖霜彩。嬌妍漏日華。芳菲彭澤見。稱更在誰家。

僧鞋菊

附張 劭

幾緡鮮濃帶露懸。相呼料是踏蘆年。一根風傍青蓮地。雙蕊應拈白足禪。石上有香深夜月。床頭無影脫秋烟。閒花也愛逃方外。不肯東籬伴醉眠。

芙蓉

唐高 蟾

天上碧桃和露種。日邊紅杏倚雲栽。芙蓉生在秋江上。不向東風怨後開。

木芙蓉

唐黃 滔

黃鳥啼煙二月朝。若教開即牡丹饒。天嫌青帝恩光盡。留與秋風雪寂寥。

又

宋王安石

水邊無數木芙蓉。露滴胭脂色未濃。正似美人初睡著。強撿清鏡照粧慵。

紅芙蓉

元蒲道源

豐肌弱骨與秋宜。宿酒酣來不自持。豈爲嚴霜成槁質。要憑初日發妍姿。燕姬入畫猶嫌陋。蜀錦團窠未足奇。獨對芳叢寄幽興。予高真是遇仙時。

賦得芙蓉出水

唐賈謨

的皪舒芳艷。紅姿映綠蘋。搖風開細浪。出沼媚清漣。翻影初迎日。流香暗襲人。獨披千葉淺。不競百花春。魚戲參差動。龜遊次第新。涉江如可採。從此免迷津。

蜀葵

唐徐寅

劍門南面樹。移向會仙亭。錦水澆花艷。岷山帶葉青。文君慚婉婉。神女讓娉娉。爛熳紅兼紫。飄香入繡局。

又

金姚孝錫

傾心知向日。布葉解承陰。空側黃金盞。誰人與對斟。

又

明占城使

花與木槿花相似。葉共芙蓉葉一般。五尺欄杆遮不盡。還留一半與人看。

秋葵

明錢士升

太陽豈是曾私照。何獨茲花感舊恩。日暮西風淒淡裏。依依猶欲送黃昏。

使院黃葵花

唐韋莊

薄粧新著淡黃衣。對捧金爐待醺時。四日似矜傾國貌。倚風如唱步虛詞。乍開檀柱疑聞語。試與雲和必解吹。為報同人看來好。不禁秋露即離披。

杜鵑花

唐吳融

春紅始謝又秋紅。息國亡來入楚宮。應是蜀冤啼不盡。更憑顏色訴西風。

虞美人

明瞿佑

劍血多年尚有神。楚歌聲裏弄殘春。迎風似舞腰肢細。帶雨如含淚眼顰。江畔烏騶空躑躅。宮

中人竈可悲。幸。青青只有明妃塚。長恨飄零作虜塵。

又

明孫齊之

薔薇開盡綠陰涼。西國名花此際芳。夜月空懸漢宮鏡。幽安猶帶楚宮粧。

剪春羅

宋翁元廣

誰把風刀剪薄羅。極知造化著功多。飄零易逐春光老。公子樽前奈若何。

金燈花

唐薛濤

欄邊不見叢叢葉。砌下唯翻艷艷叢。細視欲將何物比。曉霞初疊赤城宮。

玉燭花

唐劉兼

裊裊香焚三四枝。亭亭紅艷照堦墀。正當晚檻初開處。恰似春闌就試時。少女不吹方燭燐。東君偏惜未離披。夜深斜倚朱欄外。擬把鄰光借與誰。

萱花

唐李咸用

芳草比君子。詩人情有由。祇應憐雅態。未必解忘憂。積雨莎庭小。微風薜砌柔。莫言開太晚。猶

勝菊花秋。

又

宋石延年

移螢樹之背。丹霞間綠色。我有愛民心。對君忘不得。

石竹花

唐司空曙

一自幽山別。相逢此寺中。高低俱出葉。深淺不分叢。野蝶難爭白。庭榴暗讓紅。誰憐芳草色。春露到秋風。

洛陽花

唐闕名

五色紛披朶朶勻。數枝收盡洛陽春。應疑戲綠人猶在。化作斑斕錦片新。

金錢花

唐皮日休

陰陽為炭地為爐。鑄出金錢不用模。莫向人前逞顏色。不知還解濟人無。

玉簪花

明瞿佑

白露初凝氣候涼。花神獻寶助新粧。移來銀色三千界。壓盡金釵十二行。秋水為神冰是骨。龍

凝作炷。麝傳香。不須石上。愛磨折。長在佳人翠髻傍。

又

宋黃庭堅

宴罷瑤池阿母家。嫩瓊飛上紫雲車。玉簪墮地無人拾。化作東風第一花。

蛺蝶花

明唐順之

蜀地羅裁就。漆園夢始通。何言金翅色。翻在碧林中。未辨遺遙影。爭矜點綴工。採春蜂趁侶。啄蕊鳥啣蟲。易溼緣多粉。難飛詎少風。美人笑來撲。誤使損芳叢。

麗春花

宋張右史

梁苑花銷去。黃臺蚤自薰。不同罌子粟。別是石榴裙。婀娜纔勝掌。參差莫夢雲。王郎尋水竹。駐履幾殷勤。

紫竹花

宋晏殊

長夏幽居景不窮。花開芳砌翠成叢。窗南高卧追涼際。時有微香逗晚風。

鳳仙花

明瞿佑

高臺不見鳳凰飛。招得仙魂慰所思。秋露庭除蛩泣處。晚風簾落燕歸時。金盆夜搗聲相應。銀甲春生色更宜。好倩良工揮彩筆。寫成竹葉夾桃枝。

金鳳花

宋楊萬里

細看金鳳小花叢。費盡司花染作工。雪色白邊袍色紫。更饒深淺兩般紅。

雞冠花

附張 劭

霜後花晴發好姿。枝枝獨立媚秋輝。闌風有冑紅纓亂。啼月無聲翠羽垂。茅屋吐繁留看處。幽人側帽對談時。可知不羨雲中響。嘿伴山窗作守雌。

蓮花

明申時行

碧沼停寒玉。紅蕖映綠波。粧凝朝日麗。香逐晚風多。遊戲金鱗出。飛揚翠羽過。納涼依水榭。還續採蓮歌。

並頭蓮花

元魏 鵬

若耶溪裏萬紅芳。那似君家並蒂祥。韓壽醉醒殊態度。英皇濃淡各梳粧。徒勞畫史丹青手。漫

費詞人錦繡腸。向夜酒闌明月下。只疑神女伴仙郎。

池蓮

金完顏疇

輕輕姿質淡娟娟。點綴圓池亦可憐。數點飛來荷葉雨。暮香分得小江天。

白荷花

唐皮日休

素藕多蒙別詠欺。此花端合在瑤池。無情有恨何人見。月曉風清欲墜時。

新荷

唐李羣玉

田田八九葉。散點綠池初。嫩碧纔平水。圓陰已蔽魚。浮萍遮不合。弱荇繞猶疎。半在春波底。芳心卷未舒。

水仙花

明梁辰魚

幽花開處月微茫。秋水凝神黯淡粧。曉砌露濃空見影。隔簾風細但聞香。瑤臺夜靜黃冠濕。小洞春深玉珮涼。一段凌波堪畫處。至今詞賦憶陳王。

蓼花

唐鄭谷

簇簇復悠悠。年年拂漫流。差池伴黃菊。冷淡過清秋。晚帶鳴蟲急。寒藏宿鶯愁。故溪歸不得。憑仗繫漁舟。

朱蓼

明錢士升

柔條嫋嫋動朱顏。細雨微風日暮天。獨有蘆花堪作伴。絳霞蒼雪兩相憐。

又

附錢茶

臨風弱態靈和柳。照水酡顏銷恨花。更是夕陽漁艇外。蘋香露白助清華。

白蘋花

附俞琰

青青漾水鏡浮平。雪點繁葩照眼明。夜半月來風露冷。浪花一片認難清。

花部附錄

賦得花影

明王儊

欲拂更紛紛。空香寂不聞。亂迷芳蝶夢。輕護錦苔紋。襯月籠書幌。因風上舞裙。莫移庭下步。蹴

碎一堦雲。

歎落花

唐韋莊

一夜霏微露濕烟。曉來和淚喪嬋娟。不隨殘雪埋芳草。盡逐香風上舞筵。西子去時遺笑顰。謝娥行處落金鈿。飄紅墮白堪惆悵。少別穠華又一年。

落花

宋宋祁

隨絮翻紅各自傷。青樓烟雨忍相忘。將飛更作回旋舞。已落猶存半面粧。滄海月明珠迸淚。章臺人去骨遺香。可能無意傳雙蝶。盡付芳心與蜜房。

惜花

唐張泌

蝶散鶯啼尚數枝。日斜風定更離披。看多記得傷心事。金谷樓前委地時。

殘花

明邱雲霄

昨日看花花滿枝。今朝爛熳點清池。無情莫抱東風恨。作意開時是謝時。

木部

松

唐李山甫

地聳蒼龍勢抱雲。天教青共衆材分。孤標百尺雪中見。長嘯一聲風裏聞。桃李傍他真是佞。藤蘿攀爾亦非羣。平生相愛應相識。誰道修篁勝此君。

題子姪書院雙松

唐曹唐

自種雙松費幾錢。頓令院落似秋天。能藏此地新晴雨。却惹空山舊燒烟。枝壓細風過枕上。影籠殘月到窗前。莫教取次成開夢。使汝悠悠十八年。

貢院樓北新栽小松

唐錢衆仲

愛此凌霄幹。移來獨占春。貞心初得地。勁節始依人。晚月烟猶落。當軒色轉新。枝低無宿羽。葉淨不留塵。每與芝蘭近。常慚雨露勻。幸因逢顧盼。生植及茲辰。

小松

唐杜荀鶴

自小刺頭深草裏。而今漸覺出蓬蒿。時人不識凌雲木。知待凌雲始道高。

羅漢松

明屠隆

何年蒼叟住禪林。百尺婆娑萬壑陰。四果總求成佛印。一官原不受秦侵。靈根歲月踟躕久。老幹風霜西壁深。謾謾回廊響空谷。猶聞清夜海潮音。

古柏

唐李洞

手植知何代。年齊偃蓋松。結根生別樹。吹子落鄰峯。古幹經龍嗅。高烟過雁銜。可佳繁葉盡。聲不礙秋鐘。

檜樹

唐秦韜玉

翠雲交結瘦輪囷。瀟雨吟風幾百春。深蓋屈盤青壓尾。老皮張展黑龍鱗。唯堆寒色資琴興。不放秋聲染俗塵。歲月如波事如夢。竟留蒼翠待何人。

題中峯杉徑

宋朱子

盤回山腹轉修蛇。橫入中峯小隱家。好把緝杉緣徑播。待迎涼月看清華。

榆錢

附張 劭

五銖鑽火治清明。散作飛埃萬箇輕。歷歷還青天有色。蕭蕭搖綠葉無聲。根疑泉府偷靈氣。樹笑銅山街富名。遙集一囊看不得。飄零空買路傍情。

又

宋孔平仲

鏤雪裁銷箇箇圓。日斜風定穩如穿。憑誰細與東君說。買住青春費幾錢。

槐

唐羅 鄴

行宮門外陌銅駝。兩岸分栽此最多。欲到清秋近時節。爭開金蕊向關河。層樓寄恨飄珠箔。駿馬嘶香撼玉珂。愁殺江河隨計者。年年為爾賸奔波。

又

唐翁承贊

雨中粧點望中黃。勾引蟬聲送夕陽。憶昔當年隨計吏。馬蹄終日為君忙。

桐

唐李 嶠

孤秀嶧陽岑。萋萋出衆林。春光雜鳳影。秋月弄玄陰。高映龍門迥。雙依玉井深。不因將入鑿。誰

為作鳴琴。

孤桐

唐雍陶

疎桐餘一幹。風雨日蕭條。歲晚琴材老。天寒主葉凋。已悲根半死。復恐尾全焦。幸在龍門下。知音肯寂寥。

高楠

唐杜甫

楠樹色冥冥。江邊一蓋青。近根開藥圃。接葉置茅亭。落景陰猶合。微風韻可聽。尋常絕醉困。卧此片時醒。

石楠

唐白居易

可憐顏色好陰涼。葉剪紅牋花撲霜。傘蓋低垂金翡翠。黃龍亂搭繡衣裳。春芽細柱千燈焰。夏蕊濃焚百和香。見說上林無此樹。只教桃李占年芳。

楸樹

唐韓愈

幾歲生成為大樹。一朝纏繞困長藤。誰人與脫青羅帳。看吐高花萬萬層。

冬青樹

唐許渾

雪霰不凋色。兩株交石壇。未秋紅實淺。經夏綠陰寒。露重蟬鳴急。風多鳥宿難。何如西禁柳。暗舞玉欄杆。

桑

明于謙

一年兩度伐枝柯。萬木叢中苦最多。為國為民皆是汝。却教桃李聽笙歌。

欒樹

唐徐仲雅

葉似新蒲綠。身如亂錦纏。任君千度剝。意氣自衡天。

梔子

唐杜甫

梔子比衆木。人間誠未多。於身色有用。與道氣相和。紅取風霜實。青看雨露柯。無情移得汝。貴在映江波。

木瓜

附張劭

瓠落秋山未滿林。茆齋投我比雙金。釀成且健看花步。啄罷空存報孝心。傍枕香濃憐夜暖。堆

盤色久驗霜深。近來碩果留無幾。珍重東陵此素馨。

柳

唐李商隱

動春何限葉。撼曉幾多枝。解有相思苦。應無不舞時。絮飛藏皓蝶。帶弱露黃鵲。傾國宜通體。誰來獨賞眉。

又

唐唐彥謙

春思春愁一萬枝。遠村遙岸寄相思。西園有雨和苔長。南內無人拂檻垂。遊客寂寥絳遠恨。暮鶯啼叫惜芳時。晚來飛絮如霜鬢。恐為多情管別離。

又

唐釋慕幽

今古憑君一贈行。幾回折盡復重生。五株斜傍澗明宅。千樹低垂太尉營。臨水帶烟藏翡翠。倚風兼雨宿流鶯。隋皇陵上依依在。曾惹當時歌吹聲。

又

唐王十朋

東君於此最鍾情。粧點卽卽入畫屏。向我無言眉自展。與人非故眼垂青。縈牽別恨絲千尺。斷

送春光絮一庭。葉底黃鸝音更好。隔溪烟雨醉時聽。

又

唐賀知章

碧玉粧成一樹高。萬條垂颺綠絲絛。不知細葉誰裁出。二月春風似剪刀。

又

唐鄭谷

半烟半雨江橋畔。映杏映桃山路中。會得離人無限意。千絲萬絮惹春風。

楊柳枝詞

唐劉禹錫

腸帝行宮汴水濱。數枝殘柳不勝春。晚來風起花如雪。飛入宮牆不見人。

又

輕盈嫋娜占年華。舞樹粧樓處處遮。春盡絮飛留不得。隨風好去落誰家。

柳邊

唐杜甫

只道梅花發。誰知柳亦新。枝枝總到地。葉葉自開春。紫燕時翻翼。黃鸝不露身。溪南應老盡。上遠愁人。

竹

綠竹半含箨。新梢才出牆。色侵書帙晚。陰過酒樽涼。雨洗娟娟秀。風吹片片香。但令無剪伐。會見拂雲長。

又

唐鄭谷

宜烟宜雨又宜風。拂水藏邨復間松。移得蕭騷從遠寺。洗來疎淨見前峯。侵階蘚折春芽迸。繞徑莎微夏蔭濃。無賴杏花多意緒。數枝穿翠好相容。

又

唐李建勳

瓊節高吹宿鳳枝。風流交我立忘歸。最憐瑟瑟斜陽下。花影相和滿客衣。

庭竹

唐李中

偶自山僧院。移歸傍砌栽。好風終日起。幽鳥有時來。篩月牽詩興。籠烟伴酒杯。南窗睡輕起。蕭颯雨聲回。

新竹

唐元稹

新篁纔解箨。寒色已青葱。冉冉偏疑粉。蕭蕭漸引風。扶疎多透日。寥落未成叢。唯有團圓節。堅貞大小同。

又

唐劉謙

近窗卧砌兩三叢。佐靜添幽別有功。影鏤碎金初透月。聲敲寒玉乍搖風。無憑費叟烟波碧。莫信湘妃淚點紅。自是子猷偏愛汝。虛心高節雪霜中。

長竹

唐陳陶

青嵐帶亞思君祖。綠潤高枝憶蔡邕。長聽南園風雨夜。恐生鱗甲盡為龍。

斑竹

附俞琰

情根萬劫總難消。帝女餘悲寄碧條。亦有懷人千點淚。盈盈滴作海棠嬌。

筍

宋王元之

數里春畦獨自尋。迸犀抽錦亂森森。田文死去賓朋散。拋擲三千璫瑁簪。

謝劉仲行惠筍

宋朱子

誰寄寒林新屬筍。聞查喜見白參差。知君調我酸寒甚。不是封侯食肉姿。

木部 附錄

紅樹

唐吳融

一聲南雁已先紅。滅滅淒淒葉葉同。自是孤根非暖地。莫驚他木耐秋風。曉烟散去陰全薄。明月臨來影半空。長憶洞庭千萬樹。照山橫浦夕陽中。

枯樹

唐韓愈

老樹無枝葉。風霜不復侵。腹空人可過。皮剝蟻還尋。寄托惟朝菌。依投絕暮禽。猶堪待改火。未肯但空心。

賦得江邊樹

唐魚元機

草色迷荒岸。烟姿入遠樓。葉鋪秋水面。花落釣人頭。根老藏魚窟。枝低繫客舟。蕭蕭風雨夜。驚夢復添愁。

河邊枯木

唐長孫佐輔

野火燒枝水洗根。數圍枯朽半心存。應是無機承雨露。却將春色寄苔痕。

紅葉

唐吳融

露染霜乾片片輕。斜陽照處轉烘明。和烟飄落尤秋色。隨浪泛將千里情。幾夜月中藏鳥影。誰家庭際伴蛩聲。一時衰飒無多恨。看著春風剪綠成。

落葉

唐僧修睦

雨過閒田地。重重落盡紅。翻思向春日。肯信有秋風。幾處隨流水。何邊亂暮空。祇應松自立。而不與君同。

葉落

唐吳融

紅影飄來翠影疎。一辭林表不知歸。伴愁無色烟猶在。替恨成啼露未晞。若逐水流應萬里。莫因風起便孤飛。楚郊千樹秋聲急。日暮紛紛惹客衣。

綠陰

元謝宗可

萬樹東風湧翠濶。遮藏芳恨料應難。入簾蒼靄暮春晚。滿地碧雲清晝寒。柳暗池臺烟乍溼。桃深門巷雨初乾。階前花落無人到。又染苔痕上石欄。

草部

春草

明楊基

嫩綠柔香遠更濃。春來無處不茸茸。六朝舊恨斜陽裏。南浦新愁細雨中。近水欲迷歌扇綠。隔花偏襯舞裙紅。平川十里人歸晚。無數牛羊一笛風。

曲江春草

唐鄭谷

花落江堤簇暖烟。雨餘江色遠相連。香輪莫碾青青破。留與遊人一醉眠。

芳草

唐羅鄴

芳草和烟暖更青。開門要路一時生。年年點簡人間事。唯有春風不世情。

庭草

唐杜甫

楚草經寒別。庭春入眼濃。舊低收葉舉。新偃捲芽重。步履宜輕過。開筵得屢供。看花隨節序。不敢強爲容。

吉祥草

宋王元章

得名良不惡。瀟灑在山房。生意無休息。存心固久長。風霜徒自老。蜂蝶爲誰忙。歲晚何人問。山空暮雨荒。

鳳尾草

儀想虞庭遠。音傳岐麓高。楚狂歌自發。尼父歎空勞。宛轉開雙眼。飄飄見九苞。南州多鳳侶。應更瑞生毛。

寄生草

明瞿佑

要路閒門雨不過。生來唯戀舊枝柯。似嫌樹底泥塗滑。應愛梢頭雨露多。冉冉欲遮螻蛄穴。萋萋得近鳳凰窠。教坊樂府多新製。傳得佳名入詠歌。

書庭蕉

明王守仁

簷前蕉葉綠成林。長夏全無暑氣侵。但得雨聲連夜靜。何妨月色半床陰。新詩舊葉題將遍。老
艾疎桐恨轉深。莫笑鄭人談訟鹿。至今醒夢兩難尋。

蕉葉

唐徐寅

綠綺新裁織女機。擺風搖日影離披。只因青帝行春罷。閒倚青牆半翠旗。

菖蒲

明解縉

三尺青青古太阿。舞風斬碎一川波。長橋有影蛟龍懼。流水無聲蜃夜磨。兩岸帶烟生殺氣。五
更彈雨和漁歌。秋來只恐西風起。銷盡鋒稜怨奈何。

老少年

附張劭

翠飛彩掌出苔斑。如葉如花映晚山。餐盡風霜成冶質。養從蕭瑟返紅顏。微陽巧挽長春住。小
草私將大造還。笑我愁根空自種。欲憑青女手全刪。

雁來紅

明周子羽

翔雁南來塞草秋。未霜紅葉已先愁。綠珠宴罷歸金谷。七尺珊瑚夜不收。

蘆

唐羅鄴

如練如霜乾復輕。西風處處拂江城。長垂釣叟看不足。暫泊王孫愁亦生。好傍翠樓裝月色。枉隨紅葉舞秋聲。最宜羣鷺斜陽裏。閒捕纖鱗傍爾行。

蘆花

明徐燉

江畔洲前白渺茫。蕭蕭撼撼闌秋光。輕風亂掃漫天雪。斜月微添隔岸霜。半夜雁羣清避影。數聲漁笛淡吹香。瓊枝玉樹分明見。愁絕懷人水一方。

蒲

唐徐寅

濯秀盤根在碧流。紫莢含露向晴抽。鵝為紉履隨君步。織作輕帆送客愁。疎葉稍為投餌釣。密叢還礙採蓮舟。鴛鴦鶼鶒多情甚。日日雙雙繞傍遊。

萍

唐陸龜蒙

曉來風約半池明。重疊侵沙綠屬成。不用臨池重相笑。最無根帶是浮名。

苔

唐李成用

幾年風雨跡。疊在石孱顏。生處景長靜。看來情儘閒。吟亭侵壞壁。藥院掩空關。每憶東行徑。移筇獨自還。

又

唐徐寅

印留麋鹿野禽踪。巖壑漁磯處處逢。金谷曉凝花影重。章臺春影柳陰濃。石橋羽客遺前跡。陳閣才人沒舊容。歸去掃除階砌下。蘚痕殘綠一重重。

苔錢

唐鄭谷

春紅秋紫繞池臺。箇箇圓同濟世財。雨後無端滿窮巷。買花不得買愁來。

春苔

唐李中

春霖催得鎖烟濃。竹院莎齋徑小通。誰愛落花風味處。莫愁門巷襯殘紅。

垣衣

唐李得

漠漠復霏霏。為君垣上衣。昭陽葦下草。應笑此生非。晻靄青春去。蒼茫白露稀。猶勝萍逐水。流浪不相依。

咏物詩選卷八

魏塘俞 琰長仁輯

禽部

鳳

棲跡依丹穴。尊為百鳥王。九苞昭聖瑞。五色備文章。屢向秦臺側。頻過碓水陽。鳴岐今日見。阿閼佇來翔。

孔雀

唐李 郢

越鳥青春好顏色。晴軒入戶看貼衣。一身金翠畫不得。萬里山川來者稀。絲竹慣聽時獨舞。樓臺初上欲孤飛。刺桐花謝芳華歇。南國同巢應望歸。

鶴

唐李 嶠

黃鶴遠聯翩。從鷺下紫烟。翱翔一萬里。來去幾千年。已憩青田側。時遊丹禁前。莫言空警露。猶

冀一聞天。

又

唐鄭谷

一自王喬放自由。俗人行處懶回頭。睡輕旋覺松花墮。舞罷閒聽澗水流。羽翼光明欺積雪。風神洒落占高秋。應嫌白鷺無仙骨。長伴漁翁宿葦洲。

又

唐褚載

欲洗霜翎下澗邊。却嫌菱刺污香泉。沙鷗浦雁應驚訝。一舉扶搖直上天。

獨鶴

唐韋莊

夕陽灘上立徘徊。紅蓼風前雪翅開。應為不知棲宿處。幾回飛去又飛來。

病鶴

唐項斯

青雲有意力猶微。豈料低回得那依。幸念翅因風雨困。豈教身陷稻粱肥。曾遊碧落寧無侶。見有清池不忍飛。縱使他年引仙駕。主人恩在亦應歸。

雁

唐鄭谷

八月悲風九月霜。蓼花紅淡葦條黃。石頭城下波搖影。星子灣西雲間行。驚散漁家吹短笛。失羣征戍鎖殘陽。故鄉聞爾亦惆悵。何況扁舟非故鄉。

新雁

唐吳融

湘浦春深始北歸。玉關搖落又南飛。數聲飄去和秋色。一字橫來背晚暉。紫閣高飛雲霧裏。瀟川低渡雨微微。莫從思婦臺邊過。未得征人萬里衣。

早雁

明高棅

涼露八月塞天寒。飛渡衡陽楚水寬。少婦樓頭初掩瑟。一行先向夕陽看。

白雁

元謝宗可

翅老西風點綴瑕。秋江難認宿蘆花。雲邊字缺銀鉤斷。月下筇閒玉柱斜。影亂飛鷗回遠浦。聲迷宿鵲落平沙。聲聲叫起蘇郎恨。為帶吳霜染鬢華。

孤雁

唐杜甫

孤雁不欲啄。飛鳴聲念羣。誰憐一片影。相失萬重雲。望盡似猶見。哀多如更聞。野鷗無意緒。鳴

噪自紛紛。

又

唐崔塗

幾行歸去盡。片影獨何之。暮雨相呼失。寒塘獨下遲。渚雲低暗度。關月冷遙隨。未必逢繒繳。孤飛自可疑。

雁字

元謝宗可

蘼花月底寄秋情。陣影南飛勢不停。一畫寫開湘水碧。數行草破楚天青。雲箋冷印蟲書跡。烟墨濃摹鳥篆形。題盡子卿心事苦。斷文無數落寒汀。

又

不藉蒙恬筆力嘉。數行書破楚天涯。風前過處真連草。月下歸來整復斜。硯水半泓迷霧雨。錦箋千尺掛雲霞。分明寫出瀟湘景。懊惱連翩又落沙。

京兆府試出籠鵲

唐濮陽璿

玉鐙分花袖。金鈴出彩籠。搖心長捧日。逸翮鎮生風。一點青霄裏。千聲碧落中。星眸隨狡兔。霜

爪落飛鴻。每念提攜力。常懷搏擊功。以君能惠好。不敢沒遙空。

白海青

元袁易

渺渺東溟刷羽翰。乍隨天馬萬人觀。孤飛雪點青雲破。一擊秋生玉宇寬。賜予豈將追雁鷺。驅除直欲辨臯鷺。江南明月難同色。夢想瑤臺白露圓。

鷹

明申時行

何處蒼鷹掣錦條。霜林颯颯洒寒毛。攫身萬里雲霄迥。側翅三秋殺氣高。狡兔還應愁窟穴。鸞鵠那敢決蓬蒿。聖朝祝網開三面。搏擊何須借爾曹。

又

唐高越

雪爪星眸世所稀。摩天專待振毛衣。虞人莫漫張羅網。未肯平原淺草飛。

雉

唐李嶠

白雉振朝飛。聲來表太平。焚郊疑鳳出。陳寶若雞鳴。童子懷仁至。中郎作賦成。冀君看飲啄。耿介獨含情。

鳥

日落歸飛急。霜臺夕影寒。連翩依月樹。迢遞繞風竿。白首何年改。清琴比夜彈。靈臺如可託。千里向長安。

歸鴉

明高啓

啞啞噪夕暉。爭宿不爭飛。未逐冥鴻去。長先野鶴歸。荒村流水遠。古戍淡煙微。借問寒林樹。何枝最可依。

鷓鴣

唐鄭谷

暖戲煙蕪錦翼齊。品流應得近山雞。雨昏青草湖邊過。花落黃陵廟裏啼。遊子乍聞征袖溼。佳人唱翠眉低。相呼相喚湘江浦。苦竹叢深春日西。

又

唐元叟

背霜南雁不到處。倚棹北人初聽時。梅雨滿江春草歇。一聲聲喚荔枝枝。

子規

唐吳融

舉國繁華委逝川。羽毛飄蕩一年年。他山叫處花成血。舊苑春來草似煙。雨暗不離濃綠樹。月斜長弔欲明天。湘江日暮聲淒切。愁殺行人歸去船。

又

唐雍陶

蜀國春城聞蜀鳥。思歸聲引未歸心。卻知夜夜愁相似。爾正啼時我正吟。

鵲

唐徐寅

神化難源瑞即開。雕陵毛羽出塵埃。香閨報喜行人至。碧漢填河織女回。明月解隨烏繞樹。青銅寧愧雀為臺。瓊枝翠葉庭前植。從待翩翩去又來。

鸚鵡

唐杜甫

鸚鵡含愁思。聰明憶別離。翠衿渾短盡。紅背漫多知。未有開籠日。空慚宿舊枝。世人憐復損。何用羽毛奇。

又

明高岱

一入深籠損翠衣。隴雲秦樹事全非。月明萬里歸心切。花落千山舊侶稀。棲傍玉樓春盡夢。

回金鎖曙光微。翩翩海燕羣相逐。簾幙東風得意飛。

白鸚鵡

附張 劭

不借禽王彩。貴身雪身娘子自精神。能歌紅嘴爭樊素。學舞霓裳傍太真。棲穩玉樓花外雨。夢殘珠樹隴頭春。新來念得觀音號。莫倚聰明又罵人。

畫眉鳥

小鳥平分倒暈名。淡黃杏子刷雙翎。雕龍妬伴因爭嫵。粧闥催人欲掃青。嫩柳梢頭憐自立。遠山樓上喚誰聽。前身應記張京兆。叫碎花陰月滿庭。

又

宋文 同

盡日開窗坐好風。一聲初聽下高籠。公亭事簡人皆散。如在千巖萬壑中。

又

明范 言

寶瑟蓬鬆錦帳垂。曉晴慵起闌花枝。濃粧未必能承寵。何事幽禽喚畫眉。

鶯

唐羅 鄴

暖辭雲谷背殘陽。飛下東風翅漸長。卻笑金籠是羈絆。豈知瑤草正芬芳。曉逢溪雨投紅樹。晚
轉宮樓泣舊粧。何處離久不堪聽。滿橋斜日象垂楊。

又

唐僧貫休

何處經年絕好音。暖風吹出嚳喬林。羽毛新刷陶潛菊。喉舌初調叔夜琴。藏雨並棲紅杏密。避
人雙入綠楊深。曉來枝上千般語。應共桃花說舊心。

黃鶯

唐鄭谷

春雲薄薄日輝輝。宮樹烟聲隔水飛。應為能歌擊仙籍。麻姑乞與女真衣。

聽宮鶯

唐王維

春樹繞宮牆。春鶯嚳曙光。忽驚煙柳斷。移處弄還長。隱葉棲承露。攀花出未央。遊人未應返。為
此故思鄉。

燕

唐鄭谷

年去年來來去忙。春寒煙暝渡瀟湘。低飛綠岸和梅雨。亂入紅樓掠杏梁。閒几硯中窺水淺。落

花徑裏得泥香。千言萬語無人會。又逐流鶯過短牆。

又

唐泰韜玉

不知大廈許棲無。頻已銜泥到座隅。曾與佳人並頭語。幾回拋却繡工夫。

白燕

明袁凱

故國飄零事已非。舊時王樹見應稀。月明湘水初無影。雪滿梁園尚未歸。柳絮池塘香入夢。梨花庭院冷侵衣。趙家姊妹多相妬。莫向昭陽殿裏飛。

又

明瞿佑

脫卻烏衣絕點埃。銀屏珠箔舊生涯。玉京老去粧初改。王樹歸來鬢已華。避雨有時沾柳絮。夢雲何處認梨花。飛瓊不向瑤臺去。却入尋常百姓家。

睡燕

元謝宗可

補巢啼罷落花泥。困頓東風倦翼低。金屋畫長隨蝶化。雕梁春靜怕鶯啼。魂飛漢殿人應老。夢入烏衣路轉迷。卻怪捲簾人喚醒。小橋深巷夕陽西。

新燕

元張安範

海棠開後月黃昏。玉樹樓臺寂寂春。柳外東風花外雨。香泥高壘畫堂新。

歸燕

不為避霜雪。其如儔侶稀。四時無失序。八月自知歸。春色豈相訪。衆雛還識機。故巢尚未毀。會傍主人飛。

燕雛

唐杜甫

掠水身猶重。依風力尚微。元苔難定立。簷雨忽喧歸。未識重溟遠。先愁一葉飛。啣泥在他日。兩兩占春暉。

百舌

唐杜甫

百舌來何處。重重祇報春。知音兼衆語。整翮豈多身。花密藏難見。枝高聽轉新。過時如發口。君側有讒人。

又

唐王維

上蘭門外草萋萋。未央宮中花裏棲。亦有相隨過御苑。不知若個向金堤。入春解作千般語。拂曙能先百鳥啼。萬戶千門應覺曉。建章何必聽鳴雞。

春鳩

唐溫憲

村南微雨新。平綠靜無塵。散睡桑條暖。閒鳴屋脊春。遠聞和曉夢。相應在諸鄰。行樂花時節。追飛見亦頻。

白鷁

唐徐寅

舉翼凌空碧。依人到大邦。粉翎棲畫閣。雪影拂瓊窗。振鷺堪為侶。鴈鳩好作雙。狎鷗歸未得。翹爾憶晴江。

雀

唐李嶠

大廈初成日。嘉賓集杏梁。銜書表周瑞。入幕應王祥。暮宿空城裏。朝遊流水旁。願齊鴻鵠志。希逐鳳凰翔。

又

宋李觀

繡戶珠簾見最頻。暖來寒去但安身。翟公門下時飛入。全勝交情見慣人。

花上白頭翁

明王 綬

欲訴芳心未肯休。不知春色去難留。東君亦是無情物。莫向花間怨白頭。

戴勝

唐賈 島

星點花冠道士衣。紫陽宮女化身飛。能傳上界春消息。若到蓬山莫放歸。

啄木

唐朱慶餘

丁丁向晚急還稀。啄徧庭槐未肯歸。終日與君除蠹害。莫嗔無事不平飛。

桐花鳥

唐僧可朋

五色毛衣比鳳雛。深花叢裏祇如無。美人買得偏憐惜。移向金釵重幾銖。

鴛鴦

唐崔 珣

翠鬣紅毛舞夕暉。水禽情似此禽稀。暫分煙鳥猶回首。只渡寒塘亦共飛。耿霧盡迷珠殿瓦。逐梭齊上玉人機。採蓮無限蘭橈女。笑指中流羨爾歸。

又

寂寂春塘煙晚時。兩心和影共依依。溪頭日暖眠沙穩。渡口風寒浴浪稀。翡翠莫誇鏡彩飾。鸕鶿須羨好毛衣。蘭深芷密無人見。相逐相呼何處歸。

又

紅閒碧靜霽煙開。錦翅雙飛去又回。一種相連名字好。盡緣人恨別離來。

鷗

唐杜甫

江浦寒鷗戲。無他亦自健。却思翻玉羽。隨意點青苗。雪暗還須落。風生一任飄。幾羣滄海上。清影日蕭蕭。

白鷗

唐陸龜蒙

慣向溪頭漾淺沙。薄煙微雨足生涯。時時失伴沉山影。往往爭飛雜浪花。晚樹清涼還鷗鴨。舊巢零落寄蒹葭。池塘信美應難戀。針在魚唇劍在蝦。

池上雙鳬

唐吳融

雙鳬狎得傍池臺。戲藻啣蒲遠又回。敢為稻梁凌險去。幸無鷹隼逐波來。萬絲春雨眠時亂。一片濃萍浴處開。不在籠間夜仍好。月汀星沼勝徘徊。

雙白鷺

唐雍陶

雙鷺應憐水滿池。風飄不動頂垂絲。立當青草人先見。行傍白蓮魚未知。一足獨拳寒雨裏。數聲相叫早秋時。林塘得爾須增價。況與詩家物色宜。

鷺

唐鄭谷

閒立春塘煙淡淡。靜眠寒葦雨颼颼。漁翁歸後沙汀晚。飛下灘頭更自由。

又

唐杜牧

雪衣雪髮青玉嘴。羣捕魚兒溪影中。鷺飛遠映碧山去。一樹梨花到晚風。

鷓鴣

唐唐彥謙

一宿南塘煙雨時。好風搖動綠波微。驚離曉岸衝花去。暖下春汀照影飛。華屋撚絃彈歌舞。綺窗含筆淡毛衣。畫屏見後長回首。爭得雕籠莫放歸。

鷓鴣

唐杜牧

芝莖抽紺趾。清淚擲金梭。日翅開張錦。風池去罨羅。靜眠依翠荇。暖戲折高荷。山陰豈無爾。請字換羣鵝。

翡翠

唐僧齊己

水邊飛去青難辨。竹裏歸來色一般。磨吻鷹鷂莫相害。白鷗紅雁滿沙灘。

水鳥

唐吳融

煙爲行止水爲家。兩兩三三睡暖沙。爲謝離鸞兼別鶴。如何禁得向天涯。

雞

唐徐寅

名參十二宿。花入羽毛深。守信催朝日。能鳴送曉陰。峨冠裝瑞玉。利爪削黃金。徒有稻粱感。何由報德音。

鬬雞

明瞿佑

五德稱名不自持。怒慙爪嘴決雄雌。三郎好勝真英主。亞子爭強豈小兒。兩陣猛如劉項敵。一

場喜入孟韓詩。紅羅纏項收功後。贏得旁觀舉酒卮。

雞鳴

唐汪遵

金距花冠傍舍棲。清晨相叫一聲齊。開關自有馮生計。不必天明待汝啼。

雞雛

明瞿佑

穀分混沌見精神。鳳侶鸞儔暫化身。傍母浴沙花徑午。隨羣啄粟草堂春。饒縮屋後垂涎久。饑鷄天邊側目頻。羽翼漸成文彩備。不陪談論亦司晨。

花鴨

唐杜甫

花鴨無泥滓。階前獨緩行。羽毛知獨立。黑白太分明。不覺羣心妬。休牽衆眼驚。稻梁沾汝在。作意莫先鳴。

鵝

唐李商隱

眠沙臥水自成羣。曲岸殘陽極浦雲。那解將心憐孔雀。羈雌長共故雄分。

舟前小鵝兒

唐杜甫

鵝兒黃似酒。對酒愛新鵝。引頸噴船逼。無行亂眼多。翅開遭宿雨。力小困滄波。客散層城暮。孤狸奈若何。

獸部

麟

唐李嶠

漢祀應祥開。魯郊西狩迴。奇音中鐘呂。成角喻英才。畫像臨仙閣。藏書入帝臺。若驚能吐哺。為待鳳凰來。

獅

明夏言

金眸玉爪目懸星。羣獸聞知盡駭驚。怒懾熊羆威凜凜。雄驅虎豹氣英英。曾聞西國常馴養。今出中華應太平。却羨文殊能服爾。穩騎駕馭下天京。

象

唐李白

神象何年至。傳聞自戰場。齒能齊玉德。性不受金枷。白足跏趺坐。黃門拜舞行。越人歸駕馭。未

許身亭狂。

虎

元於汝玉

班寅贏得號將軍。月黑深山星目分。長嘯一聲風括地。雄跳三勵獸奔羣。不堪羊質披文炳。無奈狐行假皎熏。蜚毒由來人共憚。豈知更有猛於君。

豹

唐李嶠

車法肇宗周。黷文闡大猷。還將君子愛。來繼太公籌。委質超羊羣。飛名列虎侯。若令逢雨露。長隱南山幽。

熊

導洛宜陽右。乘春別館前。昭儀忠漢日。太傅翊周年。列射三侯滿。興師七步旋。莫言舒紫褐。猶異飲清泉。

紫騮馬

唐沈佺期

青玉紫騮鞍。驕多影屢盤。荷君能剪拂。蹀躞噴桑乾。踰足追奔易。長鳴過賞難。提金一萬里。霜

露不辭寒。

又

渥洼奇骨本難求。況是豪家重紫駟。臆大宜懸銀壓勝。力渾欺著玉銜頭。猙獰弄影風隨步。蹀躞銜塵汗滿鞵。若遇丈夫能控馭。任從騎取覓封侯。

唐秦韜玉

驄馬

唐萬楚

金絡青驄白玉鞍。長鞭紫陌野遊盤。朝驅東道塵恆滅。暮到河源日未闌。汗血每隨邊地苦。蹄傷不憚隴陰寒。若能一飲長城窟。為報天山行路難。

觀內廐馬

明曾棨

繡勒雕鞍七寶裝。天閑十二見飛皇。行驂驚輅隨仙仗。嘶過龍樓識御香。玉轡按時經細柳。錦條控處獵長楊。虎文鳳臆真無匹。浪說周家八駿良。

房兵曹胡馬

唐杜甫

胡馬大宛名。鋒棱瘦骨成。竹批雙耳峻。風入四蹄輕。所向無空闊。真堪托死生。驍騰有如此。萬

里可橫行。

病馬

乘爾亦已久。天寒關塞深。塵中老盡力。歲晚病傷心。毛骨豈殊衆。馴良猶至今。物微意不淺。感動一沉吟。

天馬詞

唐張仲素

蹀躞宛駒齒未齊。擬金噴玉向風嘶。來時欲盡金河道。獵獵輕風在碧蹄。

橐駝

唐杜甫

獨任三軍苦。安西萬里行。鑄鋼疑鶴頸。和角廢驢鳴。山負祁連重。泉知鄯善清。可憐終後載。汗血擅功名。

牛

唐李嶠

齊歌初入相。燕陣早橫功。欲向桃林下。先過梓樹中。在吳頻喘月。奔夢累驚風。不用五丁士。如何九折通。

代牛言

唐劉義

渴飲潁川水。饑喘吳門月。黃金如可種。我力終不歇。

老牛

元宋元

草繩穿鼻繫柴扉。殘喘無人問是非。春雨一犁鞭不動。夕陽空送牧兒歸。

羊

唐李嶠

絕飲懲澆俗。行驅夢逸材。仙人擁石去。童子馭車來。夜玉含星動。晨氈映雪開。莫言鴻漸力。長牧上林隈。

金絲犬

明瞿佑

擺尾搖頭慶所遭。愛同獅子銜金毛。花前喜共狸奴戲。月下難隨狗黨嘯。易卦已曾稱小畜。書篇底用詫靈葵。主翁要使防門戶。免逐韓盧較獵勞。

題犬

元貢性之

深宮飽食恣獐獮。卧毯眠氈慣不驚。却被捲簾人放出。宜男花下吠新晴。

白鹿

明瞿佑

角瑞字刻表銅牌。知向宜春勝地來。仙子倒騎歸閬苑。聖君馴養在靈臺。長生自得千年壽。閒色誰將二女猜。待看呦呦食苹後。吹笙鼓瑟慶筵開。

猿

唐杜甫

裊裊啼虛壁。蕭蕭掛冷枝。艱難人不免。隱見爾如知。慣集元從衆。全生或用奇。前林騰每及。父子莫相離。

夜猿

唐馬戴

日飲巴江水。還啼巴岸邊。秋聲巫峽斷。夜影楚雲連。露滴青楓樹。山空明月天。誰知泊船者。聽此不能眠。

猿

元宋无

巴峽聞聲愁斷腸。冷泉照影綠陰涼。藤搖亂雨領兒過。樹晒斜陽拾蠹忙。獻果去尋幽洞遠。攀蘿來撼落花香。空山月暗無人見。啼入白雲深處藏。

又

唐徐寅

宿有喬林飲有溪。生來踪跡遠塵泥。不知心更愁何事。每向深山夜夜啼。

白兔

明瞿佑

白玉狡獪脫鼻羈。遠隨重譯到皇畿。仙山昔慣餐霞草。月殿今看舞羽衣。塵褐已將狐換腋。霜毫欲與雪爭輝。蒼鷹黃犬休回顧。拔宅西來得所依。

黑兔

明曾棨

傳聞三穴久儲精。日啖元霜異質成。入竅總含蒼露溼。一身斜軀黑雲輕。行來青瑣應難見。立向瑤階却盡驚。自是太平多瑞物。願隨毛穎咏干城。

乞貓

明文徵明

珍重從君乞小狸。女郎先已辨氍毹。自緣夜榻思高枕。端要山齋護舊書。遺聘自將鹽裹箸。策勳莫道食無魚。花陰滿地春堪戲。正是蠶眠二月餘。

嬾貓

附張劭

養空勤費夜。性慵奈像主。久何翫。然聚穴。防寒早。目送跳梁。戒殺多。食少魚腥。春悶悶。眠殘花影。雪蟠蟠。長卿四壁。雖如水。誰管偷詩物。似梭。

貓兒

宋林逋

鐵鉤時得小溪魚。飽卧花陰興有餘。自是鼠嫌貧不倒。莫慚尸素在吾廬。

碩鼠

元鄧文原

禾黍連雲待歲功。爾曹竊食素餐同。平生貪黷終何用。看取人間五技窮。

銀鼠

附張劭

杏山穴產耀靈龜。獵網追風捕幾何。竄地捷於逃月兔。跳空亮比擲星梭。松林溜粉宵還避。雪窖爭輝冷却過。總為微名誇世寶。新來冠服借伊多。

鱗介部

龍

明陳成

變化非常物。含生類不羣。天淵無定在。大小忽相分。萬甲盡藏雨。浮身通繞雲。蒼生方待澤。莫只睡無聞。

雷雨起龍

宋范成大

雨工避事欲踣泥。帝遣豐隆執以歸。連鼓一聲人失箸。不知破壁幾梭飛。

鯉魚

唐章孝標

眼似真珠鱗似金。時時動浪出還沉。浪中得上龍門去。不歎江河歲月深。

黃魚

唐杜甫

日見巴東峽。黃魚出浪新。脂膏兼飼犬。長大不容身。筒桶相沿久。風雷肯爲神。泥沙卷涎沫。回首怪龍鱗。

金魚

明瞿佑

逐隊隨羣樂自如。桃花浪暖變形軀。散如萬點流星迸。聚似三春濯錦舒。玉帶高懸知陸見。紫囊同賜憶朝除。池中有此稱三寶。須備神龍授火珠。

又

明朱之蕃

誰染銀鱗琥珀濃。光搖鬢鬣映芙蓉。清池躍處桃生浪。綠藻分開金在鉤。丙穴靈源隨地湧。離宮正色自天鍾。羣魚漫爾同遊泳。却見飛空化赤龍。

比目魚

唐杜甫

比目誠何恨。滄浪作伴遊。幸逃網罟厄。可免別離愁。小市時珍改。殘書土物收。若逢封禪詔。定向海邊求。

白小

唐杜甫

白小羣分命。天然二寸魚。細微露水族。風俗當園蔬。入肆銀花亂。傾箱雪片虛。生成猶捨卵。盡取義何如。

燕窩

唐杜甫

海燕無家苦。爭銜白小魚。却供人採食。未卜爾安居。味入金齋美。巢營玉壘虛。大官求遠物。早獻上林書。

小魚

唐盧綸

蓮花影裏暫相離。纔出浮萍值呂師。上得龍門還失浪。九江何處是歸期。

龜

唐徐寅

行止竟何從。深溪與古峯。青荷巢瑞質。綠水反靈踪。鑽骨神明應。酬恩感激重。仙翁求一卦。何日脫龍鍾。

放龜

唐司空圖

世外猶迷不死庭。人間莫自恃無營。本期滄海堪投跡。却向朱門待放生。

賦得蟹送人之官

明高啓

吐沫似珠流。無腸豈識愁。香宜橙實晚。肥過稻花秋。出簞來深浦。隨燈聚遠洲。郡齋初退食。可怕有監州。

酬寄海蟹

唐陸龜蒙

藥杵應阻蟹螯香。却乞江邊採捕郎。自是楊雄知郭索。且非何胤敢餓餽。骨清猶似含春靄。沫

白還疑帶海霜。強作南朝風雅客。夜來偷醉早梅傍。

蛤蜊

宋孔武仲

去年曾賦蛤蜊篇。旅館霜高月正圓。舊舍朋從今好在。新時節物故依然。栖身未厭泥沙穩。爽口還充鼎俎鮮。適意四方無不可。若思鱸膾未應賢。

海蜃

元謝宗可

層濤湧沫綴蝦行。水母含秋孕地靈。海氣涼凝紅玉脆。天風寒結紫雲腥。霞衣褪色冰涎滑。瓊饌烹香酒力醒。應是楚江萍實老。誤隨潮信落滄溟。

昆蟲部

蠶

唐蔣貽恭

辛勤得繭不盈筐。燈下繰絲恨更长。著處不知來處苦。但貪衣上繡鴛鴦。

蟬

唐李商隱

本以高難飽。徒勞恨費聲。五更疎欲斷。一樹碧無情。薄宦祗猶茲。故園蕪已平。煩君最相警。我亦舉家清。

又

金黨懷英

槁壤陰潛罷輕丸。飄飄便作飲中仙。幽叢何處拳枯蛻。別樹還來續斷絃。小苑日長春夢覺。空庭人靜綠陰圓。無情物化誰能料。爾撥羈懷一慨然。

又

唐虞世南

垂緜飲清露。流晷出疎桐。居高聲自遠。非是藉秋風。

又

宋寇準

寂寂宮槐雨乍晴。高枝微帶夕陽明。臨風忽起悲秋思。獨聽新蟬第一聲。

夜蟬

唐唐彥謙

翠竹高梧夾後溪。勁風危露雨淒淒。那知北牖殘燈暗。又送西樓片月低。清夜更長應未已。遠煙尋斷莫頻嘶。竊人此夕如三歲。不整寒衾待曙雞。

聞蟬

唐許棠

造化生微物。常能應候鳴。初離何處樹。又發去年聲。騷屑隨風遠。悠揚類葉輕。報秋涼漸至。嘶月思偏清。互獸宜相答。微搖似欲行。繁音人已厭。朽蠹蟻猶爭。朝上嚴冠飾。宮娥逞鬢名。亂依西日噪。多引北歸情。篠露疑潛吸。蛛絲忽遶縈。此時吟聽久。不覺萬愁生。

蜂

明俞允文

春晴逢穀雨。泛濫繞林篁。逐醉縈輕袂。纏花獵異香。叢棲懸玉宇。疊構隱金房。靈化知何術。神功寄藥王。

又

唐李商隱

沙苑華池爛熳叢。後門前檻思無窮。宓妃腰細才勝露。趙后身輕欲倚風。紅壁寂寥崖蜜盡。碧簾迢遞霧巢通。青陵粉蝶休離恨。長定相逢二月中。

又

唐羅隱

不論平地與山尖。無限風光盡被占。採得百花成蜜後。不知辛苦為誰甜。

又

鶯鶯華華競採花。蜜房收課作生涯。知他有甚經綸處。也向潮時報兩衙。

明郭登

蝴蝶

尋艷復尋香。似閒還似忙。暖煙沉蕙徑。微雨宿花房。書幌輕隨夢。歌樓誤採粧。王孫深屬意。繡入舞衣裳。

唐鄭谷

又

粉蝶翩翩若有期。南園長是到春歸。閒依柳絮參差起。困傍桃花各自飛。潛放燕鶯還散亂。偶因人逐入簾幃。曉來欲雨東風急。回看池塘影漸稀。

唐李建勳

又

拂綠穿紅麗日長。一生心事住春光。最嫌神女來行雨。愛伴西施去採香。風定只應攢藍粉。夜寒長是宿花房。鳴蟬性分殊迂闊。空解三秋噪夕陽。

唐徐寅

又

宋謝無逸

粉翅雙翻大有情。海棠庭院往來輕。當時只羨滕王巧。一段風流畫不成。

又

桃紅李白一番新。對舞花前亦可人。才過東來又西去。片時遊遍滿園春。

黃蝶

明瞿佑

誤入蜂房不待媒。巧傳顏色換凡胎。遠籬野菜流連住。何處金錢變化來。傳粉已知前事錯。偷香未信此心灰。上林鶯過頻回首。一色毛衣莫用猜。

白蝶

附張劭

麴塵何處不參差。美爾輕衫未化綫。雪已盡時還舞草。梅才開後忽枯枝。閒窗春暗來先見。午枕風輕去不知。底事野花名濫竊。寄人簪下畫臙脂。

蛙

唐王維

熟梅天氣已初收。何處蛙聲隔水樓。鼓吹翻嫌驚好夢。公私誰謂亂閒愁。薰風候已連花信。碧草涼應動麥秋。赤鯉聞雷爭變化。汝能燒尾躍雲否。

蜎蚪

亂點斑斑撒豆紋。縱橫聚散自成羣。桃花浪裏翻香墨。柳絮池邊張黑雲。孔壁遺書端足擬。秦宮劫火豈能焚。到頭借得風雷便。脫略凡胎賴夕曛。

紅蜻蜓

明瞿佑

螺粉蜂黃氣正驕。愛渠款款集蘭苕。翅攢霜葉飛難定。目聚燈花焰未消。偷咀仙霞傳秘訣。戲塗猩血點纖腰。寫生好倩毗陵筆。濃蘸胭脂上輭綃。

螢

唐李嘉佑

映水光難定。凌虛體自輕。夜風吹不滅。秋露洗還明。向濁仍藏焰。投書更有情。猶將流亂影。來此傍簷楹。

又

梁元帝

著人疑不熱。集草訝無煙。到來燈下暗。翻向雨中然。

又

唐郭震

秋風凜凜月依依。飛過高梧影裏時。處暗若教同衆類。世間爭得有人知。

又

唐羅鄴

水殿風清玉戶開。飛光千點去還來。無風無月長門夜。偏到堦前點綠苔。

聞蛩

唐白居易

聞蛩唧唧夜綿綿。況是秋陰欲雨天。猶恐愁人暫得睡。聲聲移近臥牀前。

促織

唐杜甫

促織甚微細。哀音何動人。草根吟不穩。床下夜相親。久客得無淚。故妻難及晨。悲詩與急管。感激異天真。

又

明朱之蕃

聞堦聲徹瑣窗中。暗送梧桐落葉風。高韻不緣矜戰勝。微吟端欲助機工。雨餘切切昏鐘動。燈下叨叨午漏通。儻得匹成輸稅蚤。貽人安枕不言功。

戲題關促織

明張維

自離草莽得登堂。賢主恩優念不忘。飽食甕城常養銳。怒臨沙壘敢摧強。敲聲夜振蟻仍奮。壯氣秋高齒漸長。眼底孽餘平蕞後。功成誰復論青黃。

絡緯

明朱之蕃

誰遣縲車徹夜鳴。頻催雲錦織當成。送來枕上聲思詩。聽向床頭繫旅情。露濯羅英增絢爛。風傳鄰杵和淒清。冰蠶麤繭知難覓。何似秋蟲巧弄聲。

紡織婆

漚麻曝絮歲功成。蟲語潛催布縷征。籀落聲宏眠詎穩。草蟲音切聽偏傾。連綿欲伴孤燈炯。淒惻還偕細雨鳴。幾度停車增悵結。悠悠不斷似離情。

蒼蠅

生從汙穢忽雄飛。鼓翅搖唇覓軟肥。膝酒殘羹沾醉飽。青絲白壁妬光輝。營營引類濟同惡。總總依人不曾違。驅逐雖嚴還易集。待將塵尾莫停揮。

蚊

明陳大成

白鳥向炎時。營營應苦飢。進身因暮夜。得志入簾帷。噓吸吾方困。飛揚汝自嬉。西風一朝至。蕭索竟安之。

蠨子

唐元稹

蠨子微于蚋。朝繁夜則無。毫端生羽翼。針喙嚼肌膚。暗毒應難免。羸形日漸枯。將身遠相就。不敢恨非辜。

浮塵子

可歎浮塵子。纖埃喻此微。寧論隔紗幌。并解透綿衣。有毒能成病。無聲不見飛。病來雙眼暗。無計辨雰霏。

巴蛇

巴蛇千種毒。其最鼻褰蛇。掉舌翻紅焰。盤身蹙白花。噴人豎毛髮。飲浪拂泥沙。欲學叔敖瘞。其如多似麻。

蜘蛛

蜘蛛天下足。巴蜀就中多。縫隙容長跼。虛空織橫羅。縈纏傷竹柏。嚙噬及蟲蛾。為送佳人喜。杖櫳無奈何。

蛛網

明瞿佑

來往尋簷不憚劬。經營何異緝吾廬。曉風倒掛蜻蜒尾。暮雨雙粘蛺蝶鬚。屋角儘教長掩護。杖頭不用苦驅除。夜來露重春煙暝。綴得瑩瑩萬顆珠。

壁魚

唐李遠

鱗細粉光鮮。開書亂眼前。透窗疑漏網。落硯似流泉。潛穴河圖內。吞鈎乙字邊。莫言暑鬣小。食盡白蘋篇。

蝸牛

宋蘇軾

腥涎不滿殼。聊足以自娛。升高不知回。竟作粘壁枯。

蟻

唐元稹

時術功雖細。年深禍亦成。功穿漏江海。嚙食困蛟鯨。敢憚榛巢蠹。深藏柱石傾。寄言持重者。微

物莫全輕。

民國二十五年一月初版

咏物詩選 全書一冊 定價大洋一元八角

版權所有
翻印必究

編輯者 魏塘俞瑛

校訂者 儲菊人

出版者 上海中央書店

發行者 上海中央書店

總發行所 上海四馬路中央書店

分發行所 上海及各省各大書局

82
802219
C/O

